

詩
選

海潮音文庫

于右任
印

中國唯一佛學叢刊

海潮音十大特色

- 一、古今佛學家之淵藪
- 二、東西文化之總匯
- 三、攝華國之道德
- 四、順時代之潮流
- 五、能擴張眼界開拓胸襟
- 六、能消除煩惱度脫苦厄
- 七、能斷萬劫之愚癡得大智慧
- 八、能破十方之黑暗頓放光明
- 九、能以自覺破一切障覺他破一切邪
- 十、現前為濟世之偉哲將來得轉依之法身

民國二十一年六月初版

海潮音文庫第四編

佛學餘論二詩選

◎全一冊定價 道林本 六角 郵費
報紙本 三角五分 外埠

審定者 太虛法

校訂者 范古

編輯者 慈忍室主

出版者 佛學書

印刷者 國光印書

發行者 佛學書

上海新大沽路口丁四十三號
上海開北新民路國慶路
電話三三七四三
上海北車火車站東首寶山路

海潮音文庫編發大意

(1) 本文庫爲便宜讀者之研究。以十年來所出之月刊爲材料。分類編輯。審慎採集。予有志學佛者。以有組織有系統之貢獻。

(2) 海潮音月刊歷年十週。編輯會數易其人。材料之收集。不免有投其所好而刊登者。夫以知見不純正之註著。既有誤於初學。帶感情用事之論文。乃易引起教內之爭執。文庫取材。對此種文。縱使議論風生。亦當勉爲割愛。以導學佛者於正軌。

(3) 海潮音刊載之註著。雖爲適應時代之要求而方便設教。然亦須有垂之長久之真價。乃得流傳。以佛法爲三世不易之常法。非世學之隨時隨地而異趣也。其爲偏於應時。缺乏不變之真實。及帶有時問性過甚。易引起新舊之爭者。割棄不錄。

(4) 月刊定期出版。收集不免稍濫。文庫取材。極端嚴格。無關宏旨之論文。甯缺不錄。(附注)道德倫理。義相聯次。合爲一種。丙編增整理僧伽制度論一種。仍不變動原定種數。

庚午夏月慈忍室主人作於杭州韜光之韜室

海潮音文庫總目錄

甲編 佛學通論 (十二種)

- 一、科學
- 二、哲學
- 三、宗教
- 四、人生
- 五、國學
- 六、文化
- 七、進化論
- 八、社會學
- 九、道德學
- 十、教育學
- 十一、政治學
- 十二、論理學

乙編 佛學本論 (八種)

- 一、法相宗
- 二、法性宗
- 三、真言宗
- 四、淨土宗
- 五、律宗
- 六、禪宗
- 七、天台宗
- 八、賢首宗

丙編 佛學足論 (九種)

- 一、經釋
- 二、論釋
- 三、在家佛學法
- 四、佛學歷史
- 五、佛教傳記
- 六、討論集
- 七、講演集
- 八、論文集
- 九、整理僧伽制度論

丁編 佛學餘論 (五種)

- 一、文選
- 二、詩選
- 三、尺牘
- 四、筆記
- 五、小說

佛學叢刊
海潮音文庫 第四編

佛學餘論二 詩選目錄

一五言古詩	五十四首	一
二七言古詩	二十九首	二六
三五言律詩	一百六十八首	四五
四七言律詩	二百六十二首	八七
五五言絕句	一百十七首	一五五
六七言絕句	一百八十首	一七四
七偈頌	二十一首	二〇三

佛學叢刊
海潮音文庫 第四編

佛學餘論二 詩選

一 五言古詩

呈太虛導師

楊壽昌

人生如漚浮。瞥瞬成空寂。曲說揚其波。詭變紛難測。幻網縛重重。妙明自枯失。浩劫苦循環。嗟彼處禪叢。仗疇作導師。拭涕拯沈溺。宏啓非身諦。除冥破結習。道安今幸存。俊辯彌天溢。牛車來燕京。掉此廣長舌。開演法無邊。迴向淨佛國。般若是誰聞。諸天雨花集。

我欣得善利。稽首維摩詰。玄義聆風幡。萬法信唯識。平生一瓣香。敢爲南能執。慈雲祝徧覆。厲氣慶潛熄。

呈太虛上人

許以復

我師具大心。入此情世界。我師發宏願。不捨娑婆穢。龍戰血玄黃。劫運脩羅邁。衆人悉攘攘。毋乃利所賣。末法無衲子。往往輕破戒。優婆塞夷衆。迷惘依魔外。凡此諸非法。我師心如瘴。運此廣長舌。銷彼五陰蓋。解粘爲去縛。慈悲而喜捨。威昔王以前。有何言說解。亦可說得時。大有因緣在。隨機爲開示。理事事無礙。度一切衆生。實無有度者。

擬古

天然遺稿

絕壁千餘仞。上有一幽人。擊石爲屋宇。風雪不閉門。時來坐案頭。當戶奏陽春。此曲無人和。茫茫以終身。

贈廖樹衡君（并序）

前人

壬寅秋首。廖君偕項君叔怡。重游南岳。尋本師默庵長老舊好。適寺有捐租之恐。乞

保全之無虞。且賜書初游時所得新句。與項君畫山水各一幅。輝寺屏障。此後朝廷提租之諭。不及叢林。感激之下。偶得五古。以志每飯不忘云。

正法流東土。歷年數千百。未墜及至今。代藉扶持力。爾來宗風頹。異議起外狄。一言挽狂瀾。法鼓如再擊。此功齊造化。焚香在朝夕。豈非國運強。大教當不息。朝爲尋夙緣。衡霍重游歷。留門字與畫。光輝生古壁。幸我接風流。於茲深感激。兩山頌如何。道場常寂寂。

暮春偕佛乘法師遊山

前人

數日未窺園。料知春已老。偶攜同心游。新晴山水好。深逕門忽開。誰去踏幽草。下有澣衣者。將返來時道。還君掩此扉。憐彼樹影倒。舉足石磴上。如出天地表。谷口競流泉。層巒青未了。綠竹拂行衣。蒼松夾道繞。笑指牆邊笋。雙雙穿泥巧。相看兩忘言。歸興更不少。

冬暮阻雨點石感途中情景

前人

離岳日益遠。相思日益切。出門不識道。臨歧問碑石。千峯萬峯樹。山間溪間色。日下短長亭。月出茅店白。懶殘恥虛名。高臥南山宅。胡爲解脫士。而作異域客。蓮池慕無人。(

本師默老開大善寺立慕蓮池額。磨鏡誰一拭。曾祖船老重新磨鏡台。祖海上人繼住。有年歸寂數載。智者不住世。天台日已夕。欲尋遠公林。曾挂點石錫。倘使心願往。何惜越鄉國。

讀楞嚴經有疑自答奉質

圓 瑛

無覆無記性。無同。無異中。此無覆無記性境。正當八識未轉依位中。今依經說。又正當生汝妄能以後。自屬比量境界。非真無同異。初疑金與灰。佛果喻未通。熾然。竟成異。鑽木各兩重。在鑽莫名金。成灰木難逢。實異彼所異。因異而立同。更疑金灰盡。攝相同歸空。轉計相滅時。鑽木性還融。同異。任發明。復立無異同。瓦礫喚金寶。灰堆認樹叢。妄擬指迷人。說理猶未終。迷頭逐空影。騎馬覓花驄。自疑釋尊以金不復成鑽。灰不復成木。以喻佛果。微嫌法喻莫齊。目此狂癡人。笑煞三家翁。

答宗門公案問清淨本然云何忽生山河大地

前 人

堂前一幅畫。遠水復遙岑。因緣無點染。隨意任縱橫。石女忽生兒。無端疑遂起。人間幾時生。我答就問你。若信有生時。石女非石體。若不會生時。石女翻笑你。

按此公案。已曾答過何競青之問。謂（一念不生。心境何狀）嗣某以此問德安法師。法師曰（你將甚麼作山河大地）可見余之見地不及德師遠甚。今特借附於此。善因識

遊白鶴白水黃龍諸山

馮振

言發冲虛觀。來遊白鶴麓。更登白水山。石上走珠玉。遠望渺若空。近視紛眩目。泉聲鳴瓊環。久坐聽不足。改道向黃龍。欲訪百圍木。安知傳說虛。松楸但如束。惆悵且登高。石道幾回曲。佳境漸足娛。懊惱轉銷縮。山上度石橋。倒挂千尋瀑。散作雨霏霏。短髮得膏沐。石有蟾蜍名。迹留神仙足。真僞奚足論。造作亦驚俗。亭寺半頽毀。草樹自凝綠。盛衰不可常。後來誰能卜。匆匆又下山。更投華首宿。

游羅浮宿冲虛觀

馮振

我本句漏人。少生山水窟。牢落墜塵寰。山水情未沒。曾作鼎湖游。又向羅浮發。首至冲虛觀。上尋蓬萊闕。道遠足已疲。興濃力未竭。遂登獅子峯。小道出林樾。同行五六人。半已中途歇。飛雲（峯名）藏半頂。Y髻（峯名）坐兀兀。白日山下明。煙雨山上出。願欲造其巔。道阻難超越。徘徊復下山。感歎爲丹穴。聞道稚川子。於此得仙訣。願念句漏山。仙蹤久傳說。是非孰辨正。名山待高節。苟無千秋士。山存名亦滅。夜宿山寺中。還望故山月。中夜不成眠。四面蟲聲急。天明去山寺。却與老僧別。

昨夢三人示死時日賦五古四章留別（辛酉十一月朔）舒景衡

昨夜夢三人。示我死時日。十二日下午。六時歸也吉。我聞爲欣然。萬累我能畢。憶我此番生。少小事儒術。廿四博一衿。卅六膺一秩。四十領郡學。雍容看舞佾。三載佐軍學。仍是操不律。國變猶苟活。一室惟抱膝。近日研佛理。梵說日一帙。稍去貪嗔癡。私淑維摩詰。清靜大海中。蓮座應生一。

此心已皈依。此身久屬君。歛以舊朝服。莫令身生慳。祭當分初大。樂作非樂聞。此觸

舊刑律。用告我子孫。來賓以蔬餉。門靡辱清門。碑以清字首。尤爲骨所欣。葬期務從速。計勿使多分。未可專驚外。驚外徒紛紜。禮儉與喪戚。孔氏有云云。

老妻長二齡。恐亦世難久。况時在病中。呻吟聲出牖。倘得從我歸。蓮海亦良友。世業如未竟。歸去尙須後。亦可率子婦。好好畜黃口。若生各一天。各自循途走。三子已成立。於今可速朽。仲也性篤厚。叔也亦謹守。季雖無多能。米亦負升斗。成否聽之天。一笑懸崖陡。我今無罪礙。可啓足與手。

少年舊同學。本早星落落。近日過從人。多半心知託。今日我去也。勿驚一個弱。憶我自無始。生死數難度。既慣死生來。何必爲死愕。異日如話舊。其說尤冥漠。我去路已遙。那有靈魂託。如謂人可珍。屍應度高閣。時時摩撫之。重或如河洛。諸君苟悟此。夢亦可醒噩。賦此留別詩。不死和詩索。

舒君痲僧學佛極精進、一日夢三人以十二日下午六時當死、醒後以詩紀之、
屆時不驗、因索和章、予憚於和、率成一首、

馮汗青

我歸自淮上。舒君貽我詩。詩中首說夢。夢境亦離奇。有客三人來。眎君以死期。十二日下午。蓮漏當六時。舒君躍然喜。去此生蓮池。作詩別友朋。有味乎言之。妻子意則殊。妖夢非所宜。跽請祝勿踐。舉室庶怡怡。妻子禱輒應。舒君意則悲。樂邦與淨土。何獨拒我爲。道路紛傳說。各各測以私。或則爲君慶。過此當期頤。百年方尙齒。二老還齊眉。或則爲君吊。生西阻者誰。三人交臂失。萬劫轉瞬馳。我意坦坦然。慶吊皆愚癡。死此而生彼。其樂誠無涯。倘戀娑婆苦。必爲類伽哩。惟其時未至。不妨少委蛇。蕉鹿已成幻。泥鴻且暫羈。願君仍精進。亦勿餒與疲。西方有三聖。夢合更何疑。示形君當拜。卽爲往生基。夢中無年月。麻數非爾知。人生終當化。時日或不欺。我聞先德語。念念出生資。一稱阿彌陀。蓮胎生葦蕪。青黃燦爛中。標名隱約窺。連台分九品。厥初無等差。片時掃蕪雜。七寶生階墀。寸心苟徹悟。環境皆導師。何必計時日。時亦念所持。嗟我學佛晚。又爲俗羈縻。進銳而退速。貌合神仍離。周公不入夢。豈云血氣衰。常恐成墮落。仰媿娥與羲。獨此區區心。不問道險夷。呼吸苟仍續。念茲常在茲。因君輒自做。亦欲相攀隨。

感懷

化聲

八萬劫之前。此身在何處。誰家造化兒。幻此我與汝。兩耳聳驢肩。聲塵知幾許。微視謝龍天。眼光大於鼠。營營方寸間。一日千年慮。古人與來者。呼之不得語。浩劫何茫茫。天地復逆旅。陰陽盜其精。青春不知去。白楊風蕭蕭。是誰眠其所。彭祖八百年。含淚別儂侶。眇茲蝸與蟬。飛鳴秋樹顛。吸風並飲露。得以全其天。哀哀爭存者。跼蹐亦可憐。地球聊一粟。萬類相周旋。弱肉強者食。悲音徹四筵。飲河期滿腹。胡爲慕腥羶。盛衰各有時。誰能金石堅。但看侯王宅。秋風起墓田。

贈李隱塵居士

大圓

予初從溫到鄂。寓佛學院。李隱塵居士因園中瓊花盛開。特備素筵。請太虛院長及空也法師化聲居士并予赴齋賞之。感而賦此。

龍蛇起大澤。巨海鬪鯢鯨。烽燧連天地。盜賊復縱橫。巢居躑靜柯。洗耳絕流清。長沮與桀溺。何處獲耦耕。伊維無上士。方便攝萬行。慈悲滅三毒。大勇非用兵。自利有餘裕。更

復度有情。我來江漢上。放志說無生。承光入丈室。瓊花開已盈。春風何浩蕩。四壁更崢嶸。
列席竟香齋。敷座多奇莢。巴歌發鄭里。求友當嚶鳴。

偕張蔭廬學博游雙峯洪覺寺

鄧彌之

靈蹟固匪遙。勝區亦未顯。竹柏翳青蔥。合沓迷近遠。松巔遙可識。蘭若到始辨。殿脚
闕孤岑。樓閣翼雙巘。憶昔開國初。茲山法輪轉。一鉢雞足來。洪覺寺開山僧曰渠山。來
自滇中雞足。駐錫于此。片偈虎心善。豁然龍象尊。濟爾人天緬。門外戰伐塵。檐際白雲
卷。誰言秦谷民。尙可商芝朶。五老洞陰。有康熙時古德題名。皆壽至八九十者。卓錫
嘉樹陰。洗耳蒙泉窟。至今寒山月。渠山相傳爲明季遺民。撰有寒山語錄。猶照石門
蘇。石門漾月爲雙峯八景之一。諸峯圍道場。元崖蝕仙篆。捫蘿幸未疲。採藥欲忘倦。廢
亭沒荒榛。禁蛙亭望雲亭今皆廢。架帙殘內典。寺舊有經半藏。近多殘佚。更約
襍被過。繙經擁蠶簡。

靈峯寺展視貝葉經

李佛肩

驢馬尋春事。柳下青絲騎。桃花迷路人。誤入靈峯寺。寺僧喜客過。儉囊慚布施。珍重啓瑯函。拂幘繙茉莉。奇文蝌蚪敬。筆筆圓融義。夙詔見書多。今逢不識字。未諳唐古時。東土失乳孳。通譯誰鳩摩。問禪無遠誌。回首白雲端。却悟西來意。

臺城

燕咫尺

高城俯闌若。草木含佛性。飛鳥繞枝啼。似語南朝恨。蕭郎講經年。捨身悟清淨。齋食戒鮮腴。法衣謝朝政。賊兵破城入。荷荷白日暝。在昔天監初。柴天代齊運。苟了平等義。侍中已非分。貴至不可言。還鄉徒空詠。靜者嚴所持。大勇在無競。嗟爾脩陵魂。遲聽法門聲。

悲蚊虫三首

前人

子子爾微物。聚族於涔池。不識湖海闊。蛟龍安得欺。造化工陶鈞。倏假飛鳴姿。震雷無頽響。爾聲胡含悽。思飲故池水。羽翼非所宜。嚼膚亦何心。蟲豸難忍饑。

不忍飢而生。甯知飽而死。捐軀徇腹腸。所得能有幾。人各愛肌膚。露筋豈得已。秉篋叱僮僕。古今幾佛子。

微虫一何癡。世人一何曠。潰彼櫻腹血。醢以紗幘塵。不思世網中。物我俱未眞。豺虎而冠裾。食人要路津。強顏與歡笑。何者爲冤親。悲哉竊鈎誅。乃在一黍民。

喻俗

大圓

昔予學爲儒。偷閒多厭世。今者聞佛法。一身兼百事。誰言學佛人。消極無遠志。所消在煩惱。所積在德義。或時稱大雄。三軍可奪帥。泥犂救衆生。艱苦猶不避。六度兼萬行。恆爲自他利。云何坐井者。窺天以小器。

千佛山興國寺（山在濟南城南四里許亦名舜耕山）

燕咫尺

石磴穿高林。人與鳥爭路。老僧出迎客。茶香淨吾慮。自言軍興後。唐虞不再遇。供僧有薄田。年荒困租賦。君看歷城外。舜耕在何處。當門無好山。山名華不注。（卽春秋晉師追齊師處）造物愛戎服。儒冠汝眞誤。（華不注形似戎服）

無相學者示子書之一則

石琴

衆生無罪過。罪過由我立。我息罪過因。罪過自無迹。我今自訟責。遭遇浪順逆。處順

轉驚惶。處逆反平適。往境甘和苦。別業或共業。非緣非怨對。酬因相投集。南航三萬里。空手歸來日。欲謝塵勞去。業緣愧未畢。解縛在心頭。心空縛相滅。

乙丑端午有感卽贈粹然華軒兩道友

陳妄清

去年端午節。宣化瞿塘中。今我來巴峽。倏又此節逢。遷流時不住。湖海幾飄蓬。可憐芸芸者。罔跡勞塵踪。况復魔外熏。百川誰障東。巴中各界入天主堂同善社者多。大雄蕭與戴。蕭粹然戴華軒。理明事亦融。現身爲商主。雅意慕遠公。不被邪說撓。篤信淨土宗。彌陀勿離口。蓮邦路可通。流落因客久。至誠仰主翁。莫以親疎別。他鄉彼此同。論交尋淑侶。相訪頻過從。問疑資啓迪。直將妙諦窮。欲得眞常樂。須極無爲功。觀物咸開悟。荷綠榴含紅。

登小白嶺鎮蟻塔（天童寺志山有蟻患唐會昌間心鏡禪師建塔鎮之）

燕咫尺

曉霧淹長松。時露鱗爪意。飛鳥無機心。啼上蒼龍臂。曲徑如蛇蟠。踏雨更迂滯。與人

指浮圖。粗知會昌事。啓予好奇心。禮塔入山寺。洞扉取次開。俯視駭無地。靈怪在何所。茫
茫但雲氣。自非湖海客。探幽反生畏。老僧爲予言。大蛇能自帝。沛公雖英雄。斬之似傷惠。
不斬亦不縱。佛法與人異。山中有巨蟒。一塔可幽閉。嘆息人心非。滔滔今何世。平地生波
瀾。嗜殺如異類。扇氛彌六極。茲塔無乃細。願假須彌山。鎮此人中魅。龍降降非龍。勿爲生
民祟。敢爲天下人。再拜謝佛賜。

去官八首并序

夏口汪翔

甲子初夏。奉命解職。重負初息。天君泰然。習氣未除。暇則喜爲詩。隨意發抒。憂時君
子。以此爲國風之採可也。

得官心易喜。失官多煩憂。世情類如此。今我豈其儔。得既無所得。失亦非我由。得失
兩陶然。無言自悠悠。

晨起理明鏡。鬚髮漸星星。譬彼蒲柳質。難例松嶸嶸。況我念民勞。百憂瘵其形。及今
歸去來。樗散全其生。

去年寇盜來。巨鎮爲劫灰。空城却悍賊。民窮天所哀。賊去官軍至。東西紛喧。注視傷民苦。爲汝重徘徊。

關東民物厚。治理非難爲。安民先治匪。兵多匪還滋。他族實信處。三者礙設施。與懷元道州。欲續春陵詩。

春日履郊坰。綠野正深耕。喜就老農話。拙率見真情。十年耿禪悅。入世苦牽縈。月明鳥雀靜。虛堂有佛聲。

少小學文章。詞氣走縱橫。才名浪稱許。老大愧無成。漢代經術盛。循良茂兩京。讀書堪致用。誰歟策治平。

山縣地稀薄。供求盡百端。樂歲猶苦飢。所望井里安。大戶走避賊。小戶血心剜。親民有司職。念此鼻辛酸。

鴨綠春水疾。韓民來避秦。山頭耨石田。鰲面心苦辛。上邦尙儲索。新刈如秋薪。我思古箕子。慚愧說同仁。

昌德老尼像

仁山

稽手昌德師。尼中有大志。發願薙染後。精進斬塵累。名山善知識。悉遍第一義。普陀與五台。草鞋均曾至。識得娘生面。銳然新古寺。搬磚並弄瓦。風雨都不避。千魔萬難陳。耿耿心何易。佛殿及菴田。經營俱略備。觀破幻世間。廣作度生戲。徒子與孫孫。屈指實難記。二十至七十。果證淨心地。信爲女丈夫。堪稱如來使。俚言敬述讚。欲令道不墜。

自蓮花洞至牯嶺山行口號

大醒

自發蓮花洞。步步清涼境。如入桃花源。又同村落景。岩谷千丈深。森林萬籟靜。閑坐松風陰。渴飲石泉冷。幾處野人家。半鉤金月影。山行十八里。才到牯牛嶺。

海上候船讀白太傅年譜

葉青眼

我本欲東行。候船羈海上。一閑一句日。日與古賢傍。古賢伊何人。香山居士身。居士生太原。常作江南遊。詩筒頻往返。杭州與蘇州。到處有吟詠。遺芬齒頰留。上下千餘年。相對若眼前。別有默契處。不共時光遷。公生而好佛。我亦習參禪。公宦薄人爵。我不喜神仙。

公宏兼濟願。(公生平主義不外窮則獨善達則兼濟二者)我亦學隨緣。青山詎獨往。(青山獨往本公詩句)九品共生蓮。(見彌陀諸經)年譜記年月。年年有律絕。恆言盛衰老。中心憂懨懨。應是念無常。臨老更悲傷。傷此浪蕩子。何日歸故鄉。公享年七五。我方五十一。我年少於公。五千三百日。公恆惕白髮。我甯安放逸。況公多病苦。我今尙無疾。一旦效鳳飛。(公詠史詩有彼爲俎醢。几上肉我作鸞皇。天外飛句)誰云不可必。人間分汝我。太虛一眞字。大夫苟自樹。古賢躡步武。有爲亦堯舜。斯言來已古。上海多繁華。倫類雜龍蛇。孰解此中意。想像九霄遐。

丙寅四月八日法源寺勝集分韻讚佛得矯字

濟 中

兜率初未離。風月自清皎。雙林旣趨寂。湫嶽盡傾倒。好事不如無。此意無人曉。甯稱永劫饑。弗求甘露飽。坐斷威音前。凡聖曾未兆。本來清淨幢。蕩然佛魔掃。摩耶胡降神。雪山胡成道。任從樂欣欣。入泥復入草。七步始周行。六年滯枯槁。奇哉睹明星。逗漏殊非小。幸未值雲門。棒殺惜不早。罪限信彌天。萬古知恩少。分明浴佛話。忍俊藥山老。馳逐天下

人競向那邊討。諸聖雖間出。玄辯窮善巧。盡道潭印空。誰示孤鴻矯。龍華修聖會。香雲散縹緲。灌頂五色水。禮足三匝繞。禪房覆喜蔭。靜領柏味好。有客奏雲和。是日聽楊時百章曼仙彈琴。沒弦可能挑。支公工讚佛。吉語燭幽宵。德山慣呵佛。峻機露孤悄。讚佛佛不喜。阿佛佛不惱。讚呵俱莫及。有所定非寶。未諳無底藍。漫吞囫圇糞。更問究如何。西方日出卯。

病中讀慈悲三昧水懺法卷有悟

余朮芳

茫茫六道中。衆生俱沈淪。我亦捲浩劫。不幸而爲人。落地一聲哭。爲人原苦辛。矧我厄遭際。十步九還逆。識字始憂患。入世多荆棘。七尺抗塵俗。向人強笑哂。歲歲役鉛槧。箋箋爲米薪。亦諳絕域學。予就學譯館。習俄文及交涉學。敵帝祇自珍。鬼笑劉公拙。妻瞋季子貧。願我心力瘁。瘦骨已嶙峋。竭來被飢驅。又走雙江濱。二豎追亡逋。千里來遲巡。客館苦風雨。一臥淹十旬。孤燈小於豆。萬念降若馴。想自無始來。造業已陳陳。一切現在果。都根過去因。病瘳不在藥。痛極無庸呻。孽緣倘未了。劫數終無垠。我讀三昧經。一字一

愴神。悟道恨已晚。無明汨其真。行當投空門。懺悔徒自新。斬絕煩惱念。證取如來身。子孫一委蛻。富貴一織塵。何事更留戀。老死誤迷津。

弔鵝詩

慧舟

浙瀝滴幽窗。連宵雨不止。朝來夢乍醒。童子報汝死。初謂或死飢。繼知被沒水。哀哉爾爲物。何一愚至此。觀汝之外表。羽毛非不美。顧爾之內容。蠢然無一技。水國本爾家。何反死於是。知矣汝生時。浮波性不喜。日惟立池邊。飲啄無他徒。方期安樂長。誰知禍患邈。無情春水來。新漲沒橋尾。當汝沒池中。哀鳴應不已。爾亦有羽翼。爾亦有毛趾。不知自振拔。畢命亦奚悔。嗟嗟茲人羣。將沈巨浸裏。競逐此濁流。不肯求真理。反失故良知。斯病正同爾。安得汨其泥。免汝含羞恥。

登南嶽偕智純兄及蘭若居士

大圓

維岳司南極。靠巍聳蒼蒼。大筵雲陟險。巖巖高步踐。星躔陰壑鬱。黛色陽林耀。春研我來豔。陽候萬山響。杜鵑遂登祝融頂。雲海覽無邊。旁窺羅漢洞。綈綈何逸然。高低殊顯晦。升

降若天淵。日西下修坂。平疇見陌阡。昔予獨行遊。弱冠事列仙。今來髮欲白。學佛僧兩賢。唯識觀萬化。心境詎相懸。何當解塵鞅。卽此獲安禪。

對月懷蘭若居士

前人

微風起林表。明月出高崗。流光照巖谷。草木何飄颻。悠悠遠行客。此際至何方。幾日達鄂渚。或猶滯三湘。見月感何極。問程尙茫茫。江南多貔貅。閱門方未央。雖云菩薩道。苦行斷人腸。

詠支那兩法師

前人

支那大法師。厥名曰大虛。胸無微塵染。腹有萬卷書。下筆驅風霆。說法上匡廬。龍象能蹴踏。令聞增廣譽。西哲慕東化。多向賦歸與。法雲鬪法界。其樂也只且。普陀老古鐺。厥名曰印光。眉毛拖地白。鼻孔撩天蒼。冥心想淨土。開口說西方。安居藏經閣。自有無量光。僧俗來參叩。老實不可當。阿彌陀一句。勿許再商量。或遺一書札。酬答頗能詳。不啻自口出。爛然有文章。讀者皆傾倒。稽首表贊揚。因之起正信。柔化百鍊剛。文字作佛事。抑一大

願王。

秋興

譚道

人生不百年。歲月如波流。風塵長碌碌。何以遣吾愁。少年所歷境。事事多煩憂。於今二十二。撫境如幽囚。無術自排蕩。且復登高樓。向空一長嘯。天地何悠悠。死生自有數。富貴不可求。人生既如此。何勿早歸休。一身無罣礙。四海隨遨遊。竊窹以尋壑。崎嶇而經邱。引觴以自酌。景僻心逾幽。若猶紅塵戀。霜雪恐盈頭。獨立正懷想。哀厲一聲秋。

中原

虞愚

中原還逐鹿。禹域已支離。市城鳴豺虎。平地起蛟螭。聖賢道傾毀。是非互乖違。我愛兼我慢。我見亦我癡。根本四煩惱。皆自我中滋。戀愛作亂愛。兩性自參差。社交成獸合。豈以禮爲基。自由歸自苦。輕合必易虧。出言皆破壞。破壞亦何爲。忽迎忽打倒。強辯作諛辭。或樹黨結社。或開會臨時。或殘民以逞。或假公濟私。科員談兵藝。顯職長以司。陽飾謙讓態。陰實力把持。論才互推諉。標榜效牛吹。鼠輩皆得志。狗類盡英奇。簽名如蚯蚓。治政竟

不知方柄而圓鑿。倒置必顛危。翻天更覆地。無道無四維。強食弱者肉。報怨無絕期。目擊今天下。到處盡瘡痍。

臘八大雪祝佛成道頌

大圓

舉世造黑業。所以成漆桶。菩薩業尙白。隨處播佛種。黑者白之虛。白乃黑實相。只能在轉依。何曾有兩樣。佛昔在雪山。六年修苦行。因緣果皆熟。無上正覺成。我等真佛子。盡生如來家。今日頂禮佛。徧界散天華。歡喜祝佛言。三界火宅苦。願隨白白業。清涼變淨土。佛若現金身。微笑復拈花。直指爾本來。與我毫不差。

奉贈大圓居士五古一章

賀民範

衡嶽聳南荒。瞠目若無睹。洪鐘響清夜。塞耳不相屬。黜明復墮聰。官駭愧虛具。美人在天末。迢迢悵雲樹。祝我摩咀迦。盥手听夕讀。高文典冊中。彌望皆金玉。東方古文化。從此開寶庫。識海何茫茫。一舟得飛渡。大放般若光。震旦輝萬炬。取之無盡藏。飲之皆法乳。廣大而精微。上與契基伍。通俗利他人。善巧方便語。發茲千年閱。功德邁前古。一讀一低

徇。萬徧萬摩。撫我慚業障深。質朽行更竄。偶然通一箋。亦許窺堂廡。殷勤具法施。爲我慰窮苦。勵學崇相宗。制行在淨土。攜手到菩提。龍鍾勉步武。

壽李鳳岐先生及德配董夫人七十

張觀本

吾人治生產。質相本不違。况復修孝養。三福爲淨依。昔有李長者。華嚴燦珠璣。今有李長者。寶積逗時機。青蓮金粟影。今古同芳菲。太和萃一門。儉德凝春暉。雍穆立道本。立光前徽。更有大寶所。溫仰誰赴幾。無量壽光佛。功德何巍巍。善哉長者子。行願能自歸。今以此莊嚴。斑斕舞綵衣。天倫有真樂。安養世所希。四端通南極。雙星入太微。緬彼霸陵叟。齊眉皆古希。躋堂稱兕觥。緜緜玉屑霏。我聞亦起舞。歌詠儕風沂。蓮胎卽眷。同體甯獨非。供養徧十方。想見天華飛。對此耆英會。遙禮長生闈。入幕歌一曲。笑煞劉孝威。

生日自題

夏壽康

親眷憐我病。刺血盈杯盎。寫金剛心經。彌陀觀音像。德淳善知識。隨喜功無上。精誠稱法性。遍滿蓮花藏。行年五十二。誕日得嘉貺。禮敬生法喜。那復知痛癢。病是業所纏。因

果信不爽。色身一微塵。愛惜徒自枉。惟有生死事。不明考妣喪。自有分別心。墮此無名網。

送大猷師赴彌勒院出家

皮劍農

人生不滿百。如蝨處禪襦。無明迷本性。名利熱中腸。憐彼膏肓者。喪心復病狂。羣兒戲火宅。池魚受其殃。鄧子悲淪溺。拯濟苦無方。昔現宰官身。口碑載粵疆。今爲比丘僧。欲度以精航。幸遇天人師。示之以周行。妙法傳心印。相得而益彰。從茲識覺路。夙願欣已償。衆生醉夢中。歧途尙徬徨。惟君發弘願。導彼履平康。世界惟心造。歷劫幻滄桑。彌勒大願力。蓮花成道場。七寶莊嚴土。無量功德藏。疑君前世因。曾侍彌勒傍。此去住內院。應是還故鄉。分袂在南浦。輕舟一帆揚。

未預楞嚴法會有感

李少谷

吾雖未學佛。信佛莫如我。苟能通其意。梵書不讀可。色空皆強名。何論圓與橢。人生各有性。隨波而失棹。吾亦在其中。覆舟海同墮。饑寒日驅迫。名利爲韃鎖。夢夢以待盡。來去隨因果。法師南海來。說經洞觀火。大阮累函招。法會皆吾夥。奈何被羈縛。當仁足自裹。

豈其夙緣慳。未得參法坐。憶昨居鄂城。晨夕親薩埵。先知覺後知。師資有餘頗。自從西塞歸。內願遭坎坷。母去子在巢。嗷嗷誰翼卵。迴鄉杜門居。萬事付懶惰。往者不可諫。今還作什麼。身已絕物處。心尙未安妥。何當飛鳧來。棒喝鍼庸瑣。大道不外求。仔肩獨擔荷。掘草弗掘根。操術毋乃左。探驪貴得珠。正鵠爲射梁。衆生苦陷溺。拔之載一舸。七寶蓮池中。慈悲花朵。

登積香閣

慧音

柳我所手栽。園我所手闢。嵯峨起高閣。窗紗透寒碧。昨夜風雨來。湖水深幾尺。灘際露微影。中有溪鳥迹。嗟予墮塵網。形神日疲役。無如鷗鷺閑。晤對面已赤。寶我額上珠。溫我胸中籍。本來一事無。胡爲自課績。高枕蒲團眠。清風生兩腋。一覺夢已非。粘縛從此釋。

雜詩二首

嚴士采

滔滔江漢上。洋洋湘沅流。以茲周京化。被此楚水頭。南紀足千古。雲夢誇田游。美哉稱佳麗。地勢固無儔。追念二南詩。揚舲溯前修。

閑居病入世。哀哉人食人。萬姓相仇殺。四野盡荆榛。西方金仙子。慈仁本足珍。已矣天地閑。無由竟誰陳。

二 七言古詩

贈日本永阪石埭居士

虎岑僧笠雲

主人愛梅兼愛竹。千箇琅璫冷塔玉。碧廊星舫祭詩龕。古器縱橫周四屋。圓水一泓名玉池。繞池山石自參差。長延墨客時中酒。每致騷人一賦詩。愛梅深得畫梅法。清淺橫斜縱開合。古人不見金冬心。欷歔嘿坐梅花榻。居士冢具有梅榻。梅窗梅椅等器。我來觀畫逢故人。就中愈（蔭甫樾）陶（槩林森甲）交最親。道溪聯實思舊社。（文廷

式爲長沙碧湖詩社中人。况復同衣得寄塵。有麓山退院寄塵書聯余亦麓山退院故
 曰同衣。鋪陳每合中華式。中華名畫兼文字。小坐閒行亦自佳。宛如故國論文地。飽餐
 孟鉢醉飛觥。天爲幽人滿放晴。梅窗齋畢斜庵坐。瓦磴磨茶奴配聲。大名不獨詩文筆。國
 醫兼擅活人術。別何忽遽見何遲。善保千金履貞吉。揖謝神田（居士所住地名）石埭
 君。並將斯意告同文。絳蠟有情拋不得。淚珠如迸泣離羣。（時鸞洲伯爵因病未與不忍
 池之會）

暮雪喜俗房叔與次弟來山

天然遺稿

北風捲地飛雪白。獨坐南牕長寂寂。不聞玉樹鳴歸鴉。誰憶花徑踏來客。客來敲門
 值暮天。斧冰燃竹煮石泉。乍見翻疑從何處。熟視始知是故親。呼徒斟茶出蔬果。敘談月
 夜添餘薪。語罷家鄉孤燈滅。明朝送客更愁絕。來時行蹤雪已迷。去時曲路風生衣。風回
 路轉天又雪。還將風雪送客歸。

嶽蓮和尚招余就齋作七古一章奉酬時其師枯木長老遠出

寄禪

主人好客殊常情。入門一笑心先傾。曼陀花開香滿室。蕊萼草秀青連楹。禪悅法喜味自好。真如妙諦言皆新。枯禪出定杖錫涉。古琴掛壁松風鳴。高山流水神已會。至音希聲誰能聽。雲儀鶴貌不可識。良辰勝地虛此行。欲去却顧童子語。師歸問訊稱余名。

題半衲秋塵兩君攝影

顯蔭

瀛洲之湄有神鶴。朝游南海暮西竺。直上扶搖十萬程。翱翔往來無拘束。偶然留影。乾達城。癡心想掬水中月。君不見。菩提寶樹葉森森。芬陀利華光燦燦。一奏淵明無絃琴。和雅音聲非金石。一唱牟尼無生曲。惺惺寂寂離言說。是非總作壁上觀。泯今古。今絕榮辱。家國世界何所有。治亂興亡都忘却。花落花開渾不知。逍遙世界求真樂。

祝髮示弟

八指頭陀遺詩

人間火宅不可住。我生不辰淚如雨。母死我方年七歲。我弟當時猶哺乳。撫棺尋母哭失聲。我父以言相慰撫。道母已逝猶有父。有父自能爲汝怙。那堪一旦父亦逝。惟弟與

我共荒宇。悠悠悲恨久難伸。搔手問天天不語。竊思有弟繼宗支。我學浮屠弟其許。豈爲無家乃出家。歎息人生如寄旅。此情告弟弟勿悲。我行我法弟繩武。

石經山石刻佛經洞歌

馬振憲冀平

洞在房山縣白帶山。通名石經山。一名苾題山。俗呼爲小西天。隋大業中靜琬禪師承南嶽慧思大師旨。發願勒石刻經。自隋及元。代有續刻。藏於茲山東峯。上鑿巖洞七。遼清寧以前。共刻就涅槃華嚴般若寶積四大部經。爲石凡二千七百三十片。經凡九十一帙。又西南洞穴二。一爲遼道宗皇帝藏千佛名等經。共二十三種。爲石一百八十片。一爲遼代通理大師藏經。初始於大安九年。告成於天慶七年。計刊大佛頂首楞嚴經論等六十種。四百二十二卷。四十四帙。爲石四千八十片。又雷音洞（卽石經堂楣題聲輪洞三字）四壁嵌石。鑄妙法蓮華經共十三種。凡一百四十七石。（皆琬師時刻。周忱游記謂字體類松雪。大謬。惟其中兜率陀天經乃後人補鑄。署名高麗僧達收書。）統計凡八千三百餘石。皆高五尺許。偉矣哉。真東方之

瓊寶也。余以三月偕慧輪、聖慧諸師登山頂禮。羣興讚歎。乃撰長壽。並考其藏石之年代。暨卷石之數。附志於此。以備遺佚云爾。

京西羣峯聯太行。房山翠接中條陽。千迴百折起白帶。上有寶窟騰神光。金文字字聲輪轉。青瑤片片雲漢章。我來擔笠禮聖蹟。果老騎驢石已僵。山半有大石紺色。俗呼張果老騎驢石。半山亭子荆棘裏。磴雲高翳藏經堂。天風翼衛升塚頂。雷音洞敞神回皇。右列洞三左列二。下轉二窟盤七裏。窗窺經石咸臥置。層累疊積陳中央。輪廓剝泐字畫好。筆如屈鐵森成行。縱橫鯨吐復鰲擲。跌蕩箕舒還翼張。雨淋火炙不到處。沐日浴月閱嘉光。同來緇素齊膜拜。聖典刻石開鴻荒。時當南北裂大字。梵饑恐遂亡東方。南嶽大師此卓錫。願持法寶神慘傷。地近鑿閩產嘉石。思藉琳珉更縹緗。亦知貞質有時泐。差勝絹素飽蠹糧。琬公奉詔局厥績。導儀違法（四傳僧名）承流長。始隋大業速貞觀。涅槃百石森琳琅。琬師始刊涅槃經。至貞觀五年刊成。計四十卷一百二十石。時山神夜凡三吼。崖谷忽生香樹三十株。山神夜吼起讚歎。丹崖遍茁香林香。成茲偉觀願力大。思

奇事創動無疆。僧徒力罄廣節使。般若繼勒時中唐。（元和間幽州節度使劉繼續刊大般若經八十卷。二百四十石。）太平（遼聖宗紀年）清寧（遼興宗紀年）十餘載。華嚴寶積紛金裝。四大部經功告訖。昭示百代何輝煌。（二宗共刊成華嚴經四十卷。二百四十石。寶積經一百二十卷。三百六十石。）綜凡二千七百三十石。偉哉郁羅羅天閻。分藏七洞錮以鉄。不許六丁下取將。震方首出安且固。坤維土燥尤堅剛。繼開西南二洞納續剎。帝運弗遠禪門達。通理上人最瓌璋。四百二卷增宏揚。雕鏤雖不逮全藏。後有來者知難量。一千餘載功不匱。八千餘石書尤良。俗儒駭汗嗟日短。始歎佛力眞汪洋。一事貫穿無量劫。不知世界經滄桑。邇來秦西兵酷烈。科學罅裂猶披狂。歐人東渡尋法乳。欲丐瓊瀝療羸尪。茲洞宜扁肅典守。陳列都市資推詳。編排甲乙明次第。模拓直至西海鄉。人持一偈迴向善。頓轉火石成清涼。胡爲荒岡永蘊翳。渴堯未許承天漿。因緣時節會有數。茲事體大非尋常。回叩石佛容寂默。（聲輪洞右石佛。鑪台供桌。咸以石爲之。）兀坐無言古洞旁。瞻相慈悲羣自失。蓮花四壁騰芬芳。過去千佛皆一相。白石鑿柱黃金鑲。（洞

有。四。白。石。柱。勒。佛。像。千。餘。雕。刻。甚。精。更。上。五。台。豁。神。宇。和。鈴。寶。塔。翔。鳳。皇。頂。有。五。小。峯。俗。呼。爲。小。五。台。立。小。白。石。塔。五。唐。金。仙。公。主。造。今。存。其。二。金。仙。公。主。渺。何。許。檀。施。會。藉。皇。家。莊。公。主。碑。記。此。鄉。皆。其。賜。莊。當。時。與。僧。寮。皆。賴。之。儲。亭。八。角。欲。飛。去。晒。台。百。丈。廣。且。強。有。曝。經。台。百。步。許。東。西。兩。略。包。蘭。若。俗。傳。東。盛。則。西。廢。兩。寺。不。能。並。立。盛。衰。更。迭。遙。相。望。中。天。五。雲。凌。空。上。大。梵。帝。釋。來。翔。翔。天。龍。八。部。四。翊。衛。茲。乃。大。海。眞。津。梁。我。佛。何。嘗。說。一。字。琅。籤。玉。笈。森。周。防。棗。梨。蓮。盡。始。出。世。陀。羅。妙。顯。無。盡。藏。光。明。曄。曄。照。大。地。四。生。咸。許。登。慈。航。五。洲。第。一。偉。雕。刻。歐。風。墨。雨。毋。毀。傷。他。生。會。許。重。來。拜。嘉。石。山。平。海。竭。森。然。萬。偈。排。青。蒼。

唐生福臨來虛一室求皈依彌陀因爲七古贈之

曾萬祺

唐生本是上上機。怪來虛室求皈依。我常求我了不得。能皈所皈孰是非。男兒立志猛如虎。俗禮僧儀吾何取。機緣湊合非偶然。喚起無始以來迷失之眞主。唐生唐生善男子。應將慧眼照生死。四大虛幻本無常。回心三皈破天荒。稽首調御大師足。攝收願放無

量光。

送謝生楚俊歸侍母病七古一章

曾萬祺

我生多病復多情。兩耳不惜別離聲。謝生此別尤難忍。叮嚀行行重行行。歸侍母病亦孝子。天倫之大孰過此。願君奉母慎爾躬。願君化母學大雄。狂心送爾故園去。雞鳴晨風天正曙。

都梁學佛同人歌

大圓

袁子（開純）維摩安禪久。大圓聞之九域走。梯山航海不辭勞。一句彌陀念上口。歸來講道向空山。顏曾紛紛爭叩關。爲說西來無生法。飛揚志氣猶未刪。無得（唐名楚山）刷印獨能工。因緣刻經聞吾風。忽發自利利他願。舉家皈心事大雄。樂玄（曾名萬祺）才大不可羈。聞說念佛頗驚奇。丈室曾作千百問。蕩子歸家始不疑。願西（蕭名左卿）往亦號勇健。扶搖九萬無顧戀。夙昔因種菩提深。緣以師友便稱善。德醒（唐名應機）本自積厚光。未經誘勸悟非常。又能實行菩薩道。虔親歸佛擬淨藏。拙凡（唐名守

駿)服膺朱程道。謗佛亦曾起顛倒。一夜看徧安士書。豁然貫通非草草。功欽(李名策勳)聞法雖較後。一聞便能斷肉酒。邇來獲與數子游。接引青年現千手。大醒(蕭名寂成)猶有梁武風。知交達摩或誌公。法輪方轉旭日紅。笑埃(潘名合壬)慷慨氣尤豪。殺賊山谷搗其巢。上馬接戰不目逃。一念彌陀放屠刀。力禪(蕭名無方)多智能雄辨。少入橫舍精操練。潦倒幾度鼓盆歌。從迷至悟屢經變。漸達(唐名蔚龍)嗜歡頗逃禪。有時結社預白蓮。公然幸福過陶潛。

閒居放歌

大圓

我雖名大圓。其實似大顛。震威一喝韓退之。使其兩耳聾三天。且持雲門金剛棒。打盡世間野狐禪。非常非斷亦非我。獨往獨來仙乎仙。虛空粉碎無一事。十方三際任盤旋。既不住中道。亦不落二邊。搬柴運水大神通。飢來即食倦來眠。有時讀書破萬卷。有時作文盈千篇。手拈椽筆怒生花。諸子百家任驅鞭。南探禹穴適吳越。北登廣武窮幽燕。歸來掩關百無爲。振衣趺坐萬山巔。大機大用有如此。嗟爾井蛙夏蟲輩。安知方便與善權。

治病

吾人學佛如治病。貪瞋癡愛無明行。無始以來業障多。依方診治在對症。佛有八萬四千方。桂附苓連各相當。愚者誤用致天札。大醫得之壽而康。霍然病已藥亦除。消滅煩惱卽真如。親見本來娘生面。何用素問與靈樞。

大 圓

人心

大 圓

世人心險如海水。直下千丈難見底。心高猶如須彌山。取盡珍寶猶自貪。可憐險高亦往苦。害人自害路可覩。商鞅法網密如林。出逃却爲逆旅阻。始皇焚書且坑儒。長城萬里定遠圖。誰知思生肘腋下。揭竿斬木盡愚夫。世事茫茫難可測。自私自利終差忒。惟有如來菩提心。恆順衆生總隨緣。我法二空猶自得。

空空吟

大 圓

泰山無撮土。東海無滴水。世界國家與政治。空華開落只如此。花開舉世逐如蜂。花落盡作可憐蟲。孰知不惟此花不可得。直至當前虛空亦是空。

日本大地震

大圓

龍伯國人大且豪。釣竿一舉連六鰲。岱輿員嶠忽失馭。神仙紛紛墮洪濤。當時人天泣如雨。野火焚燒海潮怒。昔日莊嚴剎那空。始歎世間無常苦。

巫山高

大圓

巫山高。高不可極。高人更在巫山北。玉骨冰肌錦繡心。應身從余學唯識。敏而好學不可當。舉一反三號智囊。熏習多聞近半載。蓮池海會無量光。忽忽宿業動欲飛。式微式微胡不歸。金鷲馳驅蜀道難。微音猶戀首陽薇。流光如駛何堪說。已秋願夏心如結。人言行苦愛別離。我謂諸法空一切。

大圓歌

大圓

君不見北溟有魚名爲鯢。化而爲鳥名爲鵬。一舉扶搖九萬里。隨名顯相不可憑。大圓云何大。亦復何所圓。莽莽瀉蕩無邊際。只向十方世界打蓮團。大圓本非圓。亦復未始大。會將利海安毫端。時擊須彌藏一芥。大通智勝佛。十劫坐道場。我時手植菩提樹。親見

古佛放毫光。威音王以前。父母未生我。八相成道轉法輪。已證無上菩提果。古佛今佛。紛紛大圓隨。將一口吞。笑他世上煩惱輩。空勞七日鑿渾沌。

讀海潮音唐大圓居士日災感事七古次均和之

湘潭段瑞翔

蓬萊天近雲飛黑。海嘯風狂地崩裂。疇人失算官司荒。繁華都會付傾側。呼號駭怪頃刻間。富貴貧窮分不得。千古神州嘆陸沈。如此頓昏更傷盡。人言浩劫天所遺。電掣霆馳世年值。如火益熱水日深。滔天勢欲吞人國。可憐龍蛇起陸時。山海異勢忽崩劣。從來飽煖輕他人。此日無處更乞食。海潮音傳感事詩。唐子歌之動悱惻。者番鼓盪示鍼砭。海靈一試回天力。

迥荒郊感賦

悅 安

我佛慣說無生法。畢端無生是有生。極目荒原千里外。幾重衰草覆幽魂。塊塊白骨成灰土。處處蟲聲發苦吟。我看人生俱是客。何必客裏論主賓。石火電光明忽滅。夢幻泡影假和真。深愁黯黯埋黃壤。舊恨悠悠多古項。我欲悼人還自悼。誰向如來一問津。

海島春愁詠

憲伯許崇文

昨宵蓬島散春風。十萬櫻花轉醉紅。等是有家歸未得。愁人酩酊玉壺中。海天浩渺
 愁如沐。婉轉清歌誰度曲。頓教胸次不平鳴。譜入哀絲與豪竹。六朝裙屐映朱霞。座上蓬
 鬆鬢欲鴉。幾番料峭風如剪。剪出愁思滾落花。十洲留得棠蔭住。金谷芳華豔如許。紅樓
 霧裏訴胡笳。似感流光隨逝水。年年花事記闌珊。况溷風塵羈旅邸。安得春常不老花常
 存。人世永無遺憾矣。君不見我佛衆生泡影看。吾人富貴浮雲視。入世何如出世歎。消愁
 且藉無生旨。

空城鳥（哀饑民也）

燕咫尺

甲乙之際。蜀中大饑。人相食。四方童孩。失撫。匍匐赴淪。就食者數千人。鄉人寫翼見
 示作空城鳥以哀之。

空城鳥。空城鳥。一城頭。白生九籬。稻梁自謀。蓋不足。老鳥餓死。雛亦孤。弱羽飛飛。不
 能遠。鷓鴣有母。鳥獨無。華屋鸚鵡。笑相語。紅豆大如。詰多珠。半作人言。半禽言。人呼我哥。

鳥何如。鳥有區區心。頗與羣鳥殊。三年不雨蜀地赤。陳陳餓殍填康衢。渴飲其血肌啄肉。詎不暫潤枯腸枯。私念老鳥絕黍粟。稿臥原野與衆俱。飲人自肥義不忍。反哺未報心煩紆。啞啞啼夜夜。呼老鳥死去何時蘇。母子忍飢同巢居。吁嗟乎。空城鳥。

游雙峯山放歌

譚道

去年禮佛到雲山。山在千巖萬壑間。七十二峯俱奇絕。層巒聳翠邈難攀。又聞托坪禪院好。悔客都梁游不早。倚裳聯袂十里遙。遙見雙峯緊相抱。是時天朗氣復清。雜花生樹鳥飛鳴。黃犬有情臥搖尾。衆生見我喜逢迎。須臾隨喜藏經樓。渺渺平疇滿目收。無心紅雲時出岫。迤邐長江水自流。偌大宗門久寂寞。一朝恢復舊樓閣。愧予未了俗因緣。空向夢中尋極樂。欲除浩劫仗慈悲。對此茫茫有所思。英雄末路多禪悅。大廈原非一木支。

閩南佛學院開學詞

圖 瑛

五老峯高勢插天。鷺江之水清且漣。鍾靈毓秀產英賢。中有導師號會泉。痛心大教垂危顛。續佛慧命任仔肩。常惺法將駕願船。泛入海濱更有緣。同運智悲啓法筵。龍象蹴

踏襟裾聯。從師求學志彌堅。勇銳精進氣無前。徧學性相諸真詮。自利利他方宏傳。中天
慧日永孤圓。光明普照於大千。願佛法儘萬斯年。

夢覺歌

妙空

如來教法等金剛。強權威力莫能傷。人天欽敬世明炬。獅子一吼羣獸藏。雄長五印
數萬里。金人入夢來漢疆。流傳兩千有餘歲。昔日魔願今來償。昔佛將入涅槃。有魔王
曾發心願。待末法時令其眷屬爲佛弟子。不行佛事。破壞佛法。衣佛衣。食佛食。浪子其
心盜賊腸。外道來侵逼。政客復相戕。無上大法如瓦霜。綿綿一息尙未亡。有真佛子淚汪
洋。甘身犧牲若怒螳。安得大心之士起四方。同揮鐵血勤法王。掃盡蕭牆禍。外患自回銜。
獅子窟內無野干。指日便見華嚴場。

暮春感懷

唐大定

我本閒散人。攜友偶游竹水濱。溪邊草綠柳陰新。此詩感歎已暮春。凱風自南蕩微
波。滿地繽紛落花多。花落花開年相似。人生那得比如是。君不見古墓今人鋤爲田。江風

山月似昔年。乃知人生總幻夢。功名富貴亦徒然。但願有錢買奇書。常開萬卷對春妍。

懷淨土歌

覺華道人

西方極樂清淨鄉。下視苦海何茫茫。一從別後不知劫。彌陀與我如相忘。十萬億程寥且闊。本是我家歸未得。輪迴逆旅徧娑婆。醉死夢生行路別。今生幸遇釋迦文。修多羅藏聞香熏。開我迷雲出慧日。瞭如掌上觀螺紋。八功德水蓮池會。大地金剛持不退。經行寶樹鳥和鳴。坐臥瓊樓花亂墮。佛身無量色黃金。相好光明注一心。精進果如親得勢。慈悲何異友觀音。信知此境人人具。看似尋常最奇異。總爲臨行一念差。無限風波起平地。得來毫不費多功。返照回光道不窮。流水下來終向上。夕陽西去始從東。或疑補處輪兜率。安居勝妙嫌耽閣。豈知離欲自無爲。不似頑空方有作。自在蓮花自在空。不如歸去喜相逢。无明父母悠然別。絕倒須彌第一峯。（極樂國中無須彌山故云）

贈別蘭若居士

袁智純

蘭若居士天女身。南雍文辯旁無人。忽思三寶歎希有。翩然遙踏都梁塵。都梁蓮社

上華會。歎動人天競梵籟。大圓關。士今老龐。廣長舌相覆。無外何來。幻息焚雙睛。名場奪
幟。誇英英。隨緣欲了逢場戲。夢魂昔昔江南城。秋清木落東行道。臨發索言慰奇抱。區區
離合未足云。雖然胡得太草草。一事問君博君娛。當直酬我勿含胡。頭銜不易摩尼珠。此
意果君本意無。我聞清淨體彌布。君行非行住非住。他時轉念不唐山。六通早證神通步。

畫扇自題

李隱塵

水迢迢兮山嶢嶢。中有人兮吹碧簫。問君何有兮。一簞一瓢。問君何業兮。半漁半樵。
寄此身於寥廓兮。卷獨步而逍遙。慨世人之夢夢兮。但知寶乎瓊瑤。曷不觀諸此畫圖兮。
渾空色於白描。終誰有而誰無兮。鑿海市與江潮。問十二萬年之浩劫兮。天地亦覺其搖。
搖。羨君之潛形於此中兮。終古遠乎塵囂。倘閱寒暑而忽委諸灰燼兮。更羽化而飄飄。人
間之執扇何止千億兮。但得有此山水。卽化形而據之以爲巢。

東崖容虛和尙在化城。翹辦九華佛學院。寄葦雨法師亦與有力。聘來教授山

中觸目心傷感成長句

紅葉居士

中原茫茫白日下。雲如車兮風如馬。生天成佛病未能。留此隙地容勞者。四面青蓮顛倒開。謫仙應笑我遲來。○（山中有太白書堂）長水宗風消歇盡。帝子空餘拜經台。○台卽天台岸下卽地藏。王拜經處也。○千年老屋鳴飢鼠。松柏含冤竹訴苦。莊嚴氣盡廢不脩。搔首蒼茫徒延佇。衆醉慵抬醒眼看。側身西望淚闌干。撞鐘伐鼓吾儕事。法雨天花飛講壇。嗚呼桑梓必敬止。雲輝勝地賴諸子。午夜時聞念佛聲。未能終聽淚如雨。世世間雨茫然。震且狂禪乃如此。雲巖海玉皆不作。○（二老皆此山古德）遂令丹陛生荆杞。挑江而後誰仔肩。一邱一壑都蒙恥。昔人畫道九華奇。第一名豈偶然耳。氣薄林昏夏亦秋。驕陽不奈綠陰稠。閑花野草無量數。梵唱鐘聲亂羈愁。夢裏伴狂忍去國。少陵野老吞聲客。○當此萬方多難時。我亦有狂忍去國。少陵野老吞聲客。○當此萬方多難時。我亦有家歸未得。九十九峯青可憐。長嘯一聲山月白。

題禪門風味圖呈證能師

妙香

佛二九五六年大勢至菩薩誕日。果容師姊奉證能我師命。以素有小品見賜。其味

之甘美。草可名狀。爰置斯圖。聊以誌感。竊維脩行之道。以出家爲最方便有益。殊勝微妙之處。難于曆舉。香深慕出家。異常欣羨。以爲以女子身得度爲尼。誠人生莫大幸福。但不知何日方得成就機緣。剷除雲鬢。而現比丘尼相。如我素志。我師慈悲。定有以教我。

嘗見屠宰豕。豕號如哀哭。殺生佛所戒。孔亦鄙食肉。園珍良鮮美。食但求果腹。禪門風味好。正法最超卓。人生本如夢。愁苦日煎逐。萬事皆虛空。黃梁應早覺。安得剃度蓮臺下。來作如來親眷屬。捨身學佛爲大孝。修行之益真且篤。報答四恩了生死。自度度人出塵濁。慧劍斬斷煩惱根。永離火宅脫桎梏。披緇落髮飯三寶。無上高貴無上福。袈裟爛爛頂圓光。實相莊嚴殊凡俗。師弟因緣萍水合。志趣相同勝骨肉。安閒自在念彌陀。世間無如出家樂。我若如願得爲尼。此生千足與萬足。

三 五言律詩

送太虛歸西湖

慧 心

舉世氣皆墨。逢師眼忽青。漢江三閱月。天際一明星。瑞應通兜率。餘波撼洞庭。乘生同夢夢。未忍獨爲醒。

陳子魁吾黨。風塵獨識師。色身期盡此。濁世復何之。微雨江船暮。長天旅雁遲。西湖春意早。悵望意踟蹰。

題碧摩崖

睡 齋

秋風公主塔。寒日秘魔庵。一石無人我。三生悟俗凡。雲霞摩洞北。河水落天南。古木勸禽返。遙遙向佛參。（對嶺陡絕有向這裏看四字內供石佛象）

雨漲還磨子山新居

前 人

碧嶺常當牖。河流忽到村。矮垣侵野色。積雨長春痕。網急魚先避。柯喬鳥自尊。飛潛各真性。吾道復何言。

次均和易仙城見贈

前人

雨氣亘天黯。雲痕東嶺涼。頭陀獨高誼。游客忘他鄉。禪意離言句。根光澹色香。我人兼猛渡。塵海約飛航。

和僧度法師陪峙雲居士游湖山

太虛

峯迴摩詰影。湖映燦迦心。春色了無住。風光祇卽今。亂紅看似織。瘦綠欲成陰。策杖探幽悶。入山深復深。

八苦詩

孫道脩

我厭娑婆苦。中陰安有身。受生皆不淨。爭氣總相因。逐逐尋皮袋。昏昏困識神。無明迷一念。歷劫恨沈淪。(生)

我厭娑婆苦。新新異滅遷。忽焉驚老醜。瞥爾過童年。哀樂催衰朽。牽纏順業緣。無常

終不悟。堪忍亦堪憐。（老）

我厭娑婆苦。難將四大調。火風方熾盛。地水又沈銷。枕畔呻吟語。針砭錯雜招。贅癆終不久。業力怎能消。（病）

我厭娑婆苦。臨終報盡時。冤親皆畢現。善惡渺難知。回首家何在。驚心業自隨。何如開覺路。一念到蓮池。（死）

我厭娑婆苦。難將慾壑填。鑽營常落後。棋著失人先。動作皆違願。干求枉乞憐。翻將如意寶。沈沒在深淵。（求不得）

我厭娑婆苦。冤親兩不容。睚眦皆必報。狹路忽相逢。總爲仇讎結。難平塊磊胸。生生還世世。夙業每相從。（冤憎會）

我厭娑婆苦。重重愛染貪。團圓妻子樂。爭取利名酣。盈滿天公忌。高明鬼瞰愁。生離同死別。拋捨怎生甘。（愛別離）

我厭娑婆苦。牢牢結五陰。現行方放下。業識又相尋。逼迫形神急。沈淪生死深。迷頭

還認影。執取肉團心。(五陰盛)

曩在滬研佛理。苦不能深入。輒誦小阿彌陀經。以引興味。余之得潛心大乘。歷久不懈。彌陀力也。持是經已週歲。紀之以詩。 寶蓮華畫主

腦海昏疲候。陀經啓睡眸。真同萬國曉。(東坡詩)口誦南無阿彌陀。如日出地萬國曉。不覺一年周。譯聖文章老。迦尊讚歎稠。白毫兼紺目。展覲已神游。

重九游破山寺

搏夫

齊梁遺勝蹟。萬古此叢林。龍澗水流急。佛幢雲護深。風高祛俗慮。嶺靜悟禪心。欲究華嚴義。時聞空谷音。

游洪山卽景

太虛

小駐龍華寺。(路過龍華寺小住一時再往洪山)驅車向寶通。深深重見塔。寂寂一聞鐘。石磴苔猶綠。霜林楓正紅。登高成遠望。江漢欲浮空。

隱塵和韻

攝盡楞嚴旨。歸元路路通。浮漚休認海。閉性豈因鐘。天外月初白。樓頭塵尚紅。安排侍錫杖。隨處悟真空。

漢水滔滔去。東西海水通。江城一玉笛。塵刹幾晨鐘。芳草無情綠。斜陽有限紅。娑婆同大夢。畢竟是誰空。

劍農和韻

吾師飛錫處。示我以圓通。覺性真如海。法音警世鐘。月瑩三界白。佛坐一鐙紅。鎮日蒲團上。心虛似太空。

悟得楞嚴旨。菩提路可通。榮枯成夢境。斷續響晨鐘。葉落霜飛白。經書血漬紅。塵勞何日淨。寂照徧虛空。

孫山和韻

隨錫參蘭若。禪關曲徑通。舉眸方見塔。入耳更聞鐘。秋草餘殘碧。霜楓鬥晚紅。凝神觀物變。默契證心空。

盧鎮常和韻

策杖洪山麓。幽林曲徑通。塔搖千尺影。夢破一聲鐘。香篆烟浮碧。燈傳火正紅。蒙師開覺路。五蘊照空空。

靜波和尙住持清涼。既頒龍藏。復崇象設。蓋披忍辱鏡。處法空座者。贈以伽陀之章。用表屬提之德。

八指頭陀遺著

我獨知師意。人皆目汝狂。心光能自照。口語未爲妨。忍草經霜勁。禪花過雨香。炎威空作態。一念頓清涼。

春夜與樊雲門夏武夷哭庵聯句

浮杯渡滄海。忽與故人逢。(八指)談話一燈雪。枯禪萬木冬。(樊山)養生同澤雉。高誼逐雲龍。(武夷)髣髴寒山寺。來聽夜半鐘。(哭庵)

聞金陵城破梅庵死難及來滬則已黃冠爲道士矣

人海事難言。風濤大地翻。昨朝哭君死。今日喜君存。暫對真疑夢。驚看真是魂。黃冠

歸故里。何不入繙門。

西園放生池觀魚

西園戒幢寺。池上偶閒行。頗覺羣魚樂。同游一水清。臨淵吾無羨。洗鉢爾休驚。他日成龍去。毋忘此放生。

曼衍道人以詩見貽次韻奉酬

春樹團新翠。流鶯弄曉音。山如睡虎醒。海作啞龍吟。老衲來越嶠。騷人貽楚琛。如攜碧湖月。照我綠蘿心。

附原韻 喜敬安上人自天童至

陳三立

吃僧狎蛟海。自抱鐘聲音。冷月浸趺坐。乾風吹夜吟。翦魂落島嶼。捧記抽天琛。悲涕了初地。湛湛無漏心。

寶華別德寬律師下山二首

八指頭陀

兩宿慧居寺。清言得未曾。道心堅似石。戒律皎如冰。久卓誌公錫。單傳見祖燈。高山

聊仰止。又下碧嶮嶒。

禮別千華佛。無言淚自零。經過黃葉嶺。廻望白雲亭。（黃葉嶺名白雲亭類）魔事何紛擾。勞生此暫停。春風無限意。處處柳爭青。

聞故人秦子質來滬。忽於夢中見之。即得二詩。醒而錄之以志神交。

前人

國破僅身存。驚看帶淚痕。豈徒人事改。亦覺地天翻。正理知仍在。浮生休更論。心安即避世。不必入桃源。

此地春申浦。相逢已十年。滄桑今變矣。身世更茫然。欲入四禪定。其如百感煎。袈裟所漬淚。俱是哭人天。

游端州觀音巖

馮振

七星本名勝。此地特奇妍。山別幽明路。洞穿南北天。（巖內有明暗二洞。暗洞尙有水。須冬月始能游。）枯藤攀石立。野鶴對人眠。若欲尋遺蹟。殘碑滿道邊。

游嶽麓山

太 虛

時勢造雄鬼。干戈泣賸氓。初欣息塵擾。便作入山行。尙有林泉趣。微存佛火明。虎岑堂寂寂。來覓大蟲聲。

掛席江上夜往鼎湖

馮 振

日落碧流暮。孤帆天際行。涼風吹雁急。秋月墜江明。自有尋山興。難甘懷土情。明朝鼎湖上。潭水照心清。

次蘭陔居士靜室落成句

石 琴

極西何處是。只在此心間。遂妄塵成劫。無空佛亦頑。輪迴終古誤。名相一齊刪。我愛陳夫子。潛修早息關。

酬宜昌崑山春圃二老

前 人

此老婆婆甚。馳書到冷官。詩懷清有味。文思浩如瀾。屢盼高車駕。橫摩大將壇。山中無所祝。兩字問平安。

罷讀儒書後。持名拜梵王。戒雷驚噩夢。法雨蕩羣官。熟視人天劫。時聞微妙香。願揚清靜海。飛灑遍遐方。

晚泊湘江

解凡

久作天涯客。風塵改舊顏。扁舟浮楚水。夜夢繞吳山。過雁排空遠。閒雲時往還。驚聞望鄉曲。爲感鬢毛斑。

書感

石琴

萬籟原何作。龍飛浪接天。垂綸看鵝蚌。折戟笑樓船。怒髮將軍去。歌虞霸業捐。伏尸桑梓慘。弔古百憂煎。日夕千山斂。鐘聲萬戶咽。身如庭樹兀。書恐驛梅傳。得句常敲月。尋幽每涉川。任他弓虎說。守我不言禪。

讚嘆般若四十言呈裕如人菴兩善知識

希聲

證實微言絕。談空戲論多。有情天亦老。無法意如何。說佛原非佛。離魔卽是魔。要知般若力。深妙在摩訶。

希聲居士作讚嘆般若詩見寄謹依均奉答兼示琴堂裕如兩居士

人 菴

江河流澤遠。日月照人多。菩薩心如此。凡夫意若何。離言觀實相。有道化空魔。大火聚難喻。終須被佛訶。

挽靈鷲寺允西法師

南 萍

三年曾兩見。一別竟千秋。師已登蓮去。我還作梗留。宗風吳地冷。落日古江愁。禪德今安仰。難禁涕泗流。（師于辛酉春預示生西時日足見其平日念佛確有實驗云）

送歸元師如益陽白鹿寺講經

空 也

送子當三月。春風習習來。天花飛白鹿。衣鉢繼黃梅。資水心心印。嶽雲面面開。狂瀾今待挽。努力莫徘徊。

壬戌六月三伏日與會中守巖智三智常觀空嚴定性修雪童梵鑑諸子之武

昌佛學院次日過新堤舟中極熱詩以遣之

空 也

昨夜三湘別。新堤今又離。一輪拖日走。兩岸任波移。莫逐炎涼轉。唯當定慧持。性空真火遍。無喜亦無悲。

爲智信上人舉火書感

太虛

衡嶽全身露。師出家南嶽。漢江一口吞。今歿武昌。質灰靈不滅。骨碎願猶存。太白前塵影。予初識師於太白山。南屏昨夢痕。師助予主淨慈甚力。法門秋色晚。獨坐悵黃昏。

和太虛法師嶽遊麓用原韻

喚滄

不盡蒼茫感。欣聞正始音。同來清淨域。悟得妙明心。禮塔尋阿育。吹香度樹陰。最高峯上立。翹首看行雲。

浩劫何人造。層崖見子岷。禹碑蝌蚪篆。石屋鱗蛇行。擊磬四山定。燃燈一綫明。六朝松不見。歸鶴誤濤聲。

五十生日過沙市口占四偈錄三

李開侁

五十殊非少。年華半百更。知非慚伯玉。覺是笑淵明。碓米春難熟。潭波攪未清。何時歸見父。除糞亦心傾。

五十殊非老。憑闌氣尙雄。敢從赤松子。猶是黑頭公。窮露摩尼白。慈雲火宅紅。衆生方有待。莫墮涅槃中。

五十定何物。憑誰計始終。心房本清淨。世界等虛空。延促維摩顯。循環邵子通。阿僧祇自有一念已圓融。

四十生辰適在先兄慧谷公葬後旬日集句述懷兼以哭之

慧密居士

四十明朝過。(杜子美)良辰難再追。(錢起)曾爲鷓鴣賦。(劉禹錫)深負鶴
 鴿詩。(杜甫)春盡有歸日。(劉威)水分無合時。(孟郊)茫茫江漢上。(劉長卿)
 川逝共悽其。(皎然)

壬戌臘八前二日與沙市諸淨友同游章華寺遇雪喜賦一律兼呈淨月上人

古寺白雲裏。驅車出市東。千秋寫勝蹟。一步醒晨鐘。客盡龐居士。僧逢晉遠公。晚來天雨雪。身在琉璃中。

慧密

雪中自章華歸次劍公均

慧音

茫茫風雪裏。不辨路西東。回首江邊寺。如聞夜半鐘。尖叉鬪蘇子。形影答陶公。明日驅車去。同游玉宇中。

游章華寺步石琴劍農兩公均

寶常

探梅來古寺。信步過橋東。樹密通幽徑。天空響暮鐘。山林捐萬慮。彝鼎薄三公。雪偶因風舞。圓機在此中。

座喜名流聚。清談竹苑東。階盈三尺雪。夢破一聲鐘。質相空諸相。陶公慕遠公。拈花同一笑。默契不言中。

敬步劍農道友元均

妄清

記得傳心法。浮葦度海東。衆生方火宅。醒世有金鐘。我欲空諸相。人皆亡是公。風前一片雪。落在紅爐中。

敬步慧密居士章華寺元均

止因

齋僧來古寺。攜杖過橋東。本是風塵客。忽聞雪夜鐘。談經邀淨友。說法有生公。願此同游者。圓光普照中。

步劍公游章華守韻

饑 疚

莫認月爲指。分明西作東。驅車來古剎。隔岸響清鐘。賣卜嚴高士。食針羅什公。相逢同一笑。履雪滿途中。

本來無可說。趺坐小樓東。念念彌陀佛。聲聲午夜鐘。論詩服賈島。帶解憶坡公。但願歸安養。蓮開淨域中。

謹步劍公原韻

季 漁

古寺深林隱。游人馬首東。雪飛茅店路。風送暮村鐘。居士懷摩詰。高僧訪誌公。因緣

香火結愧未在其中。

次劍公游章華寺元韻

劉文鼎

禪關何處是指點暮雲東。木落喧歸鳥。泉聲咽晚鐘。清游迴俗客。玉戲關天公。曾與
採花約。詩情驢背中。

石琴兄用予均賦圍爐夜話詩依均和之

慧密

扁舟一葉穩。高唱大江東。古渡餘殘雪。深山響暮鐘。傷心悲往事。搔首問天公。塵擾
何時盡。乾坤寂照中。

劍公招齋香林寺步元均奉

慧音

臘八忽忽過。冰寒水不東。爲餐香積飯。來聽夕陽鐘。明月幾蘇老。清風一謝公。歸來
身是夢。縹緲白雲中。

劍農先生以四十初度感懷詩見示次均奉和

余鼎臣

春入新年好。詩因初度成。如麻皇攬句。俱見友於情。世事萬千變。月光三五盈。渡江

看釋柳。物候使人驚。

目下潮流急。先生尙古風。百年猶過隙。四大早觀空。棠棣詩堪續。梅花曲未終。鬢髮多彥士。健者孰如公。

石琴劍農兩公歲杪來沙歡聚旬日樂不可支別後依依輯唐句奉懷

李寶常

禪外求詩妙。齊己詩從靜境生。齊己無妨隱朝市。白居易何必住蓬瀛。李義山映篠多幽趣。李牧看山愜野情。李嘉祐賴君時訪宿。姚合心迹喜雙清。杜甫

不得多時住。任翻詩成墨未乾。陸龜蒙結交淡若水。杜淹求友得如蘭。呂溫離別無嫌遠。高適窮通亦自寬。貫休明朝掛帆去。李白琴調對誰彈。李中

自守陳藩榻。張九齡重修靖節居。王貞白從僧乞淨水。姚合留客愧

家蔬。(劉長卿)座養冲天鶴。(王維)池潛縱壑魚。(李嶠)短長終不校。(韓愈)世道復何如。(張蠟)

落日心猶壯。(杜甫)臨風思渺然。(鄭士元)去留那有着。(崔塗)行住不妨禪。(李嘉祐)再會知何處。(王穀)重來又隔年。(周賀)此時相望久。(元稹)香火有因緣。(劉禹錫)

劍農老弟四十初度輯唐句述懷依均奉酬

李寶常

壯志年年減。(李端)新篇日日成。(白居易)推遷悲往事。(元稹)流浪識交情。(盧綸)尋覓詩章在。(白居易)蒼茫別思盈。(裴度)禪心如可學。(許渾)寵辱詎相驚。(岑文本)

曉角驚眠起。(姚合)春風送臘來。(蕭遘)多愁雙鬢改。(奚賈)惟感二毛催。(李高阮)北闕心常戀。(杜甫)南禽聲例哀。(劉禹錫)獨歌還太息。(張說)天眼幾時回。(薛逢)

人生固有命。(陳子昂) 逝者已難追。(姚合) 市隱何妨道。(皎然) 禪餘肯廢詩。(朱慶餘) 每逢芳草處。(于武陵) 倍憶故園時。(岑參) 默坐同誰語。(林寬) 君心我獨知。(崔峒)

寒盡鴻先去。(張叔卿) 天晴鶴唳風。(姚合) 千家看露濕。(張南史) 萬象寫秋空。(姚合) 兵革身將老。(杜甫) 江湖意已終。(戴叔倫) 我心還不淺。(李白) 桑下問龐公。(鄭錫)

依韵集唐句奉酬李寄塵二兄

慧 密

江上江陵城。(白居易) 陽和節氣生。(裴度) 有期追永遠。(白居易) 此處勝蓬瀛。(方干) 話盡山中事。(李昌符) 言尋物外情。(駱賓王) 東林初結社。(皇甫冉) 過郢興彌清。(錢起)

數畝東泉宅。(耿章) 花繁路未乾。(劉禹錫) 主人得幽石。(楊巨源) 君子即芳蘭。(盧綸) 悟色身無染。(張祐) 登樓景又寬。(許棠) 雲標金闕迥。(杜審言)

松響舜絃彈。(劉憲)

應笑風塵客。(張籍) 五嶽曾遍居。(王維) 自臨江上鶴。(錢起) 惟食園中蔬。
(賈島) 佩德潛書帶。(白居易) 避網甚跳魚。(崔備) 流年看共老。(司空曙) 回首意如何。(李白)

同歡不可再。(錢起) 把臂共潯然。(韋超) 四海猶多難。(杜甫) 一心惟趣禪。
(顏真卿) 城烏驚畫角。(白居易) 隋柳布新年。(劉禹錫) 別後如相問。(李端)
脩持香火緣。(李嘉祐)

送元白道長之北平

慧密

迢遞京華道。一車載客行。臨歧難作別。多難獨長征。覺路開先導。迷津度有情。陽關一曲罷。風雨助離聲。

悼智信上人次——虛師均

慧音

識得西來意。須彌氣可吞。法身全體現。幻質幾人存。塔露圓中影。灰留劫後痕。含愁

弔江漢。不覺近黃昏。

寄贈傅子揚團長

慧密

傅子玄風遼。山高水復長。法身一顯露。火宅頓清涼。不見如三月。相思供瓣香。道場隨處是。離別亦何傷。

寄傅子揚團長步劍農居士均

慧音

悵望彝陵道。江流一線長。思君若冰雪。飲我以清涼。蓮幕千家暖。梅花萬樹香。何時叨喝棒。機教兩無傷。

寄陳贊亭營長步劍農居士均

前人

爭道太邱賢。家居古薊燕。來參般若會。同有瓣香緣。五百人成道。三千舌覆蓮。記當離別日。春信嶺梅先。

游香林寺步石琴先生均

銘三

佛國莊嚴地。登高一望低。守身如守玉。防患甚防堤。紆曲山頭路。澄清水底泥。西方

當下是煩惱卽菩提。

游十方菴步石公韻兼呈劍公

卷九

迢遞南湖路。晴空塔影低。深林藏古寺。殘雪臥平堤。欲淨心如鏡。須防足著泥。圓明當念現。莫漫戀浮提。

步慧音居士游香林寺均兼呈密公

寶常

同訪香林寺。天高白日低。薄雲棲斷岸。衰柳壓長堤。雪滿青山窟。路經赤坂泥。到門清欲絕。塵事有誰提。

喜家少珍兄來署

石琴

久不聞消息。驚從遠道來。渾忘別後事。爲問劫餘灰。竟夕談秋月。離情訴酒杯。(余素持酒戒。爲兄循俗一設。罪過罪過。莫嫌清似佛。詩思共潮回。

晤石琴弟於繡林客次喜而賦之

少珍

幾年不相見。相見轉相疑。豈是池邊草。來尋夢裏詩。對床曾有約。歸路杳無期。何幸

因緣巧。天涯一雁隨。

數語寒暄後。言參佛理微。情天真解脫。心地欲皈依。覺路開今是。迷途悟昨非。衆生皆自在。而我亦忘機。

萬方都一概。客路欲何之。且喜心如鏡。旋驚髮有絲。菊花霜信早。桂影月圓遲。最是銷魂處。明朝又別離。

答李隱塵居士用原均

蛻庵

忽奉飛來簡。方知返故鄉。送行涼月白。惜別暮雲黃。歸計究何屬。征裝亦太忙。臨歧慳一握。使我意皇皇。

蓮社經行處。苦痕憶遠岑。風萍今日事。香火故人心。靈貝分千葉。寒山各一林。因緣無聚散。消息在雷音。

輓淨因老友

慧密

沱水鍾高士。閒居石鼓巔。平生惟愛酒。老去始逃禪。人壽何天促。予心獨慘然。欲知

身後事。有子力桑田。

彌月音書斷。焉知已蓋棺。乍聞疑夢境。久坐入空觀。桃李門前冷。詩書架上殘。杜鵑如有意。啼罷淚欄杆。

憶識荊州日。相逢在古祠。持身稽叔夜。譽我鄭當時。時予年二十餘。先生已五旬矣。生別夢猶見。死離魂到遲。豈歸安養去。凡聖路迷離。

海內交游夥。君情獨弟兄。先生效盛孝。章友孔文舉。故事禁予待。以前輩禮。而以兄弟相稱呼。形容驚老病。親友半枯榮。世事落花舞。遺編照眼明。若逢周子面。指周君海波。應勸學無生。

和高野山真言宗大學教授久保上人元均

顯 蔭

夙植菩提種。今薰般若緣。扶桑瞻道範。伊豆附慈船。走筆抄靈偈。拈花悟妙禪。何時親警歎。問難絳帷前。

師資非遠近。際會有因緣。親受真言印。欣登大願船。一心修衆福。三密貫諸禪。虔學

光斯道。傾誠猊座前。

潮音洞

燕颯村

海水一何怒。千年氣不平。皈依來佛地。澎湃尙雷鳴。縱有蛟龍惡。難傾洞府尊。喧喧巖穴下。泡影任縱橫。

同梅修游惠山二泉亭中道相失

前人

爲愛山成癖。欲從僧買鄰。石床洗松露。池隙聚花塵。霜葉醉於客。泉香清過人。與來君獨往。勝地亦迷津。

天童寺

前人

已識五湖路。還尋雙鏡池。寺有內外万工二池又名雙鏡。雲深行恐誤。僧淡語無奇。冥鶴巢松穩。齋廚飯客遲。舊聞山志好。一買惠休詩。向山僧買寺志一部。

秋江晚眺

太虛

江上一爲眺。江干爭渡喧。日沉帆倒影。潮落岸留痕。楓老丹霞映。波晴白雪翻。薄寒

憶歸去燈火見兩村。

幽寺小憩

花木蔚然處。禪房空氣清。闌開疎影動。脈脈嫩青生。彌喜嵩光淨。微聞流水聲。此間信幽絕。小憩足怡情。

登鶴舒台

一自成仙去。名山鶴有台。白雲迎客至。丹桂傍巖開。鑄此靈奇境。應窮造化才。孤亭秋寂寂。養茗共傾杯。

鼎湖蓮洞

前人

窈窕蓮花洞。溪聲靜裏聽。峯晴雲暮白。地暖草冬青。積翠侵衣冷。回巖帶虎腥。憑闌默然住。無語對山靈。

答鄧爾雅

前人

日月拋人急。風雲入世深。江河空浩渺。山嶽自嶽嶽。佛性不生滅。英雄幾古今。爲憐

天亦老。應有杞憂心。

了公述因

前人

佛身集無盡。證入法華禪。聞性身常住。靈山會儼然。彌陀離念得。極樂自心圓。何必破顏笑。袈裟誇得傳。

琴志樓主

前人

一世驚才大。千山供壯遊。魯連高蹈海。王粲感登樓。瓜卻明州暑。詩吟粵秀秋。匡廬有精舍。歸隱與誰儔。

澹甯道長

前人

吟髭清可數。仙骨幾生修。異地隆鄉誼。珠江厭宦游。忘情參太上。有夢入羅浮。應與梅庵李。同爲第一流。

君木居士

前人

乍見相憐最。深談不覺多。熱情溢顏色。奇語入詩歌。論世餘憂憤。交人慎涅磨。迢迢

一問訊消息近如何。

心微畫哲

前人

妙畫寓至理。華嚴悟法門。獨從色塵界。深究道根源。救世心殊苦。平民說永存。橫流汨天地。憑與息奔騰。

中秋和隱塵院護原韻

前人

萬方正多難。秋月又圓明。忽悟塵勞海。原爲法樂城。大悲來地獄。至德發天聲。翹首瞻空際。無言意自傾。

中秋月夜憶舍弟大西洋道中

皮劍農

雲淨冰輪滿。香飄桂子華。庾樓風送雁。海客夜乘槎。吳越連烽火。江城起暮笳。頻年遭喪亂。骨肉各天涯。

皎皎中秋月。清輝共九州。昔年曾照別。此夕倍增愁。有弟音書隔。思兄涕泗流。歸程屈指計。黑水一杯浮。

廬山雜詩

燕咫尺

東林寺

蓮社何年結。人天此聽鐘。高僧雁門至。歸客虎溪逢。泉脈覘初地。寺有聰明卓錫諸泉。塔陰載一峯。遠公塔在寺西。眼前塵劫在。碑斷紫苔封。唐柳少師碑已斷僅存百餘字。

西林寺

萬里尋師地。寺爲竺曇現所創。其徒慧永自太行尋至江州。因就居焉。名高道俗。尊。免糧秋看牒。寺在宗景德間。有免糧牒。喚虎夜關門。寺初名伏虎菴。以有二虎侍永公故。石鏡原無影。梁武太清中有僧自西域攜影石置寺。常放異光。隋楊廣令王仁壽取去。香泉合有源。寺有香谷。其泉曰香谷泉。二林共風月。人我不須論。寺與虎溪橋相近。

宿海會寺

一徑入蒼翠。松門斜照微。息影初得地。無館亦如歸。寸土蓮花淨。寺門外月池。白蓮甚佳。諸山面目非。寺在五老峯下門上石刻真面目三字。寫經人不見。血化佛光輝。僧普超血書華嚴經八十一卷。

白鹿洞

朝市不容道。空山隣虎狼。閉門松桂老。講席石苔荒。當代幾書院。宋初四大書院。爲白鹿石鼓睢陽岳麓。中原一鹿場。未能投筆去。邱壑意難忘。

棲賢寺

南北山頭瀑。衆流歸一泉。山中七十二泉匯。人棲賢谷。晴空萬雷吼。谷口幾人賢。谷以唐江州刺史李渤住此讀書得名。散帙攤黃葉。清心照玉淵。玉淵去寺百餘武。聲震庭宇。知君讀書處。聲徹詠真天。三十六洞天。廬山爲山靈詠真之天。

歸宗寺

僧家數椽屋。能占一峯奇。瀑響侵樵語。有玉簾泉。雲低染墨池。王羲之守潯

陽舍宅爲寺今墨池猶在。寺田秋稅足。門外沃田萬頃爲南北諸寺所無。塔影夕陽歇。寺後金輪峯有鐵塔。齋罷還炊黍。深山客到遲。

萬杉寺

茲境何閒寂。一僧都未逢。寺僧見客至。大都邀客茶。宴惟萬杉寂。然其靜修者流歟。杉香前院路。宋景德中僧大超植杉萬本寺以此名。今杉林猶茂。雲落上方鐘。寺在慶雲峯下。倚樹窺龍爪。古樹名五爪樟。觀心見佛容。殷勤謝苔蘚。莫爲着塵踪。

宿秀峯寺喜黃龍寺青松上人至夜話

非主亦非客。相逢且說緣。鄉心僧早斷。上人爲吾蜀人。十年不知家事。妙語月初圓。行樂匡山暮。呼龍玉峽眠。去寺百餘武。有青玉峽龍潭諸勝。向來名字好。肯染九州烟。上人出名刺。囑轉黃浦致意劉亞休居士。

五老峯

山自何年老。阿誰初命名。五峯不吾對。三日伴人行。
 (予登大麥社山拊五老峯背下山折而南宿海會次日由海會經白鹿洞至高杉諸寺宿秀峯再由秀峯至棲賢此三日內與五老隨處爲緣似作迎送之狀)歲月看松樹。一魚識杖聲。轉憐讀書客。頭白忘歸程。(白李讀書處在此峯)

上含鄱口小憩歡喜亭至張氏園林

湖水濃於酒。山靈勢欲吞。(含鄱嶺與太乙峯俯臨鄱陽湖峻削喻合作吞湖之勢)中流愁鳥度。絕頂覺身尊。人影活雲樹。茶香出店門。何當起陶令。留我話羲軒。

秋夕觀書有感

梧葉晚蒼蒼。書燈入夜涼。月升山漸白。露瀆草生光。默坐參玄理。頻年客異鄉。飄零原底事。華髮有高堂。

落葉三首

機警

冷落尋常事。枯榮歲一周。飛迴流水岸。舞倦夕陽樓。身世難逃劫。霜風又過秋。可憐

重九後莫問別離愁。

木葉纔微脫。炎涼便不同。秋容惟有菊。晚景尙餘楓。旅雁驚寒至。騷人怨道窮。遷流何倏忽。多事是西風。

搖落隨風發。秋聲帶雨聽。繁華會幾日。寂寞下空庭。莫恨霜猶雪。應憐水上萍。何如山色好。松柏自青青。

閒步階前有作

納安

萬有情何重。諸空影不離。花開花謝外。葉落葉生時。次第難窮數。因緣無盡期。若論新與舊。安別總成癡。

病坐感吟

前人

莫云今異昔。相信釋尊儒。入世徒詩禮。唯心定有無。人微言不貴。秋盡病難蘇。我現衆生相。醫王方自殊。

登靈巖山

燕咫尺

吳越昔多故。溪山能起予。明湖西子鏡。廢苑老僧居。○
（山寺爲館娃宮故址）○
箭影溪流直。○
（山下箭溼直注太湖）○
琴台客到疎。○
（山頂有琴台）○
胥門潮十丈。相對恨何如。

還元閣（玄墓山聖恩寺此閣爲勝）

前人

人語經樓外。湖光樹杪中。竹搖杯酒綠。梅傍定僧紅。○
斜日能催客。高雲不染空。何當分石榻。穩臥北窗風。

與釋氏佈教養成所諸學員茶話偶成

空也

萬法無興廢。扶持貴在人。養成龍象器。示現剎塵身。○
一口吞三藏。四弘化萬民。相期同志士。隻手爲時伸。

送安清開士

懺因

昔忝蘇程戚。新聯主客歡。○
（現設館於居士家得聞佛法大開愚癡）○
交深情義重。聚久別離難。覺路君先達。虛生我敢寬。○
慈航能普渡。回向保平安。

憶得垂髫日。曾聯管鮑盟。雲泥感定果。風鶴嘆時荆。佛化嚴軍紀。居士著有軍人軌範以佛化覺軍人。慈光照衆生。將心託明月。萬里送君行。

玲瓏岩和寄老

太虛

清涼何處覓。寒翠洞中探。苔壁晃金碧。簾岩湛寶藍。靈龍幻奇石。仙鼠穴幽竈。一句超今古。禪宗仰老參。

豐樂亭謁歐陽文忠公像

燕咫尺

地僻來人少。雲陰過雨微。松楸老闕若。禾黍偃荆扉。僧供一碑足。文宗百派歸。從來州刺史。得似此公稀。

獨上大林峯

大醒

獨上大林峯。孤懷興轉濃。九江成一曲。羣嶺疊千重。遠樹雲遮影。寒泉夾石淙。高歌天欲暮。歸聽幾聲鐘。

自嘲

佛心（時年十五）

吾生在凡俗。不慣俗中居。治世慚無術。韜光樂有餘。未明先覺旨。時讀古人書。何日超塵海。優遊意自如。

感懷

譚道

萬境時時變。雙輪日日過。人生皆夢幻。佛性獨融和。都會森戈甲。名場布網羅。何因消大劫。幾解念彌陀。

掩關臥佛寺

愚谷

杜門脩淨業。有願望金台。慧觀離喧寂。心關無閉開。竹陰隨地合。雲影帶風來。雅似維摩室。藏身亦快哉。

題太虛文鈔後

無諳

整理僧伽制。悲深願豈奢。宏綱廣百丈。絕學續三車。行在瑜伽本。心開般若花。者般方便說。種子定生芽。

聞草堂寺退隱顯空上人示寂有感

雲水

淨業承心老。依依一草堂。素嘗蓮子苦。多謝稻花香。骨肉微塵種。鬚眉白相光。尙留真性在。誰爲說無常。

豈爲超塵累。娑婆不可留。莊嚴華藏海。寂寞草堂秋。竹院追前話。花溪憶舊遊。示生還示滅。西上七重樓。

工部祠堂上。幡然一老人。心珠清澈水。眼界淨無塵。喜說尋常話。焉知報化身。法衣猶內繫。諸子莫愁貧。

錦水西南繞。溪流幾剎那。悲聲秋夜永。幻影夕陽多。梵宇誰持杵。慈航此渡河。心香燃一瓣。同與念彌陀。

普覺寺前散步

象 賢

月出霞潭淨。松山半角青。孤城浮淺水。古塔入高冥。嵐影聊堪掬。波聲信可聽。陶情真足樂。天地共忘形。

立秋有感呈太虛法師

玉 皇

黛橫山角遠。青擁佛頭深。一葉經秋落。微芳帶雨侵。共傳天命革。分到地鋪金。還俗
予年邁。垂垂老病尋。

京都本願寺

燕咫尺

得路從初地。隨緣問導師。蓮生方寸裏。杯度海天時。水是空明相。雲無去住思。尙嫌
餘習在。供佛有新詩。

寶山巖壁題

太虛

空手寶山來。寶山空手回。白雲歸洞隱。青樹傍巖栽。梵唱傳靈谷。天香繞佛臺。聖泉
清可鑒。一水碧潏洑。

述懷

譚道

富貴如泡影。功名一夢中。人心險何極。世變數難終。海運鵬飛北。燈殘月上東。百年
誠瞬息。回首感無窮。

丙寅祠竈日

燕咫尺

慣笑羊頭爛。應憐琴尾焦。頻年天憤憤。去路雨瀟瀟。茶宴從人餓。詩書欲自燒。是非君莫問。犬吠九門遙。

舟中

非非

一葉橫滄海。鯨波勢欲吞。蒼茫山帶雨。縹緲水連村。舊友天涯隔。新詩篋內存。無心入世法。國事總休論。

客太原聽太虛上人說法敬呈二律

金奎鈞

澎湃海潮音。欣今得耳聽。人天來信受。花雨落繽紛。浩蕩汾河水。高低恆嶽雲。此時胥震動。清絕淨塵氛。

仗錫來三晉。桃花紅正燃。（敬引法師偈）春深榮萬彙。（時陽歷五月尙未立夏）法妙動諸天。媿我根基鈍。欽師龍象賢。行當往京國。常侍講筵前。（時師應政府禮聘主講護國般若法會于京師）

遊岳麓山詩和王印僧居士原均

大圓

九域方多難。登高意邈然。平沙漫天地。落葉滿山川。暫作逃虛侶。空懷避世賢。曠觀臨絕頂。千里起湘煙。

和曹衲菴居士見贈之作

大圓

四載曹溪別。嚶求羨友聲。感君隆道意。媿我慧燈明。淨業超三有。楞嚴首萬行。從茲精進力。徧界度含情。

東遊雲麓和王印僧居士原韻

化聲

山靈醉已臥。萬類各悽然。我欲乘雲氣。人生感逝川。豐碑懷往劫。枯骨弔時賢。不盡探幽勝。湘江起暮煙。

閑尋青樹麓。或至白雲巔。城郭幻如夢。山河疑在天。劫灰餘古蹟。薪火此心傳。誰讀經臺偈。詩人有句聯。

呈太虛大師

趙曾儔

末法思爲病。羣生念亦勞。量天空有尺。環海或容刀。放眼觀塵劫。狂歌笑短毛。淵深

窮七浪。聞籟且揮毫。

學道如吞炭。安心不飲冰。願宏開未有。法捨况何曾。去國書常達。憐才翰密登。(人名)慈宗三要在。照世已超乘。

早過頭塘至月來場待舟

燕咫尺

一棹霧中泊。曉風生嫩寒。行裝頻點檢。春事半闌珊。白屋花時富。黃泥霽後乾。嘉陵江上路。盡入短筇看。

合州濮巖寺李鳴遠招飲

前人

閱世佛容古。揚塵湖水枯。禪關逢舊雨。梵夾雜陰符。戎馬經年別。風雲對酒麤。還勞漢飛將。歸路倩人扶。

題劉禮仁山居

前人

樹與屋俱老。山連石共奇。泥渾牛破塊。花落犬穿籬。接木移佳種。疏泉過別池。買鄰如有分。須辦草堂貲。

宿周鴻勛山齋

前人

小市酒初罷。高原人夜歸。拂輿松露重。籠燭月光微。圓笠青山影。疎燈白板扉。躬耕真遠算。嗟我尙儒衣。

宿南漕與中峯寺相對

前人

殘照催行色。尋幽笑古狂。亂山名不記。曲水意俱長。樵路月迎客。林花風送香。中峯深夜磬。清夢共微茫。

逢脩上人編輯瑯琊山志書成索題

王正廷

占得名山住。禪房野趣饒。衣冠話東晉。林壑啓南朝。殘碣煩搜訪。宗風未寂寥。開編尋勝迹。不待問耕樵。

題靈隱所藏彭氏繡佛

太虛

繡出憑君看。銀針不度人。絲絲生物命。縷縷法王身。光色映交遍。乾坤露獨尊。應如碧潭月。非幻亦非真。

送太虛上人之廬山

舒鐵香

遙瞻廬嶽色。七十二芙蓉。君向此中去。雲嵐青幾重。香鑪峯頂寺。白鹿洞前蹤。飛錫
 凌空下。鞦韆八部龍。

己巳秋末赴紹興改組佛教會務與越中諸友話舊

玉 皇

人衰愁有骨。道盡念多差。荻白蘆疑雪。葉紅樹似花。山空聯嶂壁。枝墜鬧林鴉。起伏
 都顛沛。客心徒自嗟。

四 七 言 律 詩

登靈巖峯有感

(虎岑)照首座

斷碣殘碑萬古存。我來憑眺一停尊。山連衡嶽千峯出。水接荆江九派奔。境入仙巢雲作牖。寺藏空谷竹爲門。興亡莫問前朝事。獨誦離騷吊屈原。

夕霽回虎岑晚吟

前人

一望湖天霽色開。無邊風景足徘徊。長江水落洲偏出。隔岸書傳雁正來。日夕層峯浮翠色。雲封石壁繞蒼苔。松門客去留詩句。竹外孤僧帶月回。

楓林晚眺

前人

放眼雲山引興長。丹楓夾岸飽經霜。數行雁字書秋意。一路蟬聲送夕陽。牧笛頻吹牛背穩。獵圍輕撒馬蹄忙。徘徊谷澗恬吟久。回首清風月吐光。

光緒乙巳四月三日由申浦與日本梅曉大師及筏喻道香兩退間乘輪之日

本泛海有感

(虎岑)僧笠雲

七十年人東海游。偶扶衰病上船樓。不辭浩瀚風濤惡。來覓蓬萊清淺流。故國回看猶在眼。孤燈挑盡獨成愁。近聞遼瀋方酣戰。糜爛天心何日休。

答萬羹甫兼貽龔楚仙

豁宣

智人若以佛爲師。正信端持直莫疑。不了纖塵終礙覺。好奇通病最難醫。千江月印圓澄顯。三藏靈文悟後披。預使聰明攢故紙。羊亡徒泣路多歧。

戒殺

周亮才

記曾大嚼過屠門。海底冤沈釜底魂。異味持開無量劫。衆生難斷有情根。色身一樣埋黃土。怨氣千尋化碧痕。六道輪迴皆骨肉。杯羹忍作漢高論。

答脩心師求安心

釋圓瑛

芒鞋竹杖幾經秋。針芥機鋒未易投。大道目前須着眼。神光腦後且回頭。安心先問將心句。佛法休拋世法求。運水搬柴皆妙用。騎牛枉自去尋牛。

南洋舟次懷天童禪友

前人

憶從太白分襟後。瓶鉢飄然倚棹浮。兩地風霜千里別。百城煙水一身游。月痕淡映蒼波晚。雲氣遙騰碧海秋。故國關山縈夢轂。幾時重與話明州。

癸丑四月入都聞預無遮法會會畢偕智圓竹溪師等十人朝禮五台次張無

盡居士詠五台六首韻

前人

東台高峻疊層巒。圖畫天開法界寬。繚繞烟痕連泰岳。逶迤山勢赴長安。懸崖倒寫泉千丈。滄海初昇日一團。千古名山留聖蹟。那羅延窟臥龍蟠。

扶筇荷笠叩南台。直上峯尖眼界開。雙樹烟籠橫白練。千年碑泐掩青苔。趺跣石記三生約。彷彿身疑幾度來。古洞真容如舊識。言歸一步一徘徊。

石磴嵯峨接上蒼。西台如榜紫垣旁。一龕風月留千古。無數峯巒拜下方。半壑潏沱功德水。彌天花雨曼陀香。隔林遠覩燈無盡。都是文殊智慧光。

北台巖巖勢崔巍。鳥道盤旋九曲迴。人在上方豎斗宿。龍眠幽壑隱風雷。曠觀大陸山千點。俯瞰滄溟水一杯。欲識清涼真化境。幾經劫火不曾灰。

中台雄壯擁奇觀。無數羣峯繞碧巒。四面嵐光晴帶雨。滿身雲氣夏生寒。峯頭雲漢星辰近。放眼乾坤宇宙寬。須識曼殊親住處。自他不隔一毫端。

絕頂巍然聳太虛。五峯化宇聖凡居。林泉隱約龍蛇雜。石棧崎嶇車馬疎。境入清涼忘熱惱。心游玄漠得安舒。文殊無是文殊者。識得文殊智有餘。

甯波阿育王寺敬觀釋迦文佛舍利恭紀（并序）

睡 齋

民國戊午夏歷九月二十一日。詣寺敬禮舍利。侍僧恭取龕內小塔高約八寸。底方而空。周以小欄。寬廣半之。令從欄隙上視。頃之見塔內所懸小鐘漲大。放淡綠光。擺舌如之。是時心以不得瞻仰舍利爲憾。凝神默悔。迅閃白光一線。夙聞舍利如珠。所見既殊。心仍慚愧。是夜自懺生平罪過。及晨百拜。請再賜觀。僧復持出。有頃見金容菩薩二座。作內馳狀。久之白珠三顆。飛貼塔之下端。如品字。輪邊暈影森如芒角。已而飛挂鐘上。如前狀。侍僧詢余所見。自云侍此十餘年。僅見一珠。黑白參半。信士希聞得見菩薩像者。惟某老嫗嘗一見之。僕皈依未久。得未曾有。賦此以誌不忘。

一十九山供舍利。千七百寺此浮圖。躍躍金身森兩座。飛飛白相峙三珠。輪邊暈影生芒角。（原作池邊松影時收放寺前有放光松）塔內鏡光倏有無。佛我法身今

并世妙明心不一毫殊。

己未浴佛後三日游南華寺謁六祖真身用壁間原韻率賦三章

黃雪峯

萬里參禪結勝緣。趙州敢惜草鞋穿。當年曾受三清訣。二十年曾入羅浮簪冠。
 此日親嘗六祖泉。香火此生懷玉局。（東坡句不向南華結香火此身何處是真依）
 菩提終古羨金仙。青原南岳俱奇特。想見宗風扇五天。

眼識從今淨九緣。況拈佳句似珠穿。心光當映曹溪月。法味曾參古澗泉。尙有酒香
 聞侍者。無多軼事話陳仙。愁山扁擔今猶在。誰與同撐半壁天。（寺有愁山肉身。愁山嘗
 自讚云無論爲俗爲僧。肩頭不離扁擔。）

登樓觀我所緣緣。梯似旋螺曲曲穿。四面雲山都入畫。半生心事付流泉。煌煌帝勅
 成陳迹。穆穆金容似睡仙。安得白椎人再集。一聲驚起四禪天。

入覺社後賦呈太虛

寶蓮華龕主人

與子當超無色界。糝糠百萬四千春。牟尼而後甯無佛。賢劫之間若有人。丈六金身曾自屈。大千幻海更誰親。跋躡僥倖遭龍象。蹴踏能堪亦舊因。

人天百萬肅金花。夢繞靈山徑路賒。十年前夢至一地。峯青林碧淨絕點埃。宮室樓榭池台。皆黃金鑄成。巨細高低。參差不齊。其下海波微湧。清氣襲人。諸佛菩薩。以次駢列。霞光萬道。照澈人天。余自橋上仰睇。眩極而寤。顧不辨其爲何境。頃覽靈山法會圖。乃悟前所夢爲此境也。一自祥雲變雙樹。長教妙法燦蓮華。皈依自恨根終鈍。余甫聽經肉食便難下咽。今素食矣。鄉人劉笠青李襄生。謂有夙根也。信仰休疑語太誇。直證菩提無上果。何期心性本無差。

九月十五日夜坐作

前人

筋骨堅凝百體輕。道心常向劫前生。觀空久覺河山幻。入定纔知耳目明。直以革囊同長物。莫將愚網結凡情。善財他日南行處。五十三參見至誠。

施白衣呪將盡得遠近來書甚多復以五百卷分寄各省農商教育諸會喜賦

前人

七尺金剛不壞身。從今辛苦度迷津。喚回癡夢人人覺。提醒良心個個明。要使中華成佛國。不容外道奪繁城。朝來一散天花盡。衣袂遙知衆妙盈。

題江易園所贈彭尺木無量壽經起信論後

前人

渺渺虛空不可殫。西方有國亦彈丸。大千何止行星巨。第一須防戒律寬。袁中郎夢中示弟。楊居士臨歿囑媳。皆以乘急戒緩爲語。九品蓮開爲父母。八功德水照衣冠。樓台七寶黃金地。誰信空門手造難。

送大默師赴西湖出家

隱塵

軟紅十丈黯春明。卅載滄桑世幾更。戊戌廷試同客京師。不道榮枯同是夢。却從遷老悟無生。羣童火宅方酣戲。窮子珠衣漫自輕。尋得西湖阿練若。孤山梅雪正淒清。

答隱塵居士原韻

大默

衆生真性本圓明。枯妄成勞起變。賴有導師開覺路。惟期念佛了餘生。名場迴笑

迷時重。塵縛方知解後輕。願矢精勤酬雅望。鑑湖前濯我心清。

用隱塵元韻寄贈大默上人

盧鎮常

如來寶藏自光明。頂禮皈依志不更。自愧塵勞仍故我。君偏解脫證前生。邀來明月三潭印。渡去慈航一葉輕。遙憶孤山梅放處。暗香浮動沁心清。

送鄧甫清居士（即大默師）赴西湖出家

續丞

寂寂無聲月自明。與君話別漏三更。浮漚幾見能常住。業海何堪溺衆生。半世塵勞雙鬢改。一朝縛脫萬緣輕。此行應識菩提路。心似西湖澈底清。

山居

笠居衆生

廡結高峯聳翠巒。幾巢黃雀當鄰看。撮來蔬果客初至。敲破冰泉薪已乾。衲補白雲尋細柳。經翻明月藝旂檀。素珠一貫無他事。念念彌陀終不殫。

卽事

太 虛

落落青天碧海心。十年香島夢痕尋。濤花飛濺靈山石。星火疎明祇樹林。僧俗混融

懷濟世。魚龍圍繞聽談經。維摩丈室今分得。不二門應入更深。

蓬峰居士和韻

楞嚴一卷淨塵心。佛法無邊何處尋。與俗浮沈魚在水。忘機靜息鳥投林。三千世界空天地。十二因緣自古今。難得廣長能運舌。談經相對夜更深。

北嶺居士和韻

空有蓮花不染心。禪門未可刻舟尋。拈花微笑靈山會。面壁觀心少室林。五蘊皆空無色相。六根清淨有潮音。從茲禮拜梁王懺。夜半參禪覺道深。

吳士珍和韻

得聞妙諦發禪心。上法源流迹象尋。散墜天花皆妙境。種栽因果盡瑤林。萬緣俱靜無魔戀。十行同功却外侵。莫笑豐干閒饒舌。慈航普度用心深。

地藏菴聽講偶題東澄照居士

蓮心居士

遣興尋山到野菴。數聲鐘磬破雲嵐。秋心蘊結新蓮社。香靄氤氳古佛龕。性淨塵根

門不二。道尊衣鉢徑關三。回頭細認來時路。舍衛城邊月一潭。

游靈隱寺聽慧明法師講經

空也

樓閣重重彈指開。奇峯天外忽飛來。法身非相誰雕石。古木無心自著苔。活佛神通兒作戲。老僧雄辯語如雷。願將一滴西湖水。洗盡人間浩劫灰。

同太虛法師赴長沙說法車中口占

隱塵

長沙山水雄天下。九載滄桑變態奇。憂國有懷傷太傅。講經無語證牟尼。偶思儔侶真如夢。豈意塵寰尙得師。此日追隨錫杖去。昭潭嶽麓不勝悲。

太虛和韻

嶽雲湘水明如畫。應歎心工造化奇。愛日顏開老迦葉。睡山身露大牟尼。一源上溯來無際。兩岸中流度有師。徧地瘡痍未收拾。幾人同體發慈悲。

白光禪師山居百詠（錄十七首）

招提相近漢城西。左有龍山右有溪。烟鎖樓台無上下。雲開山嶽有高低。移花必要

添新水。種竹須教帶宿泥。他日陰陰成古蹟。不知何處鳥來啼。

柴扉不扃絕遮攔。一任清風去復還。巨富那能終日靜。清貧贏得一身閒。跣趺岩下觀流水。彳亍峯前看遠山。將謂住山堪避世。住山名又落人間。

問道山居事若何。萬緣放下絕清訛。無心會道偏成道。有意降魔便入魔。荷雨鉏雲千個少。穿山吃飯一身多。山家日用無他術。且向岩前採薜蘿。

山中事事足威儀。行解相應莫我欺。花笑早春忻日暖。燭搖午夜怕風吹。全身榮辱三更夢。列國興亡一局棋。傀儡固然觀不厭。又堪喜與又堪悲。

山無歷日不知年。每見梁間燕往還。嶺上開成三片地。澗邊鑿出一升田。雪來頭上催人老。月到窗前伴我眠。盡道居山圖快活。誰知被破席無邊。

山中覓得石頭窩。不用茅苫覆綠蘿。一個蒲團容我窄。三千世界讓他多。未能出世登猊座。也勝當年住鳥窠。幾次客來無接待。剛留風月伴頭陀。

石頭路滑少塵埃。雨過天然砌綠苔。殘雪近聞隨臘去。早梅猶見送春來。有疑請問

連忙答。無事敲門且慢開。山色溪聲呈祖意。何須特地覓蓮台。

一山歷遍又山山。就樹誅茅縛半間。簇簇鮮花濃繞砌。森森翠竹密成關。烏知念佛休輕劣。石解聞經誰謂頑。慨嘆塵寰皆火宅。幾人能共老僧閒。

逍遙佛表靖悲歡。榮辱紛紛總不干。道在目前何用覓。事非心外那須安。閑投蕉束招僧話。偶摘松花共鶴餐。爲報聰明朱紫客。而今及早悟邯鄲。

結宇空林少客臨。崎嶇徑仄蘚痕新。遮寒破衲裁雲補。遺興新詩對月吟。肆應不諳今禮法。老來疏却古規箴。枯禪空起餘長嘯。倚杖柴門看遠岑。

決信無疑入此門。須知動靜道常存。細流尙可穿堅石。杲日焉能炤覆盆。探蕨三時挨歲月。擔柴十里賣鄉村。雖然不受檀那供。敢負吾皇一點恩。

山家秋景冷蕭蕭。萬物人情頓寂寥。黃葉飄墜由我掃。白雲出岫是誰邀。籬邊金菊含霜笑。天上孤雁帶月嘹。祇有當陽一着子。從來不逐四時凋。

自入山來高掛瓢。蒼松岩下便爲寮。迎風執炬防燒手。乘米辭官懶折腰。一個話頭

如未破。二時粥飯怎能消。好將立地承當去。莫待明早又後朝。

飄飄黃葉下疏林。靄靄雲橫秋氣深。蔬圃築牆欄野獸。禾田擊柝逐飛禽。但知治世多勞力。誰料居山也費心。偷得片時間日月。幽窗靜坐獨沈吟。

陽春日煖草萋萋。未久抽條與膝齊。人向枝頭分上下。我言地面有高低。穿雲鉄鶴堪收綫。出海泥牛不任犁。吩咐兒童好看守。莫教喫過斷橋西。

問我山居有幾年。細流洗澗早成川。三更夢影隨蝴蝶。千載桃花叫杜鵑。爲欠月情長禁賞。因還詩債不容眠。人皆笑我忙如此。誰識壺中別有天。

只解脩行不募緣。山前自有一坵田。營成小圃栽黃菊。挑個方塘種白蓮。擷草饅頭常在手。售柴擔子久磨肩。陡然問我西來意。隔塢深林噪夕蟬。

在古容城喜晤彥明林大令用滌齋太史韻

石 棗

春夢回頭悔到顛。客中相見是何年。苦拈佳句眠常後。欲叩禪關夢不前。識浪早空得失影。眼波時送去來船。拍肩笑把洪崖問。記否神仙未了緣。(君曾習道家術)

和滌齋太史

前人

舊有狂名署大顛。不堪重問義熙年。懶吹玉笛入雲去。長念金剛禮佛前。到眼湖山如過客。催人風浪有歸船。祝公早作生西計。般若功深亦上緣。

山房詠

某禪師

山深忘却住非住。事了何知疑不疑。行處水聲隨錫遠。坐中雲影共人遲。欲隨僧去尋支遁。愛見人來說項斯。世上盡言休息去。不知逢着是伊誰。

寂寂一心融法界。寥寥萬象絕思量。樹深竹簟臥雲冷。花落瓦瓶分澗香。爐凍且尋灰裏火。世炎難爍鬢邊霜。不知回首黃昏近。猶向西窗愛夕陽。

覆地漫空祇一塵。破除誰解絕依因。心心死盡正堅我。法法空來尙有人。黑夜鳥飛言象妙。青州衫重話頭新。饒君着意捫摩徧。錯把虛空覓四垠。

神器何勞力戰爭。牛羊多上六朝陵。傳高隱逸非關品。絆殺英雄不是繩。有氣乾矢三寸檄。無心枯樹一株藤。浩歌拂袖思歸去。門外青山無愛憎。

物情只合消歸目。斯道原知不在言。一夏熏風生竹塢。幾宵涼月侵柴門。名成翻厭填門馬。路失偏驚絕壑猿。問到今時豈無語。破山東玄是桃源。

一齊放下便心安。世外身前兩不干。雲起忽看山樹濕。日來還見露華乾。相逢狹路轉身易。透出虛空立脚難。無舌老人曾有語。騰騰六月餘爐寒。

阿彌陀佛誕曉月光中聞念佛聲喜作

太虛

佛聲圓潤月光寒。閉目聽遠展眼看。直使夢醒成一覺。不從空假具三觀。方知佛本心頭在。只要人休自己瞞。十萬億程消息近。曉鐘清梵報平安。

和常熟華嚴大學某君原韻

顯蔭

回首前程夢幾場。黃梁飯熟醒斜陽。空花泡影那消說。否泰浮沉不可量。卽就寸心明一理。也須行脚歷諸方。何時參透無生旨。跨上西來一葦航。

華嚴大學印心石屋題壁

前人

迥超塵外境清幽。雲氣嵐光映碧流。一枕荷風紅日晚。幾窠松徑綠陰稠。蟬琴頻奏

消長夏。蝶夢初回漸早秋。以境印心心印境。空山寂寂水悠悠。

和太虛法師原韻

畢鈞堂

翠竹蒼松耐歲寒。經壇花雨衆生看。因緣十二都無着。法界三千如是觀。超出紅塵飯淨寂。盟成白水豈欺瞞。禪心朗徹清如許。色相俱空夢亦安。

懷天末個人（民國元年天末個人由吉林趨燕京沿揚子江歸里影事前塵

重提如夢）

化聲

萬里間關足放歌。豈容丈室老維摩。人歸燕北俠腸壯。客到江南戰骨多。醉裏山河摩鐵拐。劫餘宮殿吊銅駝。滄桑閱盡塵懷淡。好去華陰乘白驪。

感時和汪友箕

桂伯華

一十百千萬億兆。脩羅畜獄鬼天人。有誰不死能超世。悉是偷生作下民。李白詩篇耽麴蘖。杜陵書劍老風塵。不如爛熟楞嚴卷。論取坡公契道真。

竭來北海復南海。歷覽今人到古人。雲雨總供翻覆手。桑麻幾見太平民。羣迷那更

知三世大苦。都因誤六塵。試與空齋一跌坐。定中面目本來真。
 韓非老子乃同傳。盜跖顏回儼一人。八九百言留妄語。二千餘歲苦吾民。疇令道釋
 風墮地。更有韓朱步後塵。從此乾坤莽荆棘。與誰披豁見天真。

次韻酬楊昀谷

前人

詩心淡後無奇句。世事談多有淚痕。與子細尋無意味。共余相喻不言言。當來彌勒
 終生世。過去巫咸尙理冤。試把十方三世看。鉄渾侖亦不須吞。

次元韻送別趙君壽人返皖

太虛

歸元一會集諸方。緇素同登說法堂。藉指應看天上月。聞聲徧顯性中常。莫將累劫
 浮塵客。埋却當年大覺王。一吸皖江無盡水。還從識海觀含藏。

壬戌元旦和彝樵韻

定慈居士

天時人事兩乘除。笑逐兒童鬧歲初。歷劫莫知誰是我。這生錯認賊爲予。獸香巧結
 吉祥字。鳥語頻喧自在廬。覺得今春景物好。歌聲四面起樵漁。

壬戌三月黃陂謝鑄陳縣長柳質皆邑紳等邀赴說法同行有了慶法師暨陳

元白李時諳趙南山孫文樓王幼農陳仲皆杜松村陳叔澄諸居士叔澄和

前年赴湘詩見示因次其韻

太 虛

未可栖栖笑仲尼。頻年我亦慣驅馳。春深大野來今雨。學講前川憶古師。佛海潮音傳隱約。人天夢影正離奇。法身流轉愴無極。應有維摩病大悲。

同介庵南山夏初諸前輩聽講和太虛法師韻

潘 肅

重重邪網障摩尼。過客光陰去若馳。大笑拈花今悟我。虛懷學竹此爲師。廣長舌底言言妙。清淨身中相相奇。一向多聞逐迷妄。前塵影事不勝悲。

爲盧鴻滄居士題僧相

太 虛

從無相處能呈相。悟徹空時不取空。雲水一身天上下。風濤萬里海西東。蒼茫世變逢今日。矍鑠人豪有此翁。利鎖名羶羈不住。到頭歸向佛門中。

與友人論佛法

反 予

五天聲教早沈淪。針芥相逢未有因。師子吼希憑自覺。野干鳴急倩誰馴。阿難入窟留三印。無看昇天轉八輪。領受內明文與義。始知唯識了無塵。

萬彙芸芸共法癡。智愚須載一慈航。不離俗諦權猶實。但絕邪觀斷與常。淨業妄容乾屎橛。顯加端賴臭皮囊。虛空築室如成就。聖者應慚孟八郎。

摸象盲人眩淨脩。爭箕爭帚不相侔。同斟被水葡萄酒。各詡塗香苜蓿油。餘智固難詮孔雀。癡人偏重染獼猴。欲除末世澆漓法。願造恆沙般若舟。

譯場古德數殊功。歸敬柴公揖什公。實錄謹嚴真不亂。方言順遂俗能通。神珠內映超鴻寶。帝網高懸擬法宮。嚼飯與人容失味。須從鵝乳乞圓融。

和芸翁五叔原韻呈競青先生

化聲

是誰鞭日駒光過。惹得人天萬劫磨。喪亂驚心詩境淡。山河滿眼淚痕多。雖無慧業能成佛。未必凡情欲化魔。百尺竿頭求進步。精勤一念是彌陀。

送大勇和尚東渡

李天行

一雁孤飛落日斜。川原暮色動長嗟。滄江水白流天外。鷺嶺風高移月華。塵夢劇爭蕉下鹿。蓮台自出火中花。此行不爲三珠樹。萬里波濤肯放槎。

聽大勇法師講唯識有感

比丘尼淨山

淨六根時淨六塵。焚香今作佛前人。已知環境皆唯識。故向恆河且問津。性海誰傳彌勒法。心燈自照達摩身。俱生二執消難盡。歷劫脩行忘苦辛。

花鈿翠袖獨除盡。經案繩床意自清。世事何須求甚解。人生有累在多情。指心是佛凝嵩壁。適興從師過渭城。但願蕭疏塵慮淨。草衣木食足平生。

自大觀亭赴地藏庵

太虛

何處登臨寄客情。望華樓畔大觀亭。窗前綠水懸紗幘。檻外青山列畫屏。偶聚應憐類萍梗。幽尋暫喜得林坵。蒼茫暮色垂楊裏。共向禪關一叩肩。

和空也法師登抱冰堂原韻

慧圓

愧我初登師子堂。那知目瞬又肩揚。籬花山半開猶未。(時在重陽前九日也)世

態人間炎與涼。門下信多龍象聚。師執佛學院教鞭。余忝隨其後。衣中自有寶珠藏。抱冰（張文襄在鄂之別墅名）客去今何在。憑吊徒聞姓氏香。

悼大慈

太虛

海南聽法獨超然。倘亦靈山有宿緣。宏誓願中求組解。急流津外着鞭先。閉關未滿三年約。到死猶持一念堅。畢竟大悲心呪力。翻身不戀樂邦蓮。

步太虛韻悼大慈上人

慧圓

兩度逢師豈偶然。余于前去兩年兩度謁慈師于淨梵院關中。靈山未散證前緣。悲心獨運成精進。師專持大悲呪。劫念同時無後先。半夜持名聲益朗。去夏余宿院中時正酷熱深夜聞師持誦之聲不絕實感佩。五人脩學志尤堅。師嘗有五比丘共脩之志。三年功不唐捐也。師臨終時自言三年功不唐捐。乘願重來說妙蓮。

壬戌除夕挂搭佛學院圍爐無事取永明禪師山居詩讀之有感因步原韻

空也

七二白雲深復深。髻齡有幸共師尋。早知見月須忘指。便解離言自悟心。但使客塵能盡淨。何愁大地不平成。最憐今夕非常夕。梅爲嚴寒香滿襟。

三衣一鉢勝簞瓢。萬里隨身不計遙。雲本無心方出岫。鵬非有意始冲霄。臘除歲盡胥情見。智泯境忘卽聖苗。好共毗盧遊法界。須彌高出衆山朝。

開福寺佛學講習所別善因法師

化 聲

未曾一面成知己。偶爾相逢又別離。如是因緣真怪特。云何業報太希奇。文章海內無餘子。肝胆人寰見此師。車上長歌吾去矣。山靈爲我好扶持。

癸亥元宵前二日偕蕭止因陳妄清杜漢三王詠香陳子端諸居士游萬家河

維摩精舍智慧閣訪敬存全居士聊以伽陀紀之

釋太虛

溪風颯颯寒生袂。崖石磷磷看出神。軟語枝頭憐好鳥。卜居谷口得幽人。再來摩詰賓中主。一現優曇物外身。共上智慧高閣望。山花無限正胎春。

和太虛法師瀉山詩原韻（四首之二）

醒迷居士

千百餘年古佛場。廢興與復總真常。如如不變三祇劫。個個能熏五分香。頂上須彌納芥子。胸羅剎海載資糧。白牛遺址依然在。優鉢羅花源遠長。

洗菜溪邊深復深。回心橋畔布黃金。清泉如故美人寬。靈杏重生功德林。獨立山川明且媚。別開天地到于今。萬峯羅列猶孫子。大衆同欣古佛心。

奉和劍農居士四十述懷兼悼令兄慧谷公

端甫

牛耳騷壇四十秋。梅花仙骨幾生脩。心清陶令尋蓮社。眉掃姬姜問字樓。君如夫人長齋繡佛。老去張敷情落翼。中年謝傅韻風流。楊朱泣盡臨歧淚。海內無人識馬周。深秋風雨折荆枝。先兄伯全今秋謝世。怕讀人間腸斷詞。十載揮殘兄弟淚。先兄客湘十載。九原同泣鵲鴿詩。零零雁語悲寒日。莽莽荒烟愴歲時。姜被失溫同有感。他生門第再相持。

輓祖印法師

王容子

明月晴開野樹烟。三年二度聽談玄。句中眼付何人會。教外心憑苦口宣。師傳曹

洞宗值末法機多不契。渺矣高台多逝水。淒其黃葉又凋年。羣山萬壑荆門路。回首靈蹤一愴然。

呈太虛法師

唐蔚龍

法源八指智悲全。振拔沈淪道力堅。不住涅槃成解脫。誓從火宅種金蓮。揀魔辨偽憑三量。攝相皈心滌萬緣。散髮狂吟望大別。楞嚴一脈可親傳。○日內正讀師著楞嚴攝論。慧解卓識。嘆爲希有。故有末句。○

癸亥春與化聲大圓兩居士游伯牙台感賦

空也

伯牙台上伯牙琴。人去台空春滿林。流水高山皆祖意。晴川芳草亦禪心。神游法界超塵累。曲奏絲絃絕俗音。一片月湖誰鑿破。古風寥落感而今。

黃鶴樓

化聲

無端塵世千年事。點染山河一片秋。鐵笛長歌劫浩浩。銅駝高臥思悠悠。洲餘芳草人何在。樹老晴川水自流。滄海桑田誰管得。且攜黃鶴醉江樓。

贈李隱塵居士（四之二）

李蛻菴

數年未接維摩席。今日靈山喜證盟。獲得寶珠真把握。分來慧鏡大光明。拈花觀象仍無跡。止水澄心尙有情。媿我鈍根歸佛晚。煨殘芋火夢纔醒。

宗教源頭直指心。廣長有舌抉幽深。談玄不作玄中悶。索解還從解外尋。初地築成收海藏。迷津衝出放雷音。片言大得西來意。般若通神賴此鍼。

奉酬蛻菴居士

隱塵

桂演塵劫十年事。恍惚驚靈舊日盟。安得六通宣宿命。却從三昧證元明。發漚滄海同無始。應化娑婆爲有情。付囑王臣佛意苦。未應衆醉獨爲醒。

大悲願力泯冤親。歷盡玄黃理更新。輪本迴環空進化。果雖異熟要窮因。獨頭露影塵成夢。皆眼生花幻豈真。軒冕泥塗同一瞬。悠悠逆旅寄征人。
契經充棟只明心。悟到真源淺亦深。火宅三車徇衆喻。珠衣一襲就中尋。頑妻豎子皆僧侶。水鳥園林灑法音。無上菩提但胞與。更何密語度金鍼。

福德因緣足慧才。維摩憫世合重來。胸中智鏡雙輪現。舌底青蓮四色開。古寺談經尋寶樹。空山話舊掃蒼苔。報恩心事無今昔。瞻望龍門幾日回。

癸亥六月十日太虛法師說法于世界佛教聯合會是夜風雷大作詩以記之

隱塵

大林峯畔講經台。千載松陰冷碧苔。祇樹孤園原未散。蓮花廬社此重開。曼陀天雨紛流彩。般若靈源助辯才。十萬魔軍齊震動。夜深巖壑吼風雷。

和隱塵居士原韻

太虛

突露虛空一講台。萬峯青擁佛頭苔。千年暗室燈前破。四色高蓮雨後開。鑄聖鎔凡此爐火。括囊籙冶亦人才。鬱然花木成林地。圍繞天龍震法雷。

次韻虛師遊維摩精舍兼呈敬存居士

王 篋

朝香夕焚不留跡。絕谷幽崖疑有神。想見法門全盛日。從思鼓腹太平人。行妨霧露霑衣袖。坐對蓮峯憶佛身。若泛清溪尋住處。乘流合自愛山春。

四壁山添風料峭。一川水助月精神。田園雖自無常主。景物終須屬解人。斂盡靈芽欲健筆。閒披鶴氅稱吟身。年年柳絮飛時節。記取東欄雨後春。

湘潭唐畏三先生供職武昌陸軍測量局兼任佛學院講席今現僧相名大敬

求戒寶華山賦此送別

化聲

乾坤是處能容我。江漢中流且送君。千里風塵求法乳。百年身世悟浮雲。談禪儘有三更夢。講學猶留一卷文。滿眼蒼生方憤憤。此行遮莫墮聲聞。

足成古句

太虛

遁世儻然脫俗塵。優遊惟與水雲親。心虛不慕朝中貴。道大寧憂鉢內貧。千里關山兩芒屨。半瓢風月一閑身。古句于徐自適烟霞性。往返天台雁宕頻。

偶成

太虛

灰飛霞管又將春。學道依稀未識真。唯佛能知因念佛。無塵可出始超塵。夢中悟夢重迷夢。身外非身恰是身。漸已當情無一物。白雲空翠冷相親。

遊虎丘與吳中友人同作

太 虛

踏徧山隈又水隈。梅應笑我鶴應猜。虛空世界渾無住。領袖文章不易才。天女散花何處室。生公點石此間台。而今一覺繁華夢。慘淡斜陽照古槐。

宿古寺

李隱塵

萬山紅樹一荒庵。老衲忘情懶不堪。鐵馬亂嘶疑逐北。木魚緩擊看和南。秋風藤老猿窺壁。夜雨檀香鼠上龕。殘夢未醒清磬起。笑余無福學禪參。

聞亂感賦

王佛願

海東聞說變滄桑。逐鹿三湘戰又狂。蚌鶴相持空自苦。人禽混雜太堪傷。茫茫業海誰能拔。蕩蕩菩提我欲揚。跌坐靜觀無限感。未知何日得平康。

次韻奉酬吳倦叟

石 琴

天心預報嶺梅春。緩步行吟到隱濱。零亂短篇題甲子。荒涼殘夢話庚辰。願窮世世生生劫。普現塵塵刹刹身。多少他鄉未歸客。渡頭會看去來人。

長齋蘇晉喜逃禪。成佛居然讓客先。獨抱寒香耐空谷。懶將塵念抗時賢。百年一瞬身如寄。歷劫孤光信已堅。我願翁心同未了。龍天森處舌翻蓮。

遊麻陽玉皇閣

朱善純

亂山峯裏黑丫叉。松竹森森石徑斜。惟有風篁和吟嘯。更無烽火入烟霞。摩挲鳥道尋人迹。檢點苔紋看石花。回首塵寰如隔世。不知雲外有僧家。

華山求戒有感（四首錄一）

大悲

焚硯離家但嗜禪。楚萍一浪到江天。寄身塵世原無味。偶涉華山別有緣。窗外靈禽喧梵語。門前翠竹破蒼烟。數聲清磬心如洗。不辨龍蛇盡寂然。

安期岩訪梅

太虛

向陽纔見數枝開。便把春光洩漏來。得氣獨先天地物。托根深在水雲隈。冰肌玉骨花魂瘦。冷月尖風鶴夢回。却憶西湖林處士。吟肩寒聳幾低徊。

慰盛候季瑩哭弟

前人

不堪交臂已非故。可奈回頭歲又新。容易光陰客中過。最難兄弟老相親。尋常涕笑紛哀樂。漸覺悲歡隔夢塵。且共忘情遊物外。眼前惜取白雲春。

程聖功居士函詢中州佛化詩以報之

吳退齋

中州佛化太沈沈。極目嵩雲感少林。盛蹟尙傳伽藍記。末流誰震海潮音。一程性理知禪淺。初祖蒲團究道深。法不投機空卷舌。每嗟香火社難尋。

和退齋居士見贈韻

聖 功

祇聞木落祖堂沈。尙有秋雲護少林。幾處歌僊完好夢。一天嘹鶴振悲音。破銅入化何嫌淺。爛鐵成鎔別見深。且向低途垂手接。葱蘢材發共千尋。

讀海潮音有省六首（錄四）

真 識

吾生墮落野狐禪。谷飲巖栖喜自便。忽見天宮衰相現。始知地獄苦因連。無邊業障如山立。有限光陰似火傳。明月清風將送我。陽關三疊北邙顛。

大恩難報莫疑猜。倦步黃金七寶臺。入定且居號叫獄。修行還願馬驢胎。不因割截

遭歌利。那得莊嚴盡善財。自誓仰祈諸佛證。輪迴回裏又輪迴。

大事未明徒死死。已明大事枉生生。自慚敗種無元氣。尙喜靈苗有夙莖。甘露頓除大火聚。怖途權息化人城。太虛湛湛空王佛。仰仗光明照夜行。

苦海澄清爲覺海。全憑摩詰指南針。虛空浸澈原無水。刹土浮來遍是金。龍女獻珠成佛疾。馬王到岸度人深。心香頂祝真無量。願願摩尼耀古今。

焦山三詔洞

燕咫尺

客去還因處士留。酒錢分買過江舟。一山已了林泉願。三詔徒添魚鳥愁。人品高於周鼎價。山寺有周宣時鼎。月明時共水仙游。寓廬灰燼能高臥。忍看頽波日夜流。

虎邱

前人

石橋煙樹繫秋航。高寺逢僧話夕陽。久客漸忘鄉語失。奇觀能起倦人忙。千年陵寢餘巖穴。一代江山幾霸王。生子不才須葬劍。可憐坏土卽滄桑。

崖門吊古用陳獨漉原韻

太虛

斜風橫雨不勝吹。沈碎河山萬古悲。喬木蟠龍悲故土。落花啼鳥愴空祠。甘心銜石同精衛。忍死餐薇孰伯夷。夜夜怒濤驚拍岸。停舟垂淚獨尋碑。

登比叡山禮傳教大師塔（并序）

顯 蔭

日本比叡山爲天台宗古道場。傳教大師開山。寺藏傳教大師法券。唐道邃大師親筆也。大師塔前之燈。至今不息。尤見日本佛教徒之愛惜祖道也。師塔名淨土院。航海梯山求法度。更來勝域拜先賢。零縑手澤薰香古。數盞心燈光燄鮮。遺著靈文千句偈。留痕淨土一枝蓮。圓宗宏範而今在。裕後光前任鉅艱。

題善純居士靜坐攝影

釋 光 霞

居然西竺古先生。色相巍巍一鏡明。地水火風常自在。聲香味觸不關情。蒲團印破千潭月。幻影空餘片紙名。坐久莫忘天下事。迷津有筏待誰撐。

答李蔭青

前 人

揮毫怕寫人天事。水月空花幾個知。擾擾京塵何足問。茫茫苦海最堪悲。情緣未了

易生感。魔念難銷。又作詩。君是富春山下客。可同慧劍起羣痴。

同學（善度善模）二居士出家感而賦此。即以爲贈。朱善純

法味同餐亦宿因。儒生結習况親仁。願心同切三千界。朋友原居第五倫。舊學商量勤剪燭。法言鄭重勸書紳。記曾誇向故人道。知己而今又幾人。

四月二十七日大雨

李佛肩

白雲一片錢塘岸。城郭空濛幾萬家。湖上去來青雀舫。洞門開落紫鸚花。雨穿煙杪中藏寺。風送潮歸淺著沙。不見招提莫惆悵。等閒山色自銜訝。

贈洪葦歸普陀

太虛

又泛輕舟去水汀。秋風聚散悵浮萍。林巒薄暮烟微紫。蟋蟀征宵草尚青。海國應憐人窈窕。天涯怕看月娉婷。此行遮莫增離思。珍重黃花晚節馨。

詠秦關篆香樓木本玉蘭花次關道程商霖韻

前人

駐將玉貌千年好。應較瓊花一現強。葉葉皆成青色寶。枝枝齊放白毫光。春深往往

香如海。夜靜溶溶月滿廊。風雪來游寒正酷。待時無限惜芬芳。

家居漫興

李隱廬

草堂新賃檢簾瓢。門外春風柳萬條。婚宦累人黃雀笑。姓名避暑白鷗邀。詩篇半軼從頭記。畫稿無傳信手描。滿貯一囊誰識得。峨眉峯執曲江潮。

斜風吹雨送殘春。紅紫飄蕭別恨新。讀史擬增寰海志。檢衣猶帶帝京塵。病能避債翻爲喜。書可傳家不掾貧。怪底梁間新燕子。年年來往總依人。

馬足追風西復東。十年僂指太朦朧。樽中皓月沈沈醉。脚底紅塵踏踏空。名士多於出水鱖。高人寒似耐秋蟲。我身清濁渾無着。琴劍扶持夢夢中。

甲子元旦

顯蔭

卍字光中顯法身。上元甲子始逢春。循環天運參玄化。秘密真言結妙因。貝葉行間修福慧。蓮華座下禮能仁。識心誠證如如佛。衣裏明珠無價珍。

敬讚親基大師畫像（在奈良法隆寺確係唐人手筆） 燕廔材

將門柱石稱麟鳳。法苑金湯作象獅。往昔三車馳盛譽。至今百部讀良師。前生枯木禪經劫。後世香花供永時。瞻拜遺容千古寶。丈夫偉相見魁奇。

瞻禮聖德太子道場

分身應現帝王家。救世慈悲澤被遐。闔境蒼生蒙德化。長途赤縣取文華。遣使入隋。東瀛聖教開源始。南嶽休徵感夢賒。太子有入定。至衡嶽求經。故事今遺夢殿。慧日舒光臨大地。殊恩千古詠無涯。

贈太虛法師

吳退齋

迢迢漢水一江遠。咫尺緣慳道力微。遙憶莊嚴空水月。况聞咳唾落珠瓊。醉醒觸處皆迷妄。圓覺何曾有是非。再拜心傳十四字。承賜佳聯拜懸座右。珍如衣鉢幸依歸。

至太白山禮八指和尚冷香塔

太虛

卻憶乘槎兩粵歸。梅花明月記依稀。時方營壽塔成額曰冷香師自撰塔聯曰傳心一明月埋骨萬梅花係李梅庵書。出山杖履追隨去。閱世滄桑志願違。北上何堪骸

骨返。(民國元年冬師爲佛教會事寂於京師)今來已是物華非。青葱墓木微濛雨。憑
弔難禁涕淚揮。

遊同泰寺登景陽樓

段瑞翔

六朝宮殿今成幻。滿目淒涼萬感生。玄武湖邊衰草色。紫金山下朔風聲。臺城帝子
孤魂杳。古井臙脂一鏡清。莫語鷄鳴同泰寺。景陽樓上總傷情。

喜善度居士出家學密宗

象 賢

方斯水月松風表。剗却塵勞不淨緣。扶正摧邪憑慧劍。挽瀾到岸仗慈船。曼丹囉啓
法雲地。祕密心開平等天。將見薩埵親灌頂。金胎兩界得真傳。

和王陽明先生探桃源原韻

玉 皇

屐入桃源路轉賒。征塵撲簌落輕紗。花枝嫋娜翻青浪。月色玲瓏映紫霞。別有洞天
非寶所。却無餘地着奢華。百年一夢驚彈指。小憩何曾是我家。

與戴靈法師夜話

允 祥

雲生破納兩忘心。覓友欣逢秋正深。老去自無人我見。興來儘有短長吟。雁飛霞鏡遙天字。菊綻風披滿地金。殘暑漸消涼意足。同君一洗舊塵襟。

和錢誠善居士韻書筵贈方丈培安和尚

太虛

暫來光孝說維摩。露地紛馳太白車。火宅從如原佛國。淤泥真見出蓮華。不思議法心無住。入律行時手密叉。萬鏡羅空森主伴。月明鐘梵夜交加。

送能守師歸揚州養病

化聲

大好皮囊地水風。爲誰彈指現疲癯。千年絕學欲勞汝。(師習因明)萬里密藏正待公。(同人組織入藏學密)牛馬飄零吾已倦。人天推出子能雄。側身宇宙依然窄。何處相逢一笑中。

呈太虛法師

誠善

千年未聽仁王法。此日爭迎長者車。大地突聞師子吼。虛空紛雨曼陀華。十方聖善傳心諦。八部天龍護樂叉。莫怪點頭到頑石。生公妙說本無加。

多生流轉歎沈淪。苦海茫茫莫問津。根鈍愧無參妙悟。緣深幸許禮能仁。圓如莫證華嚴海。忻厭惟修淨土因。一瓣心香常供養。何時重倚樹困身。

金山禪堂夏期圓滿感懷

大悲

春來掛柄金山裏。轉瞬江天一色秋。處世蜉蝣原似夢。寄身塵刹儼如漚。心形俱寂離真妄。人法雙忘失喜憂。情境從知皆是幻。幻中名相欲何求。

山環水繞隔塵烟。信是人間別有天。皓月清風穿古殿。晨鐘暮鼓過前川。梵音獅吼驚龍象。棒喝僧吟醒夢顛。慢道楚狂甘暴棄。悠然常運達磨禪。

禪堂人法兩從容。多劫修來未易逢。凡聖根基雖各異。賢愚本體實皆同。無參豈得明心性。有智何妨類曠曠。自古金鼇多道者。詎能空過此山中。

中秋後五日聽董事長湯齋銘先生院護李隱塵先生院長太虛法師調詞慨

然有作

機警

再現靈山法會新。維摩助化誨諄諄。江頭頑石成新契。座上飛花現勝因。漫說深心

歸極樂。還將法雨灑強鄰。(謂組織世界佛教聯合會)大千國土一時淨。諸佛光明遍刹塵。

感時五首和余節高九日登江亭韻東鄭蘇戡張敬輿胡子笏廉南湖諸公暨

湯鑄新王一堂同年

何雯

將軍勒馬指燕然。笳鼓聲喧咽暮天。海擊滄溟騰九萬。劫開沙界撼三千。風雲舒卷歸牛後。日月推遷識象先。四相本空無有着。更從何處辨纖妍。

孤城一角濺流霞。三舍周旋尙拜嘉。月照黑山征戰苦。煙籠紫塞信音賒。萬人空巷飛芻秣。諸將連營雜蔓麻。如此高秋好風日。異鄉應有夢還家。

阿難少小負多聞。法雨無由息禳氛。滿地干戈消宿債。一天風露泣征雲。蒼黃入世身如幻。黑白推枰却未分。莫向征夫問歸路。羽書日夜太辛勤。

一年秋意漸凋殘。鼓吹銷沈久未彈。東道往來車跡徧。西風瘦損帶圍寬。思通天地情何限。目極關河日已寒。最是落英紅遍地。不堪淒絕霧中看。

重陽幾度上江亭。蘆荻蕭蕭側耳聽。簪髻且庶叢菊詠。齋心時誦法華經。中原蒼莽思歸馬。故壘青燐悞化螢。稽首如來大悲者。冤親一例夢魂醒。

中秋與同人對月

石 琴

聯翩裙屐一時來。粧點湖山屬異才。爲寫秋心尋古寺。好攜明月上高台。冰輪飽看孤光迴。玉鏡難留往劫哀。天上盈虧彈指換。人間圓缺幾多回。

酬劍老過訪用前韻

前 人

一枝神筆破空來。的是扶輪大雅才。把臂偕行彌勒閣。凌虛踏上妙高台。爐香靜禮華嚴懺。佛力難銷鼓角哀。誓爲蒼生祈禱遍。普賢願大莫空回。

遊古琴臺

機 警

伯牙遺址獨徘徊。人去臺空不勝哀。江上秋風猶有淚。草間殘碣已生苔。荒涼烟景遊人少。寂寞桐陰野鶴回。流水高山千古調。知音無復子期來。

步芝峯上人倦游韻

一 厂

山間自有山間趣。雲意悠悠鳥意閑。獨坐靜聆江上笛。低徊指點望中帆。一鉤新月窺人面。半徑蒼苔老鶴顏。欲與峯嵐相對語。柴扉鎮日不輕關。

登廬山

芝峯

奇峯高處輒登臨。况是匡廬古佛林。色吐樹雲深復淺。聲吞泉石古猶今。晴空疎雨浴新月。翠冷濃烟愜素心。橫坐牯牛清唱晚。山有牯牛嶺。松濤爲曲瀑爲琴。

宿保國寺

(蛟川) 劉正愈

古寺終宵倚翠微。滴聽空翠溼人衣。檐頭谿響清如雨。殿角風生雲亂飛。一枕松濤撼客夢。千峯月影照僧歸。禪心久與紅塵遠。山鳥山花兩息機。

宿保國寺

(上海) 鄧鈍鐵

上方清境出塵寰。此是東來第一山。石級千尋龍脊臥。翠微雙峙馬鞍閑。雲銜月影時窺客。松挾濤聲夜壓關。倚枕沉沉聽鈴語。無邊俗慮一時刪。

和李梅丈己丑潤月新康舟中韻

揭唐

卻嫌與俗太相乖。浩氣孤情獨往來。過眼紛華隨水逝。子身頑健漸心灰。歸期有約仍難踐。世事如謎不忍猜。打劫殘棋看已倦。一枰着手此時纔。

白日烟雲忽蔽遮。無端荆棘感交加。人間甯有忘憂草。我佛能拈解笑花。懶自中流支砥柱。要從歧路覓眞家。沼吳霸越尋常事。未若長浮海上槎。

贈陸漁笙太史

玉皇

羲皇高枕睡巢由。不與當時世事憂。擊壤風流傳萬古。鎮亭詩史足千秋。(太史有鎮亭詩集三十卷行世)潔身未造新名意。洗耳驚聞故國仇。驥老志猶在千里。沙蟲猿鶴豈爲儔。

杭州蓮居菴志修上人修葺本菴落成吟此以贈

前人

補修白社避紅塵。不向浮生論假眞。喧市無關終大隱。虛窗窺月著高輪。水中幻我渠非我。世外人貧道不貧。未是巢由空洗耳。適來時事劇無因。

清涼山北臺

太虛

北台收盡五台奇。俛視羣峯若小兒。極目高山難過此。微聞流水逝如斯。親逢四月餘冰雪。似入三禪伏見思。一碧無雲風浩浩。清涼法界吼青獅。

贈袁純文居士

譚道

果然性見復心明。捧喝當頭一坐傾。浩劫菩提空色相。長安壯歲薄公卿。常翻舌本非饒舌。拚棄名儒豈好名。願把青衫裁破衲。同來摩頂學無生。

閒居自遣

前人

閒居無事從容甚。富貴浮雲莫我侵。盛夏曾揮王衍塵。深秋頻鼓伯牙琴。奇書讀罷多佳趣。長笛吹來幾賞音。幸處忘機幽靜地。何須別費買山金。

太虛法師北寺講經圓滿將赴東瀛率成小詩一章爲贈 大休

北往南詢復有年。能仁宏法利人先。三乘妙諦隨機設。一相圓明沒際邊。課罷偷閒忙筆債。禪餘遣興弄詩篇。(求書者衆復增酬唱)明朝餞別登輪去。功業將留海外傳。

乙丑十一月本師太虛自日本歸謁於蘇州北寺感懷時事 王佛生

歷歷興亡不壞身。萬方多難一登臨。頻年原野淹膏血。此日衣冠誰主臣。華表再來應有語。紅羊過後亦何心。河清海晏終難俟。望斷昇平作幸民。

酬何小亭君

仁山

大隱居官不染塵。胸懷坦蕩善爲珍。能將國事如家事。自識前因與後因。萬里河山知是夢。一堂兒女豈云真。想公久悟無生境。故到迷途一指津。

西山

燕咫尺

老僧含笑啓松扃。庭樹低枝掛酒瓶。蕭寺偶隨雲共住。好山能與眼俱青。北來氣勢洪河壯。寺僧言永定河泛漲寺產淹沒。南望江關戰血腥。時津浦路不通。準擬扶桑問歸路。孤舟雲海一浮萍。余將由安奉路取道日本轉滬。

九日登奉天天柱山

前人

樹杪紅牆雲漢間。奇峯如柱水如環。林泉有分容專享。歲月從天貸一閒。已與黃金盟斗酒。更無清淚灑牛山。滄桑祇是尋常事。斜日荒陵碧蘚斑。清太祖陵在天柱山。

題妄清居士軍人軌範

陳武初

大千世界一同情。識透因緣是妄清。曾作宰官都頌佛。卻攜經卷久隨營。家居遂被
織兒誤。世亂輕成豎子名。浩劫狂歌天地閉。得逢居處六通明。

紀夢（時乙丑十月十二夜）

蔣特生

患生肘腋淚沾襟。電掣雷轟夜雨淫。誰是救星解苦厄。幸逢慈父降甘霖。世味都從
濃處淡。道情竟向淺中深。奪旗斬將牢關破。稚子門前報好音。

乙丑歲莫雜感

甯墨公

家家爭唱清平調。南北東西各一腔。老去攪駒增馬齒。忘歸野鳥倦鷗江。却教大夏
翻新歷。仍剪宜春貼綺窗。寄語天涯名利客。人間福報本無雙。

兒童遍植鬧春旗。冬去春來三月期。酒債多於詩債日。治民難比治軍時。數聲郵鼓
增離恨。兩度蠶書（是年兩受馬匪以毒信暗殺）識境危。記取邊夷存異俗。憑將雞占
決猜疑。

石碑寺懷古（寺在楚城西六十里今廢僅有高量成德蓮碑）

前人

石老碑殘賸劫灰。高家相業任雄恢。神州無主漸夷狄。荒詔何人闢草萊。奇蹟自能
侶寶囊。空聲端合吊城隈。（台北有德江城相傳段氏築此封之）夷中君子今安在。祇
見斜陽天外來。

念佛樂

覺華道人

佛心天子梵心臣。端拱無爲上理臻。萬德莊嚴垂一語。十方清淨絕纖塵。都俞欲笑
盈庭盛。官禮方嗟建國勤。徧界蓮花誰得似。眼前躋躋盡天人。（君臣念佛之樂）

何須慈孝說人間。樂地家庭勝樂天。老境安閒忘歲月。兒曹快活笑神仙。春風杖履
經行處。玉樹芝蘭善現緣。龐蘊公婆靈照女。誰疑父母未生前。（父子念佛之樂）

胞同法界久思量。况復親隨在一堂。中道死猶懷彥道。季方生肯負元方。塤篪迭奏
琉璃地。花萼同超日月光。會向樂邦攜手去。雁行千子拜空王。（兄弟念佛之樂）

一期伉儷了無生。道是無情亦有情。現在世堪稱玉友。再來身只作金昆。晨鐘暮鼓和鳴樂。錦瑟瑤琴淨梵行。好是異牀同入夢。虛空樓閣影雙清。（夫婦念佛之樂）

觀音勢至比何如。善友同安此淨居。攻玉手存施戒後。斷金心見信行初。勾消文酒情場事。投報瓊瑤淨土書。如此結交真快極。人間天上兩型模。（朋友念佛之樂）

等向人天幻現來。悟心方便喜頻開。似聞金鼓醒凡夢。勝讀丹經養聖胎。虎踞龍蟠獅子座。鵬搏鷗化大蟲才。便教地獄重重破。劍樹刀山不許栽。（一切有情衆生念佛之樂）

你若無心我也休。清風明月共登樓。花能領薦觀含笑。石解名言亂點頭。山意嵩呼曾異曲。水形巴字恰同流。紛紛瓦礫供詞辨。道在蒙莊得似不。（一切無情衆生念佛之樂）

流水行雲處處通。揭來飛錫又三峯。良朋競羨山居樂。幽鳥一聲天地空。醉把念珠防我懶。閒拈詩筆爲人工。松風一枕剛尋夢。慚愧天明覺世鐘。（自樂其樂）

示曹法開（法開以靜坐常思已過閒談勿論人非二語題寢室中詩以廣之）

前 人

一句彌陀作麼持。與君約略話玄機。慈悲豈辨人和物。精進常忘食與衣。靜坐不違思已過。亡言無暇覺人非。娑婆客寄鄉心急。極樂何愁不早歸。

乾坤無地可安身。身在桃源轉問津。問字兒童親法眷。噪花禽鳥集賢賓。粗衣糲食隨緣具。流水高山得趣真。何事此中空洞久。更容物我許多塵。

題徑中徑又徑

前 人

軟紅塵裏宰官身。變現琉璃地上人。徑路修行千古少。門庭施設一番新。皇皇帝典欽開卷。切切婆心助轉輪。珍重持名能事畢。蓮池而後此傳薪。

題淨土資糧集

前 人

十界周游愧往生。還鄉今日打包行。聚糧且自籌三月。歸路無須問百城。步步蓮花承足穩。重重樓閣現身清。我身佛力因緣勝。絕倒僧祇道始成。（往生章）

生是蓮開火裏身。肯隨萍梗溷風塵。潮音月應輪迴海。花事風吹徧界春。省識唯心金口訣。安排對影玉毫真。大乘根性應如此。福德因緣本異人。（起信章）

斬釘截鐵放屠刀。粉碎空虛鑿不牢。三界眼花回蝶夢。萬行心樹委鴻毛。那知外道聲名競。縱住邊城氣分交。拚却一期窮性命。程途百億豈辭勞。（矢願章）

愚癡早辦太常齋。菩薩心腸得得來。何肉周妻齊斷絕。八關十簡漫疑猜。一眞了證羣靈共。三業消歸六字纔。有相佛仍無相作。免教剎利歎奇哉。（齋戒章）

百歲光陰醉夢過。幾人心地早揩磨。運如陶甃珠常數。癖似梅詩句屢哦。人命信關呼吸重。佛身生怕別離多。永明十萬無餘欠。後不承先恥若何。（日課章）

本來無上甚深禪。死句何勞教外傳。見佛慣嫌觀相贊。問誰肯作話頭參。明明有眼水成水。恰恰無心月在天。一任旁人紛棒喝。杖蓮安步紫金蓮。（兼禪章）

不因桐邑分明指。誰識蓮池徹困心。一代宗工禪淨合。再傳居士願行深。當時想見天開泰。此會還同日照臨。慚愧後來衣鉢具。葫蘆依樣得金針。（總頌）

永明禪師四料揀衍義

前人

有禪無淨問如何。千萬人中半個多。頓悟每成狂慧去。重迷無奈隔陰磨。三生共話悲靈石。五戒空持惜老坡。最是罷參裴相國。於闐國裏又奔波。

無禪有淨也無妨。一念終歸極樂鄉。功德水除心上垢。須彌山靠法中王。但聽合塔鸚哥叫。應笑生天蟻子忙。插架往生聖賢錄。支天匝地放毫光。

有禪有淨此何人。現世人師祖佛身。父母未生三際斷。彌陀現在一行真。馬鳴龍狂精神會。勢至觀音骨肉親。試看閻羅爭頂禮。不須金粟問來因。

無禪無淨太無緣。夢夢浮生枉百年。一失足將淪地獄。再來身已判霄淵。名疆利鎖重重具。走肉行尸故故憐。自是有家歸未得。逍遙方羨大游仙。

西方十異

前人

娑婆國土無男子。兜率天宮有女人。何幸遠離閨閣物。此番真是丈夫身。光明相好皆全具。福德因緣絕等倫。遙想妙花成世界。出家方羨在家真。（惟男無女）

一切輪迴因愛欲。從今斬斷絕根株。神通自在身何礙。善友扶持道不孤。斷去來今三際了。掛衣食住一毫無。猶存勝妙知誰屬。決取牟尼頂上珠。（無上欲心）

別開生面色塵中。本地風光只佛同。彼土有邊宜有量。是鄉無始亦無終。倒持魔印行難壞。常住家珍用不窮。八解漫疑渾未得。從來樓閣是虛空。（處所不退）

古今屈指幾彭殤。帝夏皇春夢一場。不死競尋方外士。無生誰信法中王。清甯識透乾坤性。盈昃差稱日月光。如此上生無量壽。那知法界有無常。（壽命無量）

黑繩地獄守絲牽。念起毫釐總挂纏。妙造三清仍障礙。沈迷五濁豈超。從心自證無生忍。到耳都亡不善緣。清淨本來歧路絕。任他人贊火中蓮。（永離惡道）

果然八苦受全消。地入如來快一超。俯仰十虛月對鏡。留連三月勝聞韶。無邊佛土供遊戲。有限魔天付寂寥。却有一般慈憫受。海航飛度業海濤。（但有樂受）

六根清淨匪從他。况復塵塵總不差。一色一香含一道。無聲無臭載無涯。淨琉璃現真金相。如意珠歸正法華。回首天人多異趣。不堪迷悶眼前花。（六塵清淨）

窮途輾轉愧多生。血肉何堪戀有情。千葉蓮中身忽現。一莖草上意先明。玲瓏瑣子菩薩骨。般若金剛古佛心。無始劫來胎藏苦。這回解脫報恩深。（蓮花中生）

生徧人天缺導師。傳聞八難不勝悲。遠游怕返憐兒醜。救苦尋聲賴父慈。好鳥入林天鼓震。落花流水藏文摘。法門路路超生死。萬善同歸問有誰。（水鳥樹林說法）

願生安養絕他求。不得菩提誓不休。捷路果超千佛頂。歸家全帶衆生頭。心空及第均無法。口決隨機豈有憂。便認此身成佛去。自加保任自綢繆。（定得無上菩提）

蓮友林徵德自學佛以來修持無懈別後纔三月舊疾復發臨終端坐念佛三

點餘鐘安祥而逝

黃謙六

生死無際奈愁何。石火光中幻化多。三月別君歸樂國。微塵留我尙娑婆。不求丹竈千年藥。但認青枝一朵荷。如子精勤斯可矣。臨終端坐念彌陀。

至加東楊雲溪君別墅

（太虛）

閒駕風車向郊野。忽從塵市入山林。幻形偶在人間寄。樂土還宜海外尋。一路蕉香

薰欲醉。兩行椰葉綠成陰。混然不用華夷辨。涵蓋乾坤只此心。

題樟乳陳文烈君別墅

前人

心海潮中騰覺。此音今在海潮心。天風浩浩閒吟引。瀟雪翻翻冷意侵。沙上不妨人偶語。榔間也許客相尋。避秦莫作桃源夢。常住靈山無古今。

自星洲至柔佛

前人

百年星島關炎荒。海上行車架鐵梁。一嶼蒼茫柔佛國。萬民淳樸古義皇。桃花源裏不知漢。蕉綠陰中猶說唐。白日火馳亦良苦。盍來林下共清涼。

次長兄大圓贈智純居士原均

唐蔚熊

枕漱林泉翼道宏。高風不讓聖之清。笑談龔絕人天法。福慧常輕水月名。久盡儒經明有待。深鑽佛典了無生。會蒙化雨兼私淑。共羨成連萬古情。

寄唐大定居士

譚道

且自儒冠且學禪。君家兄弟久稱賢。唐衢善哭應憐世。賈誼多才孰比肩。滯染毫端

紛倒峽。廣長舌底妙生蓮。娑婆四衆無邊苦。普渡慈航救大千。

中元有感

前人

慶月偏增客子哀。他鄉王粲獨登台。偷生久曆滄桑變。枉死都爲水旱災。舍肉也會
思考叔。愛蓮空自憶如來。享先未遂悲何極。雲滿青天望不開。

感懷寄石鈞季弟

前人

莽莽乾坤一戰場。西來鱗介太披狂。化爲孤鶴山河在。夢到華胥日月長。今世未容
分黑白。何人堪與話行藏。故園久已無消息。悵望雲天幾斷腸。

呈端效老和尚

前人

覓就人間安樂窩。寶爐清磬禮彌陀。白雲深處容聽法。黃葉叢中好放歌。四大本來
空色相。三心叵得證波羅。明明造化無他妙。萬象包藏一朵荷。

和王保書游法相巖原韻

前人

昔年曾向此間游。屈指光陰又幾秋。遠近松風真謾謾。潺湲濟水自悠悠。懸崖歷落

隸書在。（岩門石刊有金剛經隸書）前洞依稀屐齒留。古刹淒涼名宿住。（岩左有武岡清代名士鄧彌之鄧保之兩公祠）夕陽斜照滿荒邱。

村居吟（十首之七）

愚谷遺作

古木林中書掩扉。全無是是與非非。松花滿地蜂常聚。草色當階蝶亂飛。市井朝朝人事換。鄉村日日稻苗肥。經書一卷看初罷。又聽鐘聲送夕暉。

鳥窠曾以樹爲家。我寄園林已可誇。案有經書窗有竹。壁多古畫院多花。唯心妙訣參延壽。證道長歌愛永嘉。欲識老僧村住旨。池塘野水跳蝦蟆。

牧童村外語三三。千翠深藏一古簷。小徑露濃肥紫豆。後園霜重熟紅柑。鉢盂有供思來處。草木無言卽妙談。卍字隨緣常魯鈍。人皆笑我太愚憨。

退休何必定深山。且喜幽清絕市闌。黃葉落時常不語。白雲飛去那知還。聞明覺性鳴鶯妙。悟契真心流水閒。樂住已如安養國。是非人我一齊刪。

真機了了本無迷。汲水烹茶傍小溪。鋤草獨留新種菊。栽蔬滌盥舊來泥。根塵脫略

忙閒裏。心鏡平沈物我齊。五蘊原空惟自縛。消融何必藉靈犀。

千株秋樹一頭陀。坐破蒲團作妙歌。最忌鐵牛沈巨浸。要明香象渡恆河。麻鞋帶路懸青壁。竹杖如烟倚碧蘿。欲會瞿曇言外旨。悠悠野水淨無波。

滿園綠竹一房書。和雨和烟愛種蔬。有菊已同陶令宅。無山不讓遠公廬。超塵擬比冲霄鶴。避世獨如觸釣魚。不是耽閒成痼疾。爲虞空擲好居諸。

懷院長太虛法師

大醒

轉眼滿天風雪時。登樓悵望憶吾師。來霑法雨剛三月。已見梅花發幾枝。祇樹園中誰管領。海潮音裏說安危。雲蹤算教湖山絆。也望扶搖駕鶴歸。

宿南京棲霞山

幻生

憩宿高樓傍翠巒。星光寂寂夜漫漫。室中雲集禪燈暗。枕上詩成香火殘。一棒鐘驚三世夢。半窗月照五更寒。名山小住原非易。不有因緣到亦難。

山居詩（十一首之六）

南洲遺著

半山半水稱幽居。烟樹叢中搆竹廬。幾片雲霞依仗履。一天風月伴琴書。時烹瑤草心無累。日用菩提樂有餘。偶向松關閒散步。溪邊綠柳罩游魚。

隨處棲身隨處休。人生知足自無憂。培筵結蔭堪舒嘯。綴衲遮寒不羨裘。徑曲何妨蒼蘚沒。山深常有白雲留。乾坤多少英靈子。誰肯相從枕石頭。

酷暑侵人晝正長。滿池風送藕花香。松梢蔭日猿歸洞。屋角營巢燕語梁。芥子點完常補種。田衣破盡不栽桑。閒來共坐茅檐下。詩草頻敲笑語狂。

萬山深處少鳴蛙。喬木森森野衲家。禪座全憑長麈尾。充饑還賴老藤花。草生鳳翅蹊將合。茶煮龍團味自嘉。早晚窗前清課後。閒攜竹杖問烟霞。

茆屋三間到處陰。松杉十里碧沈沈。千巖瀑響常疑雨。六月寒生不去衾。蘚滿空階來客少。蘿纏竹架落花深。自知老至趣偏遠。短髮何妨霜雪侵。

村莊數畝隔溪灣。長夏耕紉事事艱。人壽幾曾百歲老。世間不肯一時閒。就岩選石堪趺坐。伐木編茅且住山。纔看白雲來嶺上。檐前又喜鳥緡蠻。

丁卯消夏靈隱

太 虛

靜晝敲殘一局棋。飛來峯外獨尋詩。冷泉盈掬寒生齒。怪石成林翠撲眉。洞裏閒窺天一線。池邊小立雨初絲。壑雷乍震炎氛淨。恰是清涼自在時。

爲靈隱玄堂主題綠天菴懷素草書

前 人

不上廬山忽二年。又因浣暑到湖邊。觀雲聽雨聊云爾。憤世憂時亦偶然。靜裏天機懷素草。客中秋興杜陵篇。得心應手臻神妙。都入石門文字禪。

韜光訪圓淨居士次韜光禪師韻

前 人

汲得山中竹引泉。煮茶飲罷倚松眠。靜觀綠葉成紅葉。欲伴金蓮種玉蓮。古洞藏雲遙瞰海。修篁蔽日漫連天。萬緣息後無他事。一片冰心供佛前。

倦游

象 賢

年來楚水復吳山。杖笠未能半日閒。明月院中四五友。清風江上兩三帆。霜鐘冷叩異鄉夢。塵鏡寒開老客顏。海角天涯幾踏遍。爭如歸去掩禪關。

和一厂上人原韻

前人

浮生幻夢今猶昔。老大葫蘆已十年。兔角徒撈海底月。龜毛漫縛激流船。獅蟲徧野
僧倫數。獸慾橫天魔法專。願此昏沈風雨夕。寒關遐思不成眠。

清明懷一厂上人

前人

君在吳中我在甌。去年鄂渚憶陪游。綠陰遮日蓮溪寺。碧浪浮天黃鶴樓。別後江山
誰作主。論懷風月孰爲儔。閑吟淘井東坡句。聊把新愁解舊愁。

步韜光禪師韻

玉皇

日將竹筧引流泉。餘得閒情倦自眠。世上途窮都白眼。草中味苦數黃蓮。狂心歇處
原無佛。人道傷時那有天。北去南來爲甚事。分明馬後又驢前。

莫春雜感

淨山

一年容易又春殘。坐對孤檠淚暗彈。世事炎涼增感慨。滄桑變幻漫辛酸。一心免俗
猶達俗。三界無安強作安。此日生涯潦倒甚。交貧宜在淡中看。

山海關

燕咫尺

一絲風磴九霄懸。帶雨鳴駝破戍烟。野火遠侵征雁影。老兵閒說射鵰年。關門北據榆山險。睥睨東窺海島船。舊鬼無歸新鬼怨。可憐莢豆尙相煎。

朝鮮京城書事

前人

長安西望使星微。易水歸人哭白衣。（韓人素著白衣此指安重根事）台殿久荒麋鹿壯。（昌慶苑爲朝鮮行宮今李氏王孫居此而日人以動物園附焉）冠裳如昨漢唐非。（景福宮及昌慶苑陳列漢唐古物）參軍帳下百蠻語。舞女樽前羣燕飛。惆悵兩京舊王子。扶桑不長故山薇。

宮島

前人

紅葉蕭蕭畫掩門。蠺牆鱗瓦作新村。探珠淵客乘潮去。出海鹽田待日暄。水國雲陰接龍氣。里人歌調雜禽言。社燈幡蓋何年寺。微石鐘聲似故園。

和玉皇禪友贈妙峯菴王生墻落成韻

太虛

野老何須蹙一塵。堂堂無位露真人。妙高峯半龍酣戰。壞劫灰中火又新。鯤化曾經九萬里。龜年豈羨八千春。立錫留得烟霞地。况有梅花更不貧。

靈隱度夏臨別次玉監院均謝慧老并首職諸師

前人

白浪黃塵莽送迎。勞人笑又涉途程。回天望切慈悲佛。遍地哀深草木兵。且喜有緣曾目擊。未能無住奈心生。塔中半座承分我。五百由旬賴此城。

生公講台

前人

曾聞四傑韻風流。說法何年到虎邱。漫道關提無佛性。却教頑石能低頭。講台寂寞蒼苔厚。古塔虛寒白日浮。嘆息利那塵劫換。晚鐘聲度水雲悠。

奉和鼎鈞兄原均

前人

臆隴欲寐寐難安。旅舍淒涼客夢殘。亂日苦多治日少。順親容易報親難。沾名釣譽非吾願。學佛參禪境自寬。世態炎涼何足論。匡廬面目此中看。

游南普陀

包樹榮

漸見斜陽下遠陵。平蕪秋色暮烟凝。名山客屢來游屐。古剎僧方上佛燈。寶鐸含風天外響。危梯穿石洞中登。閣浮淨土談宗派。到此應參大法乘。

山亭秋望

前人

秋空浮碧淨江天。幾點風帆下界烟。欲醉山中千日酒。來聽樓梢百重泉。一亭葉落紅如錦。萬壑雲生白似棉。自笑慣成麋鹿性。倦時還傍石松眠。

和太虛登翠微亭飛來峯頂原均

玉皇

九里松關一徑尋。靈鐘破曉澈幽深。飛來不滅天然趣。到此俱生淨梵心。白法細論騰義海。翠微高揖出雲林。萬緣空處全無事。落得閒情喜共吟。

弔大休居士

幻生

大休居士有高風。奇邁英姿渾自雄。萬念絕超三界外。千秋盡付一盃中。詩傳海內心何恨。身現人間意早空。此後武岡花月夜。有誰把酒吐長虹。

感懷

林浮沚

舊向蓬萊學種柑。芳懷根觸憶江南。雕龍有客編瀛海。捫虱無人臥草菴。抵死難逃偷藥兔。捨生自縛吐絲蠶。木樨空處披襟坐。十葉華嚴仔細參。

贈義通上人

昭誠

人世浮瀛觸處空。指天問月證禪功。好憑怖鴿棲葦剎。靜聽馴獅吼梵宮。八覺真能超苦惱。三飯至竟算英雄。潛心得似蓮花潔。料有西方路可通。

和太虛登翠微亭飛來峯元均

懺華

探勝甯辭拄杖尋。冲寒曉入翠微深。高峯靜似修空觀。初日紅如發大心。願盼始知低嶺巖。栖皇幾欲老雲林。何當遍種菩提樹。趺坐閑聽萬籟吟。

出靈隱山門仰望飛來峯賦呈太虛上人

前人

鷲嶺聽完午夜鐘。飛來此地作靈峯。披雲遠峙諸山外。妙相常呈翠靄中。古洞幽深供壁觀。蒼岩合沓託孤筇。高寒久絕游春屐。聚石呼猿試感通。

贈陳維東

趙會傳

世界恆河不盡沙。談空枉自住毗邪。手持香積如來鉢。身上銀河博望槎。酒肉豈能妨佛法。海天隨處是吾家。閑雲野鶴無心久。肯嘆汪洋未有涯。

客星洲龍山寺與性願法師聯吟述懷

釋義通

我願無窮固且堅。三心圓發了塵緣。法華香遍清涼地。皓月光臨自在天。聞法可能書海墨。修禪何用買山錢。如今得見燈明佛。若取當陽在眼前。

不住死生與涅槃。雙兼悲智願如山。聞經直入三摩地。說法橫超一字關。佛土莊嚴融萬德。家鄉安養約同還。從茲遙赴蓮池會。笑把塵緣俗慮刪。

海闊天空暢壯游。丈夫迥自出凡流。長驅南岳風柯馬。倒跨瀉山水牯牛。道大隨人皆有得。心平於世總無求。澈開圓顯清涼月。照破塵勞萬斛愁。

此身可厭臭皮囊。蘭麝熏衣也不芳。是處迷津皆覺岸。欲離苦海仗慈航。娑婆作客知歸好。安養爲家居住長。願學大雄大無畏。橫超生死到西方。

立秋日和王師原韻

比邱尼靜山

梧桐一葉落秋聲。雨洗芭蕉暑氣平。北往故交音寂寞。南來征雁影淒清。道心每自靜中悟。佳句多從枕上生。彼岸咸登未嫌晚。回頭苦海淚如傾。

邀荃甫春舫以莊容伯過集芳榭室開士來書因其尊人忌日不到答以長言

燕咫尺

相約峨眉作勝游。恍然蒼翠眼前浮。詩隣舊有長庚和。酒社新同元亮謀。忽報鯉庭逢忌日。更承魚素慰離憂。白華補罷君心苦。論句還推最上流。

次均答開士

前人

夢裏吳江說舊游。歸來桑海共沈浮。虎溪僧送淵明過。馬磨人同許靖謀。月詠夜窗融法相。天臨杞國費端憂。眼前餘子何勞數。奇進終輸第二流。

次均簡開士追懷梅修

前人

吳門烟月昔同游。不繫舟如一葉浮。楚尾怕談歸去事。菟裘難竟老來謀。蘧廬大夢真先覺。蓮社高賢更隱憂。回首天涯同賃廡。詩成有淚向君流。

原均書懷簡開士

前人

閉戶能爲物外游。綠光海氣自浮浮。身閒入市分花種。才退無心與馬謀。止酒初非元亮意。傷人深慮孝章憂。世緣放下知何日。許聽鐘魚伴法流。

大雷雨次前均

前人

好書兼好酒人游。醉後深防口語浮。半枕風雷驚夢影。一年稼穡重花謀。天心無主軍心亂。地軸將沈禹意憂。何物蛟龍矜得勢。全收衆濁向黃流。

和王景岐公使均

太虛

衛國安民憶昔賢。緜緜史澤五千年。異邦已是經多難。到海終須會百川。古柏幹貞因理直。臘梅花放得春先。羣陰剝盡初陽復。待賞清和二月天。

太虛法師赴歐洲宏法賦此送之

佚名

妙理循環人莫識。東來佛化轉西傳。百蠻風雨驚神鑿。萬里魚龍護法船。直以悲心消異相。不妨行脚去隨緣。應知飛錫歸來早。無事癸公十四年。

由芝加哥至舊金山

太 廬

曉車籠捲小窗寒。玉野銀山入臥觀。一路白埋巖石罅。數峯青露柏松端。晶光冉冉浮雲散。木洞疎疎落葉斑。意逐輕烟成薄霧。邈然清味與天寬。

昨日曾從水面行。今朝山頂路尤平。遠峯深谷來窗几。淺草長松作鏡屏。百物紛陳春氣象。一車移動活基枰。脩途得此堪愉快。努力加餐慰客情。

春遲北美先南美。一入嘉州萬象新。帶在溫和宜動植。地多生趣洽天人。牛羊遍野馴眠食。花鳥迎風各笑嚙。何礙境遷心亦變。無邊光景倍精神。

飛車忽在金峯頂。四望羣山落海濱。纔喜雲光迴白日。俄驚霧氣薄車門。頃刻陰陽易昏照。霎時升降變涼暄。月灣花塢俱清絕。一片禪心印碧痕。

和友人九日感懷原均

賀民範

桑榆落魄到江湖。伯有驚人信口呼。失水鰐魚號涸轍。墜雲鴻雁困平蕪。紅羊浩劫傷心淚。赤禍橫流放膽屠。樽酒渾忘重九節。老莊原是重虛無。

李鳳岐先生夫婦雙壽

諦 閑

孝悌傳家百行先。延齡世澤遠流傳。操奇屢中陶朱術。課子今成兀季賢。海屋籌占添耦數。星河影看度聯翩。曾聞積善饒餘蔭。應是人間火裏蓮。

前呈疑問二十餘則蒙我太虛大師慈悲一一垂示捧讀之下心中大歡喜謹

賦俚詞恭呈教正

尙希賢

喜得法音解積迷。從今哲學少雜題。我原是假甯須執。物本來空那用齊。佛法皈依終淨土。禪宗擊節有曹溪。自從飛渡重洋後。吾道東來今又西。

五 五言絕句

琴川古德讚

南 萍

惠旻（字元素河東人。梵行方嚴。隱居虞山。從學者常數百人。）

嚴守毗尼律。精參貝葉經。何來從學者。峻絕此門庭。

懷述（字體如。吳人。遭武宗沙汰。大中中仍服僧衣。通涅槃學。）

百蹶志靡他。高僧自出家。青山風雨裏。閒讀妙蓮華。

常達（字文舉。俗姓顧。邑人。講南山律鈔。通老莊百家。善書。居破山寺。咸通

十五年聚衆告別。合掌而逝。）

內外學全通。轉參無字中。語君君自會。日出萬方紅。

彥稱（邑龔氏子。居破山。戒行清苦。虎中獵夫箭。彥稱爲拔之。年至九十九。）

同體慈悲切。虎身拔箭時。還將度人手。般涅槃無遺。

晤恩（字脩己。通天台教。建宗教院于破山。懷述常達彥稱晤恩是爲四高

僧。墓在破山。）

具得生公舌。頓化頑石頑。說法渾無說。靈鷲作開山。

了通（棲智林寺。隨衆嬉戲。一日通州狼山寺火發。其衆見烈焰中一以袖撲滅火。自稱曰智林寺了通和尚。明日衆詣智林謝。過了通出力辭無之。既而沐浴告逝矣。）

智林仍舊坐。那個說狼山。撲火非非我。時言時不言。

希辨（吳越忠懿王子。出家居寶巖寺。太平興國中。隨王入覲。賜號慧明。敵屣帝王家。寶巖寺出家。原知師悉達。淨土變爲家。

道一（俗姓陶。居智林寺。化于淳熙壬寅。踰月毗茶。舌根不壞。朝散大夫。李念祖。有道一禪師火蓮記。）

常懷普濟心。熟念彌陀佛。東土妙蓮開。西方極樂國。

清瑛（號石屋。邑人溫氏子。得西峯及庵指授。居霞霧山三十載。有山居吟。石屋語錄。）

不見石屋語。那來山房吟。虛靈無一日。只自會本心。

妙聲（字九皋。洪武間人。學綜內外典。居慧日寺。有集七卷。）

七卷云何說。我今領會得。語君君試聽。開口一聲咄。

貞誨（俗姓包。邑人。居龍興寺。日誦法華經二部。終身無間。）

混如常不輕。持誦法華經。近日龍興寺。流泉出梵音。

寶安（姓夏氏。風神爽拔。年一百十八歲。）

林下依稀想。丰神俊拔人。畫圖雖自好。猶未十分真。

空山（興福寺僧。嘗居功德院。被太宗眷。資寺壞復新。）

明君雖眷注。彌自覺尋常。一笑無功德。菩提性體彰。

日章（常熟張氏子。洪武初。以高僧選。奉旨就天界山說法。）

不待開經說。無邊妙法宣。慧根人自悟。枕石聽流泉。

鼎用新（居慧日寺。洪武六年。倪雲林來訪。作虞山圖贈之。）

舊有獅林契。來從慧日游。披圖山外想。鐘磬一聲幽。

孤松秀（邑蔣氏子。出家游峨眉。天台。雁宕。棲仙巖。之休糧庵。歸老虞山。有

秀道人集十二卷。富于詞藻。）

詞藻非云富。青山見舊游。雅多老古柄。禪侶作詩儔。（亦方便度人意。非拘執於翰墨間焉。）

海舟慈（邑錢氏子。出家破山寺。聽講楞嚴。至但有言說。都無實義。歎曰。即

今言說如何愈多。後參東明。昆公。嗣法闡化。）

坐得盤陀石。楞嚴達旨微。君聽流水響。猶自說玄機。

洞聞乘（吳江李氏子。少侍達觀大師。隨居維摩。卒。老破山。澗月膏從請益。

牧雲其所剃度。）

敬師若敬父。出世師恩多。一片報親志。深山禮佛陀。

無著昱（蜀人。居破山興復寺。人崇信之。）

禪寺煥然新。瓦磚不昧因。山門彌勒笑。來客佛歡迎。

鉢庵信（嘉興人。堅持毗尼。晝夜禮誦。繼無著住破山。

念念出塵網。心心歸佛乘。木叉度守戒。法眼古今澄。

等慈潤（吳興人。姓錢氏。少負文藻。耿介重氣。削染於雲棲。游虞山。瞿元初

延居拂水老焉。）

料得雲棲法。虞山復舊規。漫嫌文字習。淺語出深悲。

費隱容（閩人。從密雲參學。有得道法大行。屢主名利。晚住維摩寺。）

參學得無得。本師說無說。道法大行時。我聞如是訣。

牧雲門（少投洞開。乘出家。得法於密雲。歸住破山。能詩文。善書。著懶齋集。）

雲師歸住後。花木再逢春。自覺禪房句。悠然得趣真。

漢月藏（錫山蘇氏子。幼讀書。聞師講浩然之氣。卽投袂而起。神思慨然。出

家居三峯。晝夜參究。立百日死關。忽昏眩。嘔痰斗餘。放身熟睡。五

日後開窗外折竹聲。遂大澈悟得天童密雲悟印證。道法隆盛。兼通儒書。有材略。老於鄧尉山。三峯自漢月。薙草開林。繼其後者。頂目徹大樹澄。漢月弟子也。豁堂品中與範。槩庵志碩揆。揆漢月法孫也。漢月十二弟子。莫著于具德禮繼起。儲槩庵嗣法於繼起者也。碩揆嗣法於具德者也。

日養浩然氣。浩然歸佛乘。精研三藏理。萬古獨傳燈。

槩菴志（姓熊氏原名開元。嘉魚人。登進士。歷任吳江崇明令。擢給諫。論時相周延儒。廷杖戍杭州衛。鼎革後披薙。待法於靈巖。繼起儲委住三峯。著諸方語錄。槩菴別錄。魚山剩稿。）

剩稿語別錄。一齊刻諸木。大都發靈苗。本心原具足。

碩揆志（鹽城孫氏子。少辭親出家。依具德禮。參究有省。歷主徑山。三峯。靈隱。祖庭。天性高邁。圓機慧辯。孤行側出。嗣法弟子。鍊飛量明巖照。

青雷震等三十人

清辯瀉瓶水。祖庭成作家。明朝無一語。深坐碧窗紗。

截流策（奉雲棲法。念佛脩淨土。力矯狂禪之弊。）

相問莫問狂。携手入禪堂。但念彌陀佛。蓮邦樂未央。

雪爐冶（邑陳氏子。薙染侍槩菴志。住黃山數年。歸住白雀寺。）

薙染披緇日。爐香禮佛年。槩菴師法好。到處學參禪。

玉林琇（江陰楊氏子。初至磬山薙髮。繼住武康報恩寺。宗風大著。母繆亦

出家。琇立草堂終養焉。順治戊戌。召入內殿。問如何是孔顏樂處。

琇云。憂心悄悄。慍於羣小。封大覺普濟禪師。游虞山。拂水之勝。建

藏海禪院。爲塔葬母。）

老僧不忘母。所記在襍俶。度盡衆生親。此之爲大孝。

道源（字石林。婁江許氏子。居郡城北禪。晚歸虞山。禪講之餘。博極經史。

有詩文集佚其名）

法意）

垂手入塵時。略將外學知。內心無聖念。一例是檀施。（本法華經資生事業皆正順

鶴林寂（嘉定趙氏子。從雲棲宏得法。乃縛禪于廬山。游少林。禮五台。來虞

山遁蹟藤溪。株守經律。晚歲住福城。成浮屠七級。著金剛疏義。合

頓漸而一之。

一聲青玉尺。離席說金剛。公案翻花樣。疏鈔獨改良。

鑑堂圓（孝豐許氏子。初參徑山雪嶠信。又從瑞光頂目徹參究。有省。卓錫

三印菴）

精參最上乘。飽歷幾艱辛。直到水窮處。花明村外村。

雪鑑意（平湖張氏子。依繼起儲參究。後承古雲傑記。朔開法秀水棲真。繼

主破山甘載。年逾六十。猶腰包行脚。疲於津梁而化。入破山北崗

塔)

老年腰脚健。六十化津梁。師學趙州意。至今塔字香。

雲漢滿(張姓。邑諸生。嗣善權。浮石賢。在福成提論楞嚴。建大法幢。)

悟得楞嚴旨。來脩大法幢。有緣同領會。一月映千江。

覺滿盈(剃度於三峯大樹。後居長壽庵。兼通內外學。曾爲豁堂座首。領衆

念佛。)

無事豁堂來。恍留鐘鼓催。其生最方便。念佛法門開。

贈別願醫士之新浦四首

大脫

把袂已嫌遲。分襟何太速。飄然去海濱。一洗蓮花目。
雲臺高隱地。君去定頻看。莫上金牛頂。天風過處寒。
白社逃禪客。青囊濟世心。瘡痍仍滿目。望爾作甘霖。
草聖顛何礙。虎頭癡不妨。他年飛錫去。東海覓韓康。

見大鐵籠內羣雞爭食有感

釋華山

罔念湯鍋近。祇知見食爭。無由求出路。徒自保餘生。

洪山避暑雜詩

太虛

我本山中人。山居我所愛。白雲自去來。無罣亦無礙。
江城枕落日。烟火幾千家。憐彼昏昏者。黃梁夢正賒。
三界本無安。猶如火宅聚。心清境亦涼。頓失鬱蒸苦。
塔勢何崔嵬。孤高聳雲表。未登最上層。已覺羣山小。
秋夜淨無塵。月明星似火。天空一鳥飛。疑是金烏墜。

詩禪門影並序

大滄釋敬安寄禪遺著

余集中有題寒江釣雪圖絕句云、江寒水不流、魚嚼梅花影、適龍陽方伯遜叟易公見之、與公少作垂釣詩、水面微風來、吹動青山影句、暗有契合、遂蒙印可、丙申秋杪、余由香巖岳觀瀑、登九折崙窺石鏡、顧影懷人、疊均爲二絕句、招公游瀉、公遺其公

子哭庵觀察先至、相與攬大瀉巖壑之勝、凡四日復由蓮花庵謁張魏公父子墓、沿黃木玉堂兩江出桃花庵以抵麓山、挑鐙論道、擊鉢聯吟、各得影字韻絕句七十首、因併錄一幀以紀影緣、

招遜叟游瀉山

大瀉有石鏡。光含一山淨。公能踏雪來。共照梅花影。
重巖好卜居。看取寒山淨。清清瀉水中。添個茅庵影。

大瀉夜坐懷南嶽舊居

雷雨洗南天。星辰皎然淨。云何太虛空。忽現蜃樓影。
回望祝融峯。葛藤俱斬淨。誰識吾胸中。蒼茫雲海影。
昔時行道處。紫蓋浮雲淨。遙憐孤月明。寂寞綠蘿影。
三年冰雪寒。七二烟巒淨。淒迷望衡心。九轉湘帆影。

夜讀哭庵三魂集皆忠臣義士聖鬼靈仙之作吃閑黎舌橋不敢下忽于無意

中得影字十五六疊二首哭庵幸無哭焉

忉利帝釋居。曼陀花雨淨。誰令藕孔中。竄入修羅影。
海上烟塵昏。天河洗難淨。惟將千淚痕。散作三魂影。

與哭菴論楞嚴得四偈並寄遯叟

浮塵本無根。佛土由來淨。大圓鏡智中。不著聲聞影。
妙性日天然。不垢亦不淨。生死與涅槃。等是空華影。
阿難聞楞嚴。法眼卽清淨。矚彼演若多。迷頭而認影。
遯叟個中人。七處徵心淨。六解一俱忘。不戀前塵影。

同慶寺禮開山祐禪師塔

前生誦法華。安樂行已淨。青蓮徵吐香。丹嶂自開影。
峨峨祐公墓。花雨諸天淨。千載肉山存。長留多寶影。

唐宰相鄭愚爲祐禪師撰書塔碑不知何時爲人所毀感賦

瀉山道猶尊。文字劫難淨。淒涼斧鑿痕。零落龍蛇影。
 一爐柏子香。滿院松陰淨。蒼蒼石上苔。猶護殘碑影。

宿蓮花菴（四首之二）

冷冷老禪心。皎皎蓮花淨。不知真如門。誰繪虛空影。
 峭壁石泉清。微霜蓮宇淨。久坐生夜寒。孤燈瘦禪影。

張子游瀉山有木落波空闌亭孤影動搖句

夫子何爲者。愛茲瀉山淨。木落已無波。亭孤猶有影。

由官山至黃木江皆峭石幽溪蒼藤古木與易子聯吟得八絕句錄五首

溪行愜幽尋。水落寒沙淨。空青湛不流。淡我鬢眉影。
 忻與摩詰游。詩中畫意淨。一幅輞川圖。青山紅樹影。
 渡溪夢痕清。過雨烟鬢淨。青山好共看。扶起嫺雲影。
 石路本無塵。松風掃自淨。登高發奇思。孤笠補天影。

悠悠黃木江。一碧涵空淨。他年懷舊游。曾鑿枯僧影。

前偈論楞嚴未竟其旨於道中復成十頌以示學者並以自警（錄八首）

若人欲了知。當了此心淨。源濁則昏流。形端卽正影。
 是身如革囊。所盛皆不淨。愚夫逐聲色。乃玩畫瓶影。
 日冷月可熱。衆濁難污淨。蟻子撼須彌。須彌甯動影。
 因心起迷悟。所見成垢淨。譬彼一燈光。皆人生異影。
 欲使六妄伏。當令一真淨。忽於大海中。而執浮漚影。
 鏡裏魔軍降。夢中佛事淨。看取龜毛繩。一繫兔角影。
 妙明真性中。無染豈有淨。染有衆生身。淨無諸佛影。
 菩提薩埵圓。波羅蜜多淨。但觀身外身。莫認影中影。

懷淨士

九蓮花自香。六欲天豈淨。不棲蓬島真。遙禮金仙影。

牟尼置濁水。濁水亦能淨。如來白玉毫。遍攝大千影。
鳥演三乘妙。水含八功淨。六時常寂光。長雨天華影。
彌陀本自性。佛刹惟心淨。願辭生死輪。早誕華池影。

宿桃花村

鐘歇一音無。燈昏孤柄淨。夜碧山蒼然。溪亭宿雲影。

與哭菴過屈子祠卽贈

芙蓉落秋榮。薜荔經霜淨。我亦傷心人。來弔清湘影。
銜石滄海深。濯纓滄浪淨。三閭與三魂。合寫空山影。

麓山

遙聞靈籟鏡。近覺詩禪淨。紅月二月花。青松六朝影。
陶公勝跡留。晉代招提淨。古木纏蒼藤。猶疑老蛟影。
淙淙流泉曲。黯黯幽篁淨。山鬼帶女蘿。嘯入青楓影。

猿啼烟霧深。月出樓台淨。夢乘白鶴飛。衝破青天影。

麓山晚眺

日暮蒼翠紫。霜楓紅轉淨。夕陽如畫工。畫出秋山影。
清霜白露寒。暮色窺人淨。紅葉滿天飛。疑是秋魂影。

贈哭菴觀察

多生結習深。綺語懺難淨。君本慧業人。珍重優曇影。
文殊愧無文。淨名本自淨。雖見宦官身。不藏居士影。

易哭菴觀察將游廬山仍疊前均贈詩六首

匡廬天下奇。秀色橫眉淨。未能從君游。愁逐征帆影。
雲中五老峯。翠削芙蓉淨。昨夜夢痕飛。墜落青霞影。
千巖落葉深。三峽流泉淨。何日雪中來。白龍看門影。
遠公昔棲址。白業薰修淨。六時蓮漏清。三觀金仙影。

陶令醉難醒。謝公不心淨。只今白藕堂。猶畫劉雷影。
石鏡懸空明。香爐蘊烟淨。將浮九江杯。終息二林影。

廬山雜詠

太虛

嵐光橫戶牖。雲影渡林溪。蒼翠涵空碧。千峯與額齊。
繪得西湖影。匡廬寫更真。誰知衆生界。同是畫中人。

詠畜生

劉仁甫

拾此成佛資。來戴畜生面。究竟胡爲者。只因錯一念。

閒詠

前人

世間出世間。惟有一乘法。收攝入微塵。放之彌六合。
真體徧十方。不屬十法界。無往古來今。非中間內外。

珠湖晚眺

大脫

帆影帶斜陽。沙鷗飛拍拍。一竿釣烟水。閒煞笠笠客。

閒吟

伊昔曾習定。心如古井水。自度有情來。波瀾日夜起。
 青春易白髮。風燭待盡身。如何迷覺路。尙爾逐前塵。
 生盲徧今世。似象各紛言。應求無上覺。悟澈不二門。
 此道世難行。能行唯有勇。慧劍斬亂絲。庶名菩薩種。

太虛法師自海外歸來講經武漢不期而遇率成俚句以進

海角殘生

彼此飄零慣。相逢似夢中。夙緣猶未盡。邂逅大江東。
 入獄不辭苦。生公志可哀。眼看新世界。何處是蓮臺。
 白日催頭白。韶華等電流。可憐名利客。猶自話恩仇。

雨後閒眺

清風漾微波。驟雨洗殘暑。心與孤雲閒。隔岸聞人語。

慧音

大圓

烟籠湖上村。水漲溪邊樹。搖搖小舟來。撐入菰蒲去。

和彭叔榮登光明山普覺寺均四首

黃菊坡

臨老皈依佛。時艱憫萬方。中華如鼎沸。何日會衣裳。
舉世渾與濁。僧家品獨清。五洲無淨土。惟有佛光明。
未見釋迦像。先聞觀世音。我來原懺悔。那識入山林。
佛法如滄海。儒宗亦泰山。恆河與磧石。不隔一重關。

六七言絕句

立夏後旬日重游烟霞洞憶乙巳春偕李昆峯諸君子來游值山主學聖長老

初興土木長老閩人也略述生平并談禪理品茗吟詩依依而別彈指十年

長老物故已六稔矣爰步陳蘭洲仙巖石刻原韻以誌今昔之感

釋華山

衲子身貧道不貧。煙霞曾許我爲賓。十年幻夢增惆悵。無復三山舊主人。

悼月霞法師

康有爲

千載破山興福寺。六朝栝桂鬱雲烟。老僧圓塔傷花落。潭影空人更愴然。

重陽同太虛法師暨元白笠青裕如各開士游六郎莊

隱塵

雕梁畫壁六郎莊。莊乃張文襄故宅旋售於吳綬卿中丞。滿目都成茂草場。鐵

券金泥無處問。小山夕日冷重陽。

漢皋風青楚王臺。海甸仙人入夢來。海甸距莊二里許。今春季時諧開士夢有菩

薩多位由海甸至漢皋行化。此地清涼堪駐錫。大家檻樓關蒿萊。

示福弟楓橋小學

南萍

雨粟雨金造字初。原期普濟萬民書。却聽鬼哭紅窗外。刀筆生涯莫動渠。
 畫馬伯時罪還淺。綺詞山谷業尤深。不經鐵面禪師斥。兩個幾希人與禽。
 破山寺畔客年年。回首鄉關欲惘然。一樣鐘聲來耳際。如何分別是寒山。
 掃却心頭素了因。鐘無聲息我無聞。憑他八百敲邊聲。照顧生前舊主人。
 青氈生活八年中。得失風懷付塞翁。最是先生恭敬處。思量何以答羣蒙。
 無事勸君修淨業。當知惜取少年時。歸來無恙姜肱破。重賦青梅竹馬詩。

乘光和尙榔栗歸來云已結茅於匡廬絕頂歸取衣鉢再宿去留之不可以詩

送之

蓮心居士

離塵猶戀一袈裟。披向匡廬伴落霞。示我廬山真面目。長峯枯子趙州茶。
 不弄杯蘆駭俗人。便登輪舶御風行。從知日用尋常事。卽是西來最上乘。
 虎溪迎笑訂來年。願行時堅訂來年游山之約。洽我狂情喜欲顛。定向康王深

谷裏飽餐煨芋聽飛泉。

蓮社東林久寂寥。法門秋晚甚塵囂。願舒千臂兜羅手。倒挽橫流萬頃濤。

隨喜地藏菴念佛林雜詠

前人

幾杵霜鐘吼怒鯨。塵心初盡道心生。不須速證無生忍。只爲哀鴻乞癸庚。
 一句彌陀澈始終。鐵丸攢破太虛空。生西作佛尋常事。此法通時萬法通。
 蓮池靜對梵王宮。翠蓋紅裳想像中。何以後園千個竹。虛心峻節戰天風。

讚延壽菴

澄照居士

廿年絃誦留鴻爪。覲面相逢無見聞。今識華嚴法界海。本來不隔一毫分。

辛酉春季予僑居京師東華門普度寺夏仲膺居士日攜如夫人來寺談佛詢

及周德潛君出家情事詩以述之

李開侏

軟紅無際障春明。曾捲珠簾一笑迎。乞食摩登誰與證。因緣默默記前生。（德潛沈
 默厚重。生來不茹葷腥。爲家庭壓迫。誤入勾欄。年十六歸予。）

金閨門對鶴樓開。玉笛聲聲聽落梅。江水自流雲自在。神仙何處避輪迴。（同居女伴。頗以外道相誘。如大成門。瑤池門等類。德潛皆却之。）

深居相見惟言夢。夢裏蓮華朶朶新。是夢是真真是夢。未應說夢是癡人。（在鄂五年。深居不出。予亦相見日稀。見惟娓娓述夢中事。觀音蓮花幾於無日夢。竝常聞呼聲曰。須發菩提大心。殆所謂夙根歟。）

洞觀四大皆空相。不入三摩已妙明。分手渺無兒女態。和爾呼句李先生。（常告人曰。世人執此爲我。遂不惜自造罪垢。爲此身求快樂。愚孰甚焉。於佛理思過半矣。予得以專心學佛。亦德潛之所賜。）

歸命心慈號德元。愛河截斷證靈源。誰男誰女誰人我。悟到真如總一門。（陳元白君法名心慈。德潛拜爲依止師。旋皈依太虛法師。遂易名德元。並嘗謂人生不幸爲女子身。卽不啻入了牢獄。近來女子頗倡自由。遂去道日遠。惟學佛爲真解脫。）

焚香稽首同宣誓。一切如來作證師。期盡未來持淨戒。相逢合在寶蓮池。（同誓盡

未來際。不犯淨戒。仍遵佛訓。願隨諸上善人。俱會一處。

李君既聞佛。念周德元君年貌方盛。性質極良。棄之爲不義。遂昕夕祈禱。諸佛菩薩。冀德元蒙神力加被。以資開悟。如是者有年。德元不知也。恆於寤寐間。聞警誡聲。曰。汝應發菩提心。情人解釋義諦。果得開悟。出世之勇。萬牛莫挽。是非感應道交。誠求必得之明證歟。不然。以妙齡女子。幸託身於富貴之家。非有不得已之情。何能捐棄卽身現有之娛樂。受持願海無窮之苦行。有如是之猛決者乎。李君此舉。慈悲喜捨。願力解行。一時俱足。所謂一念放下。立證無生。曷勝敬服。世之老夫少妻。戀戀利。那時間之欲樂。而斷送慧命輪轉三塗者。皆可悲也。何不讀是詩。而一猛省之。夏壽康拜讀謹記。

贈圓瑛法師

人 菴

飛來龍象駐龍泉。師住龍泉寺。正是蓮華欲放天。便說蓮華經一部。教離火宅。智慧圓。

小住長安意若何。災來劫去眼前過。（時值直皖蝸爭直魯晉豫陝五省旱災）楞嚴法會因緣衆。一念慈悲功德多。（師首倡京師佛教籌賑會）

宿九江曉登廬山牯嶺

太虛

我到剛逢兵劫後。可憐焦土不堪遊。蕭寥夜半江頭月。淒照潯陽古渡秋。
旅夢曉驚涼月墮。山遊風御汽車行。九江回首塵寰遠。一路蟬聲撲耳清。

鹿洞書院

前人

歐風美雨蝕靈根。物欲紛馳道不尊。白鹿何時重會講。好從儒學溯禪源。

近江寺振風塔

前三三又後三三。一塔岢然入蔚藍。雲樹風帆明遠近。電燈高照大江南。

菱湖公園

菱鏡月移荷葉影。湖樓風送萬花香。歸車緩緩饒清興。堤上涼蟬鳴綠楊。

湖廣新報主人以壬戌之秋七月既望爲蘇東坡先生前遊赤壁之期。今復適

當其時、感時興懷、馳書提倡風雅、（鄙人）生長黃州、上年又承乏修葺赤壁、不能無言、勉成七絕六章聊以奉責、

隱塵

壬戌之秋七月望。清遊軼事說東坡。英雄一世供憑弔。知否文豪亦夢柯。
江山葱鬱自終古。直到元豐始發蒙。莫向嘉魚爭贖鼎。人間何處不東風。
觀變何如觀不變。盈盈水月總如斯。偶分物我原無我。始信前生是戒師。
彌陀公據認西方。滿戒優婆拜法王。底事網魚兼索酒。徒留遺習轉中郎。
亭臺點綴總陳陳。未免多情愛古人。我欲別開清淨宇。金剛香火是前因。
甲子人間十四週。河山依舊此黃州。不知今夕是何夕。明月滿江風滿樓。

和李塵隱先生赤壁均

空也

月朗星稀色色陳。無情亦愛素心人。維摩何事來斯土。又與羣生結勝因。
成住壞空幾萬週。劫灰堆夏下黃州。相期盡掃蚩尤霧。指日同登彌勒樓。

壬戌歲杪赴宜昌雜詩

太虛

小別漢皋逢歲尾。乍經沙市恰年頭。中流一舸渾無住。更向長江湖上游。
衝寒約伴上東山。小塚纍纍古寺環。高閣推窗一憑眺。江城已在翠微間。
草堂閒坐對寒林。杯茗傾談括古今。多少廢興成敗事。茫茫遺跡不堪尋。
峯迴水轉石彝陵。三峽門開第一層。春水未生山影瘦。清流淺淺石崢嶸。

閏五月廿八日禮三昧水懺後感成

胡湯佩琳

如來之藏空不空。心佛衆生影現中。大夢醒來圓覺後。菩提煩惱兩無蹤。
無端明靜翻昏散。欲得轉依須智斷。片念潤成萬劫生。一燈破却千年暗。

別溫州吳璧華居士並諸會友（三首之二）

大圓

憶昔靈山聽法華。同乘七寶白牛車。而今南岳天台會。應悟前緣了不差。
轉瞬光陰又日新。九秋初聚別當春。臨歧不說加餐飯。但祝蓮華徧刹塵。

隱山上座話舊有作

解凡

小隱渾如避世人。入山枯坐不知春。饒他鬼亦分新故。劫後從何索此身。

登龍馬山呈明心導師

前人

風月怡情爛漫游。浮雲過眼意悠悠。負圖龍馬今安在。想像勞人索九邱。

雙虹橋口占

前人

雙林八樹想當年。不見長虹貫日邊。今日過橋增客感。此生幾度我先。

西來禪師相見有得

前人

浮杯折葦付東流。的是當年露地牛。一念萬年彈指頃。拈花人去不知秋。

與鏡禪大師論道即成

前人

對鏡無心妙入元。離名絕相尙何言。天涯盡是曹溪路。莫把波旬作世尊。

題畫竹

竹禪遺著

虛空品概重瓊瑤。出土森森到九霄。任爾狂風驀地起。肯隨楊柳畫旗搖。（吟風）
信手拈來莫漫嘲。披箋也自費推敲。只因變却夫人法。半畫風枝半露梢。（承露）
知時好雨潤貧鶯。夏玉敲金送早涼。草閣眠琴人靜坐。數竿清影憶瀟湘。（醉雨）

游佛手崖觀佛光詩并序

李毓菴

癸亥初秋初十日。與隱塵居士同遊佛手崖。日暮偕往天池寺。登文殊臺。飯畢月上。聞錦繡谷有佛鏡。夜輒示現。遂往觀之。相傳有文殊金象埋谷中。光乃金象所發者。至谷時。卽見佛鏡三五。隱現飄忽。紅如金粟。隨現隨多。因再至佛手崖。證其異同。將及崖。忽覩山腰有異光。一如車輪。一如匹練。白而煥彩。極類電影。久現不散。行里餘。逼近。其光頓滅。眼前依然一青嶂。了無一物痕跡。初見時。疑爲目花生繖。呼隨從指示之。皆云不見。及光彩全斂。始信。然猶以爲偶然得見耳。不意從佛手崖頂。信步而下。又見對山中腰。異光如前。化兩爲一。仍類白練。因捨輿疾趨。目不瞬視。及坡盡抵山脚。光又頓滅。隱塵云。下崖時亦略見之。同行人仍堅執一無所覩。是真不恆有之異景。與靈谷公共所視。形色全殊。大小迥別。僕患脚軟。山居兩月。苦難遠涉。此爲第一次出遊。卽蒙我佛示現。殆爲指點迷津。堅我信願。感仰慈航。成詩四首。錄寄隱塵居士。同表讚歎。兼爲修途致勗。

要識心燈卽佛鏡。大千照澈散還凝。何須丈六金身現。頂上圓光靜夜昇。
 寶鏡晶瑩月滿輪。靈臺日日掃浮塵。琉璃萬盞一莖火。色相空明始見真。
 靈鷲峯頭得未曾。雙輝瑞彩吐銀稜。精魂喜證三生石。無量圓明在上層。
 接引維摩是故人。談經敷座白頭新。龍華燃遍金蓮燭。慧眼觀來共此因。

訪紅豆村錢東澗柳如是遺蹟

南 萍

大道從來喻牧牛。個翁心事託平疇。當知蓮萼初標日。正念彌陀警惕秋。
 多情如是亦清流。出世風懷入世求。伴得龐家老居士。畢生繡佛絳雲樓。
 浪作人間豔蹟觀。流通典籍不知參。怪他文士多巾幘。綺語從教幻萬端。
 紅豆蕭疏豆子寒。不堪回首白雲端。吳儂饒舌渾無賴。蓮社何年復舊觀。

見梅

李隱塵

疲驢破帽苦吟身。落日寒林不見人。正是好山行盡處。滿江臘水一枝春。

秋日臥疾佛學院書感

會 覺

病骨那堪常做客。滿天盡是洞庭秋。可憐多少英雄淚。黃鶴樓前空自流。
慢把癡禪笑問天。幾生曾種惡因緣。去年今日方遭病。今日依然似去年。

重九懷鄉寄白雲禪兄

象賢

烟鏡疎雨散空林。鄉思無端集客心。滿目河山非舊色。江天秋氣咽村砧。
海天寥闊雁聲聲。此際懷君無限情。猶憶去年當此日。黃花叢裏話平生。

送悅安上人返里

佛希

天涯同是未歸人。話別長亭更愴神。唯託清風與明月。送君杯渡漢江濱。

金陵雜詩六首錄二

心觀

斜陽獨立半山亭。極目蒼茫感客心。六代興亡成底事。頽垣不礙萬峯青。
驅車來問孝陵園。賸有虛堂供至尊。欲問當時開國事。陌頭翁仲寂無言。

寒山寺

燕咫尺

一洞寒流納遠峯。酒邊紅樹共秋容。畫橋三百吳江上。妬殺詩人祇聽鐘。

佛化新青年會歡迎太谷爾氏因紀二絕（並序）

莊蘊寬

甲子春暮。佛化新青年會歡迎印度詩哲太谷爾氏。至法源寺演說。相約往陪。是日午後。太氏負病到寺。所言至精。大致謂予媿無學。輸送貴國。但印度古德所攜至者。實有無上價值。不似歐洲之相餉。但有政治及商品上作用也。（予）佩其言歸紀此詩。

衆生實累維摩病。疆起方知說法尊。看識法音能震動。繽紛如雨性存存。勝緣不減見如來。彈指莊嚴樓閣開。記取丁香花下語。雷音臺畔起春雷。（演說臺設於丁香花下其傍適有雷音臺）

和太虛法師禪絕二十則（錄四首）

象賢

淒清夜色正三更。海底泥牛吼月明。兀坐蒲團空萬境。心燈時映佛前燈。萬里雲山萬里身。常將雙腳誇行人。須彌踏破虛空碎。今歲負於去歲人。春風漫爛雨初晴。最愛溪流蹙石聲。撫扣無弦琴一曲。遙看天際白雲生。

雪白飛花兩岸蘆。山溪泛棹片雲孤。縱身獨上奇峯上。近水遠村好畫圖。

遊抱冰堂

會覺

緩步斜陽上翠岑。滿山煙樹碧蘿深。堂中舊主今何在。留得冰心照古今。

贈別張遵午居士

玉皇

自昔相從出虎谿。當年事未隔胎迷。靈光迥脫三生石。來往空聞鷲亂啼。

秦縣公園題壁

太虛

十畝園開淺草場。一亭風納白蓮香。小河隔斷人烟外。古木幽蟬各自涼。

閱報有感

哭奩

中原回首淚潸潸。荆棘當途利濟艱。此後將成何世界。空餘寒夢繞家山。

見雁

前人

平安寫就每頻看。客地何人弔影單。偌大乾坤無住處。橫空嗟爾入雲寒。

除夕

前人

圍爐趺坐撥寒灰。歲暮頻驚臘鼓催。明日迎新今守舊。始知立地有輪迴。

買舟東下

石琴

他鄉窮子竟忘歸。富貴何常願已非。到此莞然成一笑。自家原有舊珠衣。
飄然一舸下長川。江色蒼茫水接天。彼此岸邊都真住。相邀同上大悲船。

觀黃鶴樓盧生睡像

善憲

身不封侯志不磨。從來幻夢達官多。鼾眠亘古成先覺。休笑盧生因睡魔。
濁世難言我獨清。此身擾擾萬緣縈。試看佛眼如來有。圓覺功名枕上成。

嶽衡和尚爲上林退住近日居山寄此示意（二首）

解凡

嶽色蒼蒼聳楚天。衡雲蕩蕩繞流泉。世緣隨順無遮會。不作東方作濟顛。（師善談
諧人見輒笑）

不使人間造孽錢。（成句）丹青一幅硯爲田。（師精繪事人物絕佳山水花卉翎
毛猶餘事）興來輒飽渾忘我。參透多生未證禪。

次哭庵將之匡廬留別原韻

寄廬

百城煙水一蒲團。到處隨緣到處歡。漫說魔軍紛擾擾。宜如水月鏡花觀。
萬緣放下自輕安。耐得山窗形影單。悟澈真空妙有趣。悲懽離別總無難。

附哭庵（原韻）

殊勝因緣聚一團。課餘齋罷說悲歡。清涼熱惱惟心造。應作行雲流水觀。
祇求進步與心安。不必牽情吊影單。識得輪迴人事苦。離別容易會逢難。

閒居述懷寄友

劉湘波

辟穀玄風羨紫陽。猶明自性契空王。悟真篇解如來意。惜似曇花一獻香。
世尊正法日中天。浩浩三藏攝大千。細釋楞嚴經勝義。羞同十種祇稱仙。
丹經誤我昔流連。不惜真如總變遷。造到天仙猶有墮。未離欲界豈超然。
出谷遷喬鳥尙知。人靈當弗見機遲。蓮宗信有橫超訣。漫期金丹不死醫。

放生（乙丑九月）

釋壁輝

名殊體異性無二。遇捉遭戕膽即驚。惟有放生功德大。將來西去證無生。

學佛院留別

霞光

花開花落只須臾。回首東籬草又蕪。天地繁華一蕉鹿。江湖聚散幾沙鳧。
願心已了三千未。佛法應憑一點無。今日祇園賦歸去。靈山會有舊家廬。

自感

竹影

廿載韶光似水流。寄身塵世等蜉蝣。應知此我原非我。早定歸途莫浪遊。

贈水野梅曉

太虛

年來沙磧隔重重。地底潛流水自通。今日憑君新努力。還將佛法換歐風。

寫贈永平寺

前人

種麻桑者得麻桑。極日青蔥徧大荒。且造善因求善果。不須疑惑費商量。
佛化新開坦蕩途。人人在握有靈珠。四邊莫觸真般若。中道何曾落有無。

送太虛和尚歸國並致同行諸法師居士

端州吳功補

一葦東來匝月游。他山石也證前脩。此行說徧蓮華法。應向生公亂點頭。
大千變化此塵寰。能讀楞嚴解八還。白鹿洞邊觀自在。更無諸相障廬山。（和尚近住廬山脩養）

乙丑季秋太虛法師赴日本東亞佛教大會航海東來獻詩二章聊誌忻慕

何子銓

宗要曾聞珠水濱。漫天華雨會庚申。（法師曾應吾粵庚申講經會聘。說佛乘宗要。）要從海外瞻風範。無量光明轉法輪。

宏開法會辯才雄。領袖琴仙東海東。三界唯心心莫背。孰傳心印不言中。

太虛法師將赴日本邀游浪亭正黃葉秋聲泉石整潔命休鼓琴緣作普庵

一操法師稱善蒙賜書句賦此爲謝

大休

閑黎模樣雅人心。曳侶林間且聽琴。流水高山終世語。大聲還是海潮音。

送中華諸仁者回國

日東沙門宗憲

俱是法王殿裏人。相逢無主亦無賓。休言萬里波濤遠。江月松風隨處親。

初住新蓮社

大圓

草菴止宿越三年。今始歸家見寶蓮。回首前來除糞事。敝衣垢膩一茫然。

空中樓閣幻中修。撈撻人天一切收。須識此猶化城現。前頭寶所應誠求。

靜觀

大圓

香塗不異刀來割。贊毀稱譏本自同。若問世間恩怨事。虛空持捧打虛空。

六道輪迴往復還。天人鬼畜總無閒。看來生死尋常事。空說鴻毛與泰山。

雜感

源印

半生都是爲人憂。博得今朝作楚囚。法化振興空努力。忍將淚眼看比丘。

走遍雲山萬萬重。歸來依舊一身空。劇憐世事真同夢。辜負光陰五載中。

訪明心上人於成都文忠公祠

蔣特生

蘭若巍巍絕市閭。白雲深處叩禪關。滿塔苔蘚無塵垢。話到更初客未還。

獨駐清修遠閣。秋風黃葉拚禪關。通曲曲徑無人到。野鶴閒雲自在還。

題竹二首

唐蔚熊

笑傲冰霜冬復春。此君高節本無倫。如何一入丹青手。却似風流媚世人。友柏交松耐歲寒。風前雪後尙神完。深憐傲骨蕭蕭意。也應丹青一寫看。

詠空林（卽成都文殊禪院）八觀並質幻住上人

蔣特生

生花妙筆降天池。呵護琳宮猶未離。漫道遜清無善政。莊嚴功德在靈祠。（天題瞻

榜）

迎來聖像壓瓊琳。功德何曾只萬金。妙相如如觀自在。一龕佛火照禪心。（緬玉敷

龕）

尊崇佛寶證前因。像繡青絲最有神。色卽空兮空卽色。觀音處處現金身。（髮繡披

珍）

多少工夫寫得成。玉函寶藏放光明。鬼神欽仰龍天護。那部蓮花舌上生。（舌華含

實)

水田衣上聚摩尼。想見當年極盛時。幾度滄桑今尙在。悠然獨立動遐思。(田衣絢

彩)

金剛一卷塔空林。佛佛抬頭字字金。居士侯門真善巧。前身金粟又來臨。(窣堵障

金)

石像般般着意裝。茹齋久住見珍藏。叮嚀莫作尋常看。剎剎塵塵盡放光。(羣窟湧

光)

雙樹古樹勢參天。不畏風霜不計年。渾似般舟三昧也。堂前侍立靜如禪。(雙樹表

瑞)

八十生辰述懷(有序 八首錄六)

對 晁

丙寅冬月十九日。爲(對晁)八秩誕辰。念敵縣洪水爲災。失所者數萬人。而西河兩岸。決口十餘處。因擬閉關謝客。節省筵費三千元。移助隄功。並提倡募捐。用拯災黎。

賦截句八章以見意。

人生三萬六千日。一息猶存莫放過。欲廣福田先種德。及時行善勿蹉跎。
刀兵水旱本天災。滿目瘡痍甚可哀。無術點金頻乞賑。同仁爲我共輕財。
劫由人造思消劫。感召天和在好生。放下屠刀能戒殺。慈祥一念兆昇平。
壽筵節省纏頭費。起死回生可萬人。演劇一天費約萬元。每人一元可活半月。

軫念時艱。覓物力。待移杯水活枯鱗。

紅魚清磬閉禪關。一卷彌陀萬慮刪。直指西方安樂國。豪華何必頌南山。
期願祇是人間壽。無滅無生乃般(音鉢)舟。不入輪迴登九品。蓮花世界願同游。

秋日登樓

譚道

茫茫苦海欲何之。獨上高樓有所思。秋色西來天地閉。風光不似去年時。

靈峯四詠并序

幻生

杭之靈峯。介桃園嶺青芝塢之間。竹木清深。境至幽寂。爲游跡所罕至。自蘇軾題詩

後。至清咸豐間。陸小石先生繪靈峯探梅圖。一時墨客傳爲韻事。其地故多梅。後漸凋零。復得周夢坡先生補梅三百株。構齋曰補梅。築亭曰來鶴。與皮經室掬月泉。號爲靈峯四詠。題者頗不乏人。余於民國十五年秋。小住其間。課後禪餘。隨意分題。自忘工拙云。

皮經室

法相莊嚴非偶然。其中字字見真詮。如來滅後蒼生苦。一笑拈花卅九年。

補梅齋

靈峯不使久蕭條。梅補齋成鶴已招。待到新春霜月夜。禪房香霧夢魂遙。

來鶴亭

四面青山半面湖。湖光山色共疎迂。竭來此地停雙羽。忘却孤山處士無。

掬月泉

天上清輝遍大千。池中有物亦皎然。低頭掬得水輪在。撒手須參水底禪。

和夏惟詰題超果寺一覽樓

太虛

極目雲間不見山。危樓徙眺幾憑闌。撩人野景饒生趣。拂耳春風怯曉寒。
三泖清漪空結想。九峯晴翠遠翻瀾。遐思不覺低徊久。五里茸城日已殘。

原禍

李毓如

西施生小住江邊。眉黛含顰祇自憐。一自勾吳傾覆後。鴟夷又泛五湖船。
卞和得玉因遭刖。滅趙亡秦啓漢爭。片石雖微貽禍廣。當年猶說價連城。
紅顏底事能傾國。金寶緣何足喪身。知是禍根偏不省。孽皆自作莫尤人。

偶成

太虛

截卻俱低一指禪。東歪西倒夠胡纏。年來自笑貪心甚。飽食遼期得穩眠。

題王籀蔭蘭亭硯榻

前人

死生亦大蘭亭序。物在人亡思惘然。懷古感今心一轍。驗知薪盡火猶傳。

朝鮮道中

燕咫尺

橋上征車橋下船。東來滄海已成田。人家禾黍秋風裏。悵望星河共一天。（漢江）
 武陵谿路好煙霞。不到椎秦韓相家。失笑水源人好事。村村紅葉替桃花。（水源）
 江月江花無古今。漁歌新帶島夷音。風波旋夜欺舟楫。添得深川幾許深。（深川）
 唐風消歇已千春。渺渺滄波迷古津。一幅海霞紅似錦。可堪割與賣綰人。（笠山）

對梅書懷

芝峯

雲笠芒鞋萬里身。江湖風月一閑人。窮途白眼吾遭慣。惟有梅花不厭貧。

記夢

譚道

要離苦海須成佛。何處空門不是家。自憶生平多幻夢。昨宵忽見白蓮花。

謁宗亮長老不遇

芝峯

雷聲淵默仰高風。此日行行謁遠公。自愧宿緣多淺滯。一塵隙裏隔虛空。

朝禮舍利

前人

法身無去亦無回。安有跡痕着劫灰。自是大悲能利物。故教末世見如來。

佛跡岩和天童寄禪和尚韻

前人

佛足杳然佛跡留。行人千載說岩頭。跡從足出跡非足。覓足還須絕路遊。

崇德福嚴寺訪古華師

太虛

石補鐘

十年前憶舊煙蘿。回首雲峯歲月磨。數杵鐘聲聞石補。一灣流水夕陽多。

縹雲峯（卽吳六奇贈查孝廉者）

揮金贈石兩英豪。留得人間風節高。好與禪林並千古。天中山傍湧雲濤。

掛瓢亭

千水千山一鉢瓶。紅塵白浪醉難醒。歸來萬事齊收拾。留得高瓢掛此亭。

陰陽鏡

古鏡當台着眼看。陰陽未判寶光寒。等閒嘗盡人生味。只是甜鹹苦辣酸。

和西貢居士李仲卓原均

太虛

潭水空明月自來。只須心地好培栽。根塵識界歸清淨。贏得蓮花遍海開。

贈大虛法師西渡說法步李居士韻

陳肇琪

一點無明萬劫來。菩提法雨試培栽。乘風有願西天渡。炯炯圓光逐浪開。

丁卯秋日雜詠（四首）

比邱尼淨山

養志吳山五載餘。青燈古佛願非虛。茅廬喜得野中趣。門對西湖畫不如。
太息湖山痛劫灰。夕陽影裏有餘哀。平生愛讀陶公句。况值黃花照眼開。
樓臺山水望中收。佳趣何須說臥遊。積習難消文字障。臨風得句費吟謳。
旅雁聲中起客愁。金風颯颯不勝秋。六根清淨皈三寶。只有西方願待酬。

聞鐘

大 脫

幾杵晨鐘響不停。穿花度水入閑庭。道人何意殷勤打。深恐癡人未易醒。

觀荷有感

前 人

藕絲不斷蓮花落。蓮出清波藕在泥。同是一般情海客。眼前偏有悟和迷。

寄伯剛四弟

大圓

流血成河亂似麻。見機羨爾不參加。若能澈悟如來旨。甘露無邊救國家。

覽盧鴻滄居士所造極樂世界圖塔卽題以贈

大圓

昔日曹溪本姓盧。而今極樂住西湖。我且停橈聊借問。應無所住生心無。

金陵感舊

大圓

三年兩度到金陵。往跡徒尋感慨深。多少青門種瓜者。都爲得意馬蹏吟。
錦衣玉食馬輕肥。畫棟連雲耀錦圍。太息尋常梁上燕。爭從王謝宅前飛。

題日本曹洞宗大本山

圓瑛

法流無盡水朝東。恰向扶桑樹一宗。祖印高提行法令。拈椎豎拂振家風。

難中口占（有序）

阮妙覺

己巳夏妙覺主講安化縣公校。因公開講演佛學大綱。不見容於安化縣黨部。迫走長沙。舟過益陽。被匪洗劫。手著佛學大綱講演底稿五萬言。破迷論全稿三萬言。並

遭損失、驚慌之次、口占七絕三章、以誌余生魔障之至多且鉅云、
 纔離黨阱又逢魔。浩劫年來消受多。厭亂何時天不語。悠悠心事託烟波。
 狂寇深宵截客船。零箋剩稿盡飄然。早知白日傷雲蔽。悔向人間種硯田。
 到此羞言深入定。狂徒吼浪一天驚。度人未遂先蒙難。淒絕彌陀十萬聲。（捨匪登
 船時不知所措、惟念阿彌陀佛而已）

七 偈頌

答禪人談宗門禪機偈八首

黃心舟

十二部經無個字。大千沙界入微塵。昔年迦葉拈花笑。猶覺當場太認真。

無情因地卽無種。彈指耕翻八識田。摸着那條斷貫索。學凡鼻孔一齊穿。
 祖師有口合掛壁。摩醯三目不能窺。法筵龍象慄懼甚。幸有文殊一下椎。
 精魂不是寰中主。痛棒能回劫外春。卽此無邊聲色裏。百千萬億法王身。
 蹴踏毗盧頂上行。渾無縫隙破沙盆。漫誇陷虎機權峻。有口終須是禍門。
 韓盧逐塊真堪笑。抱甌啼餓亦太愚。兩個泥牛鬥入海。誰云消息至今無。
 惺惺能使昏沈斷。寂寂卽無散亂心。十二時中常恁麼。管教瓦礫變黃金。
 六塵六識與六根。佛令全身放下。放到無可放之時。卽是安心立命處。

焚香禮佛詞

海虞朱保之遺著

稽首西方大覺尊。敢將福德乞慈恩。無邊苦海無邊障。五體投時淨六根。
 金經一卷是階梯。回首家鄉路不迷。想到倚闌慈母望。癡兒何日賦歸兮。
 靜中湧出紫金台。甘露門從是處開。恰好木魚聲定後。荷花撲鼻送香來。
 星河耿耿夜三更。十二芙蓉刻漏聲。一片打成求世界。自然心地大光明。

課罷細繙拂袖多。還來研墨寫伽陀。休嘲結習文人累。曾讀香山淨土歌。

答余祖言居士偈

太虛

一真無是亦無非。悟澈心源覺始回。實相淨明華屋現。圓間旋照妙門開。漸脩兼誦頂光咒。增進先拋掌酒杯。七趣五陰留不住。者條歸路絕疑猜。

余居士原作

萬象今宵陡覺非。偶從白社聽經回。久依名字心源苦。幸見人天眼目開。老去鄭郊空立壁。歸來陶令不含杯。明朝且復雙林去。世路雖多莫費猜。

敬題西方三聖像

石琴

卽心觀淨土。自性識彌陀。悟得禪中祕。恆河水不波。
朝夕一爐香。齋心禮梵王。極西原不遠。中道莫徬徨。
一滴楊枝露。居然灌頂來。金蓮花自好。誓不取銀台。

適余知命之年承衆門人爲余建塔作壽藏於谷山烏龍嘴落成之日啓余親

視不禁有感而說偈曰

解凡

我有一椽屋。父母爲修蓋。住了五十年。駸駸將損壞。早擬換將去。事又涉憎愛。成敗我聽之。彼此無妨礙。

刊佛之新研究告成偶得一偈

曹衲安

借到他山石。安身立命時。萬緣隨識變。諸有杖空支。學爲尋源誤。情從愛果癡。欲求伸慧力。相約禮玄窺。

賓主頌

南岳佛乘

主中主。常年弗出真如府。天然德相見者難。任是佛眼亦莫覩。賓中主。知有兒孫不離祖。雖然塵世亂紛紛。任運不出故鄉土。主中賓。遊戲公子乘玉麟。輪體入五濁界。依然身分不黏塵。賓中賓。大夢場中普門身。隨機幻出假不假。同事均起真非真。